

湖陰先生文集卷八

5563.7
8240
1962
v.4

BERKELEY
LIBRARY
UNIVERSITY OF
CALIFORNIA

Carpentier

湖陰先生文集卷之七

教

奉教策題

王若曰考績黜陟之法昉於唐虞爲歷代所宗雖有簡密之別凡用人試事之要舉不外此漢京房用此治郡其法可考而言歟晉杜預爲黜陟之課以六歲爲斷有何所據歟國朝高皇帝倣三考幽明之法定爲考績之規節目詳備至今行之無弊果合於唐虞之制乎其績效之著明者可歷指而言歟我祖宗成法具在科條考課黜陟之意未嘗不寓於其間而人皆玩法徒長虛僞豈有司推究奉行之實未至而然歟抑予之稽用祖訓之方未得其領歟如欲商確古今之宜振礪頽廢之習將何所取法歟予大夫學博識遠其於斯者必有講明折衷之論其各悉著于篇

講書堂月課策問

王若曰政貴變通事貴實苟推行有碍則不可膠守故常施措無效則不可徒尚虛偽試舉我國邊脩一事言之訓練也儲待也器械也將領也城堡也之五者有國之大計而在今爲急水卒比昔減耗戶孱保缺者在居半操舟控弦者十無一二則果可謂訓練之有效乎倉實到今頓匱空簿虛計徃徃皆然脫有悉兵轉餉殆不支期月果可謂儲待之有裕乎頃者倭寇陷邊增置戰艦泛據各鎮軍數以准三等之船故戰船多而軍卒少不能行船率皆拋泊浦口以至腐敗能槽人行艍之指南而諸戍少見存之數板屋船破賊之利器而二南有矛盾之異則果可謂器械之精鍊乎制閩衛國之重任自非儲養之有素委遣之有方則何以責捍禦之勩乎三邊分寄常患乏人果可謂將領之有人乎設險守國之先務議者拘暫勞之弊昧久安之益使之功不時奏以延歲月果可謂城堡之就完乎大抵料未然者輒目爲喜事圖永久者例指爲迂論因仍沿襲莫克以

身徇國予於斯五者深思極慮莫獲振勵之策夙夜兢惕不敢寧處子大夫並負經世之望方處儲用之選思變通之在上念責實之在下必舉瘡弊以報殊遇其於先事之慮及時之圖扼腕欲陳者久矣其各悉著于篇予將親覽焉

王若曰自古帝王之取天下也宣威德以論遠挾刑賞以勵民莫不由乎詔令唐虞三代之文誥即其事也兩漢以降詔令之近古者可指而言歟王通七制之屬果合於聖經歟山東布詔羸老之氓扶杖往聽奉天肆赦驕悍之卒革心揮涕其感人動物足以無愧於古歟國朝高皇帝約法牖民必寓詔令舉多親洒翰墨其布在中外如大誥祖訓之條章者亦可歷指而言歟其亦有辭嚴義正可以追配古典者歟我國家承麗李政亂之餘凡所改紀盡載條貫六典大典之外試舉一二言之則兵將有詭農桑有要戒酒有文而一時創新講舊之令副在有司者不一而足其亦有

質諸古而不謬施于今而可行不失近古之體歟予以寡昧叨續丕緒凡
發政施令罔不稽天考祖以爲宣布振勵之方而比來人心不古玩弛
成習命令之下未見奉行之實徒有反汗之患雖在無虞已虧國體況此
邊圉多警之時策應之急動繫安危成敗之機而法不究行人不信令至
於此極將何以脩先事之慮亦何以收及事之效歟予深憂之不寧寢食
甬子大夫目擊時弊必有匡濟之策其各悉著于篇予將親覽焉

狀

辭免大提學狀

臣素以稟質虛弱年總踰齡奄失慈育瘡瘍風毒遍身爲苦不克獲齒媚
學之輩以受章句之訓馴至志學之歲非但懵於經籍其於人事亦不通
曉躡從諸生誦習詩賦幸中上舍之選而治經之功力不暇及年未弱冠
遽捷科第當時童心未除不知掄入玉堂爲專治文翰重地濫廁賜暇

是儲養詞學極選徒以徵逐杯酒嘲詠風月爲務浪倚年齡之富足以縱
詩墳典力有餘裕而經傳窮理之學實未嘗潛究偶儻適用之文亦未嘗
從事荏苒歲紀倏踰而立職忝喉舌務實罔暇憂在草土疾成不救及至
外除被彈落南自分永棄耕釣之外志不在他中間雖或假以散秩旋起
旋躋往來憧憧迄無寧歲而遠路輕齎不得以求書自隨安暇肆意文墨
以冀他日之用予幸賴中廟過採虛名甄錄陞班十餘年間恒任詞訟
之官又安暇自撥控惚之簿整治筆硯於其間哉儼接筆使雖稱選授不
過旬月之間依韻酬唱而已此諸斯文重寄蓋亦末矣恭遇聖上嗣極
簡命儼接亦至于再特拔寡與之中俾躋六官之列思效微勞仰報
殊恩而碌碌竊廩撫己懷慚自來春省之長兼帶諸館之號宜殫蠡管之
見以裨風化之敷而菁華已晚謬忘頓劇豈唯度書不觀資用施設亦且
乖方耗耗爲失學之人雖欲自強心力不逮坐署吏牘五易寒暑臣前後

控辭避賢者爲是故也茲者文衡有 朝議推舉過實將臣 簡任臣聞
命隕越不知所自處歷數 先朝以來膺是任者必負一世之望名
與實副人無異辭然後可以堪處自非學問詞翰足以潤色辭命訓誘導
率足以儀表士林則雖冒居於一時終不容於輿論豈不懼哉臣言才則
旣無可稱顧已則又無所檢安可徒繫虛銜苟玷公器乎況兩國通情專
倚辭命毫忽之差實係輕重如臣者不能爲四六儕僚所共知其修辭措
意決不能無失其程度若致譴咎來加則雖治臣之罪何補何及自古爲
官擇人不敢輕授者蓋以此也大抵歷代詞學之臣必取清望少壯之人
者欲資其博雅瞻速之才以供文藻酬應之用故未有衰頹老醜之人猥
居掖院供奉之地若唐宋學士與今 中朝翰林之官卽其事也然而無
獨任偏授之制我 國則揔選述裁定之責歸之持衡之手其任尤專臣
今不暇遠引 累朝故實自 中朝卽祚之初以至季年任文衡者蓋可

指屈申用漑以下五人俱以盛年受任金安國以下三人雖屬耆艾此臣
猶少顧臣何人敢以非才暮齒僥冒至此乎且負乘致寇滿溢招損理之
常臣以斗筭小器叨據卿秩已逾涯分而復操文衡之柄致寇招損之災
其至無日矣臣之顛覆固不足恤任用之誤豈不貽 國家之羞乎伏望
聖慈諒臣微懇由衷 察臣固讓非虛亟收成命以授能者則臣得以
照舊供職而委 任亦得其人矣臣不勝悚懼俟 命之至

請收叙任彥國傳習鍼術狀

任彥國用鍼治腫之妙近來所無前日被 徵始也 給驛勉起中也官
支月廩終也 特賜寒衣 恩渥出常其感激思效宜無所不至非但治
療衆庶士大夫婦人難治之疾亦多異効故請除一官久在都下豈止本
曹之意大臣之意亦同但彥國素攻儒術累舉不中其居鄉行己亦有可
稱而其志不苟利祿雖除優品之官勢不肯上來頃者吏曹以彥國無一

資又不試蔭才 啓移兵曹叙用此有司所當然也在常格無資者初授九品彥國雖不薄此官其廩至鉅何以自給而久留乎 聖念方推活人之政名治一病者皆屬醫司給廩責効况彥國術自天得施救輒效曾活人數前已累次書 啓豈可不別旌異使之盡展其蘊乎典醫監醫學教授有二員而仕滿已經十餘年較諸本學人員箇月之法其應遰已非一再特以久次待其遷轉若作闕 命填彥國而給與准資則可責資食其稟而久留矣所有作闕人員隨闕先叙允爲兩便夫教授旣非正職散資亦非顯秩雖爲活人而授之恐未太過彥國得以職隸醫門一以治病一以傳習其與拘掇軍職俸廩不足資僕馬無所辦不得已回籍其爲裨損豈不相懸乎或謂六品之資試蔭之法不可爲一人而輕廢此固守常之論然如通禮院兼官以下四山繕工假監役漢城假郎廳等職皆不拘試蔭授職以後許試蔭之才乃時行之例彥國授職後試蔭亦不碍法若其

給資之例則近日趙晟亦給累資授軍職雖非常法亦出權宜惟在上裁或命收議處之

辭免禮曹判書狀

一臣本以愚妄不曉事冒忝典禮之官于今歲至四易朔有卅六其間廢事失當將禮愆儀非一再矣所當顯彼譴黜而聖度包容曲加全貸臣自爲計則得矣獨不念尸曠之爲耻而猶竊寵命予請亟解臣職以協物情

二臣非敢避事自便人心莫不謹於其始而怠於其終臣受任之初雖天賦駑劣之質未嘗少改而精力則與今較爲完全然猶臨事遺忘殆半自去年春苦風濕痰逆之證再蒙賜告幾至四旬僅得調治出仕而精力頓衰健忘益甚兼又濕熱上攻頭目輒眩腰痛間作行步實艱越衙漸不如前掩務亦不逮舊旣乏謹始之效徒有怠終之咎况替相親祀未免

違節 聖鑑所照而臣昧古人不能之戒猶不知止近來忝冒之久未有
如臣者每一反省愧汗泚顙非不知引疾析解為愈而庶輸涓埃仰答
眷遇今既筋力如彼其難強報效如彼其難策臣之不能在職決矣速逆
臣職以授能者其於公私實為兩便

三臣子之於君父有懷必達臣安敢避瀆默默苟退乎 臣犬馬之齒見
今六十有三矣少也猶不如人况衰耗至此乎歷數本朝典禮之臣未有
如臣遲暮者大抵尋常處事尚須精力未衰庶幾隨事不遺以底辦治况
臣筋力已衰加以素患濕痺轉甚其何以堪趨走跪起之艱乎 原廟禮
省猶未免失儀况 大廟 上 陵導引之節決非臣筋力所堪假使強
其精力坐曹理務至於 大禮之際 聖慈特許代以下僚則其於 國
體何其於臣心安乎况近來交隣應接最為難處臣膠守常典不能推愛
以中其欲疾怨橫生辱及於 國皆臣不職之罪自今以往臣在職一日

死則一日之患至經歲月其患隨積臣之去就便否無逃聖鑑此臣不敢以淹默爲得計而必蒙俞音然後乃已者也伏望聖慈諒臣情非得已亟命解適不勝幸甚

議

李廣原奉祀議

凡地居長嫡通稱冢子冢婦然主婦在堂尚奉先祀其子雖名爲長父歿而未嘗傳重其身則不可謂之冢子母歿然後乃襲其重故長子無後身死則其重應歸次子若子果不受其重則其妻當在庶婦之列不宜攬取冢婦之名專斷一家之事也頃年朝議考經據情必須傳重而後方許爲冢子與婦其防僭奪而杜覬覦慮甚遠矣李克墩長子世銓其母權氏在世先死其子秀蕃父子又相繼身死無所傳重主婦權氏與長婦李氏次子世貞同議取秀蕃弟秀幹以序繼祀至於四十六年之久又傳其子忠

元秀蓄妻鄭氏其夫與子未嘗傳重而身死則其一身乃一門之廢婦其於立宗義無干預雖爲己取秀枝之子璘置後宜援立後之例只奉其夫妻可也璘亦生時不敢出意爭嫡自知情法當然故也今者其子知命憊然謀襲大宗不顧元財主已定奉祀如使此輩接跡效尤恣濫成習則將何所不至禮曹反謂鄭氏爲主祀冢婦恐未之思也由此比事而觀之則知命是非曲直不在多辨矣况請講立後式在所不已伏惟 上裁

茂山君奉祀議

大典奉祀條云嫡長子無後則衆子衆子無後則良賤妻子此皆回故等叙出於不得已者也所謂無後者身既無子而死妻又有故無可托其宗祀則許歸衆子乃法例也其身雖死其妻尚無故則不可繫謂之無後也茂山之卒長子龜壽依法奉祀襲爵而龜壽又不幸身死其妻安氏爲冢婦則一家所共安全以待定嗣以歸其宗祀也申氏欲以次子肩壽越序

奉祀率意陳訴者乃眉壽干營之致少有退讓之心竢已與弟之有子
爲其兄立後以正宗傳可也或謂眉壽奉祀襲爵在於其弟未生子之前
其蒙先朝從顛不甚害義是不思爲之後者爲之子古今之通義安氏
之爲夫取弟子爲後正合禮法之意據此糾謬則眉壽之濫逼不待辨而
明矣非但同氣反目至使安氏見忤不得全姑婦之義豈不甚哉言者欲
正眉壽越祀謬襲之非豈徒爲一家之計爲宗法永杜營奪之漸也雖然
眉壽爵命恩出先王其鐫削與否在聖衷酌宜伏惟上裁

賜暇讀書改規議

詳考歷代規制詞學之臣率置禁近宥密之地金馬待詔昉於漢世弘文
集賢肇於唐時其館局皆在喉司秘殿重廊之後被選之人亦極一時之
望號名雖不一其所幹掌皆講讀詞命之重只管內務不預外事故有鎖
院儼直之名自非休浣不許私出抽秘書書籍以供討閱拜宣賜燭酒以

誇榮幸居是任者豈不自重思有以自效募是選者豈不自奮冀有以自致乎從古得異才卓識以收他日柄要之用率不外此高麗事宋最被優禮至其季世與元爲一家游學變魯之士彬彬輩出文彩炳蔚略侔中華我朝開國未幾老師宿儒凋謝殆盡文事不振每萃使到國輒肆輕侮

太宗大王慨然思變用河崙建議創設重試取卞季良付文衡之任獎厲殊特然後士皆通經績文思自奮庸以至世宗朝文教大振妙選名儒

以充集賢之員別設賜暇讀書之制首揀權揀辛碩祖南秀文等三人又遴朴彭年成三問河緯地李塏李石享申叔舟等六人此皆拔尤於集

賢之中其選愈重眷遇之隆錫與之厚不減唐宋登瀛玉堂之舊故生材之衆於斯爲盛自是厥後列聖繼述莫不以儲養文學之士爲憲恢規

備選無世無之堂初賜暇所寓之局未知的在何地至成宗朝卽龍山江上構書堂命辛殷尹書扁曹偉作記輝映楣間俾爲榮觀受暇讀

書之員共承 寵顧獲撥職務佔畢賦詠之外豈敢牽私浪出久空其寓
而莫之恤乎當時非但士習爲然自 上留意責效故或 命題應製或
賜物賜饌至於 特賜酒樂內隸 中使來往無時其自相餽礪不敢
任便亦 上之賜也 中宗卽祚之初銳意復舊廣選有文之士委淨業
院爲 賜暇之所第其 賜暇之規有三朔六朔之不等辛未年用大提
學申用旣議改選李待等七人爲長番時任臺官政府郎廳者皆授閑
官任 經筵官者亦待闕漸遠不許本司託言事繁續續 啓請還仕預
選人員無得自便出入以專其業行未再期還設六朔之暇雖申明瀆
啓推還之令緊過數三月冒禁瀆 啓如舊若任臺諫則累越本番終釋
言地旋卽復授至於積年不得授暇使選儲之制至今僅有其名職此之
由乙亥年校創讀書堂於東湖奧區至今行之規置與龍山舊貫不殊而
勸勵之方名實相懸略具改紀可行節目于後以備 聖明採擇

一時 御闕內殊無設堂之所進善門右議政府直房堂宇寬敞又有左右夾室外有聯廊見今政府移寓忠勳府直房故此處空虛議諸大臣亦以爲便 景福宮弘文館亦空虛似可排堂只是兩處稍有粧締修葺之功正當興建大役之時雖小工費並舉未安且堂屬典僕不敷皆遠居東湖往來支供不無難絀之虞然 斷以行之小弊不足計也但堂雖不在近密如 成廟推誠罷異則龍山之遠不害獎進 賜暇之效東湖之遠今不可屑屑計也惟在 裁擇後長處之

一今 中朝之制每於大比取入之後就中選額內揀年少有文學者不定其數謂之廣吉士例屬翰林院令學士等官二員掌其教習本院行令戶部給燈油錢兵部發皂隸刑部給紙劄工部撥房屋順天府給筆墨光祿寺給酒飯內閣按月考試竣有成效送吏部銓注本院併除冬衙門職事云云其選儲資效之方撥務專業之規纖悉脩具歷代所無也由此陞

檢討編修修撰以上官其中壯元者例補修撰必滿九載方許陞遷諭德
以上官以是觀之非積數十年久次則不得遷適其專意文學博極大肆
之功豈一朝一夕之所就哉自非文學顯異者不得居柄要之地雖久蓄
回翔之內終必遠到顯揚之地我國人士苟負名望者或未十年已躋
通顯以十年責效之短又爲冗務之奪其何以勸勉長進以冀成効乎今
者預選之員一切勿任臺掾雖於弘文館亦不過差一二員而不許推還
以撓番次其諸各衙門憑務還推者並痛斷勿聽且出使等項別幹亦勿
特命以爲定法如其長番六朔三朔之規在今審便裁定大抵如此極
選員數計不過六七若委長番責成績有歲月則盡爲該洽通練之才非
上賜暇鍊業而已起擢任用之途所期無窮信能行此則與中朝之
制無大相遠豈不韙哉但人情尚華要而厭寒冷況於一身之外又有親
年迫暮欲觀榮進則目前光曜爲急他日遠期有不可計也且儻弱不足

供薪芻之費吏隸不足備使令之急則非 國家優重選委之意也雖云
要劇之司缺少一員何害辦務乎勿論六曹及諸司必令隨品擇授則人
各自尉不憚長暇之苦矣惟在 聖明擇處

一人君所向係於人材之勸沮勸沮之別在 眷遇之優薄唐李嗣學之
盛常在治世其選之也精試之也周待之也殊賜之也優此四者乃得士
之要也 國家待清選之官有異庶僚常置禁近而脩其顧問不論資厚
而速其遷進可謂殷厚也然比之於古隆殺懸隔翰院故事選有萬錢之
目試有五題之脩待有內相私人之稱 賜有鞍馬綾綿之繹故堂擬仙
境官擬仙職人視斯選如凌紫霄蹀太清歆艷企仰必欲預其選而履其
地然後乃已 世宗朝集賢殿員皆給太官抄水前導至於東宮衣就直
廬問難經義其他 寵異之事 優渥之賜有難枚數大抵 恩出於
上非臣僚所敢期待今欲聳動激勸惟在於斯願 留意擇處

一 賜暇之要在於博覽經史溢爲詞華若不務培根本而經欲收功緒未則何異圖南而北走乎其所讀之書依古事朔末書 啓有時 特召討論首尾以驗用功淺深如朔李書 啓製述不必責課時不定或親命題或令出題使之製進考其等第而加獎則雖不按月課製所益常倍於舊萬萬矣惟在 留意擇處

一 賜暇諸官長在書堂不得休告則恐非人情所堪其疾病祭祀外輪賜限日休暇又於良辰 特賜酒饌以宣堙鬱乃是 優眷之一端也一朔內在堂及私故日數各於名下曉析書 啓亦責實之一端也惟在 留意裁處

一 近來凡屬獎勵之目目所建白靡不磨鍊舉行但人心慢弛揣知不出於 上不肯自礪仰體 上意故事多礙廢右件節目若不恒加 留意推誠不置則不過泛常事目之歸矣安保其能行乎古人云在力行如何

耳伏願於斯 另加留意

傳係白文告官議

臣某議大典內買賣傳係文券在凡人則必須官署者乃所以實其事而亦所以防奸也至於一家尊屬傳係子孫女婿與夫同產和會文券則許用白文苟有欲改其前券者則特令具由告官然後改給云而其註歷攀應用白文父母祖父母外祖父母之於子孫夫之於妻妾許改而獨脫妻父母之號臣常疑其抵牾而未得其說及今思之父祖之於子孫夫之於妻妾義係綱常既許用白文又許隨意改給明其義重而假其權制使子孫妻妾不敢違貳順承惟謹也妻父母雖一家之長比父祖及夫則大有間焉故許擬父祖夫而用白文獨不許其欲改者乃等殺之別而輕改之防也女雖天屬婿則以義而合愛憎之偏豈不啓輕改之端乎今以此條之脫疑其並指白文而許令欲改之家一切告官則將至人心不靖文簿

爭訟不勝其繁冗況以父祖夫之重不得操一家改券之權於告官之際
爲子孫妻妾之受者憚改其券多方沮撓使不得自申則老病及婦人快
快無奈何者衆矣其傷於倫理夫豈小哉 祖宗之典目一時所見之異
遽變而通之臣未見其可也伏惟 上裁

水軍分三領議

水軍分左右領准四丁爲一户輪一朔相適者乃大典之法也左右領分
爲四領以一户一保作戶間三朔相適者乃壬午間輕改之法也每戶雖
未准丁以時期存人數分三領立役者乃今訴憫者之願也臣請條析其
源委而縷陳其弊目當初講定大典之時非不知左右領番適類數而戶
內四丁隨缺隨補常使完全而又非取才軍士之例故四丁中勿論戶保
一丁立番三丁脩助番糧他餘 進上等項責辦之物四人亦並力脩支
故不知番數之爲苦科納之偏重人皆稱便近世以來爲守令者不以軍

政爲己任委諸下吏爲將領者巧立侵刻之目俾失樂生之心由是逋者相繼故多亦多而守令所務專在期會辦支之間坐視軍簿多缺未嘗陞一户充一保甚者其的望缺保者户首故闕者並奪抽其保以定官屬徒委兵吏每朔受搖於水兵使而莫之恤焉雖有據法責補之主帥反見謗傷而止軍户之消乏凡以此也往時議者不究其源謂水軍所苦在於番數思所以變通欲破左右領以一户一保分四領以疎其番指爲長策廷論紛然高荆山獨主是議識者憂其不然持久不決壬午年竟用此法大抵人情力專則不知萬鈞之爲重力分則不知一毛之爲輕四丁共一户之役可不謂專乎二丁當一番之苦可不謂分乎四丁之中雖缺一丁而三丁顧存力猶專也二丁之中若缺一丁則隻身而已力隨竭矣其何以保存乎不此之審而以疎其番次爲永行無弊之策不亦左乎今之欲分三番者乃頃年欲救四領之弊創建三領之法者也其意依左右領四丁

爲戶之法而又立一領也安有許多閑丁可完一領之設乎必欲行此法則不得已減削時存一分軍額乃可補設一領防戍素多而軍額遽減亦非細事要非可行之策也臣嘗寓居外鄉宜寧縣其南面一里乃臣所住丙戌年始抵其地鄰保共百有餘戶率皆水陸軍而水卒居二當時分四領未久弊已多端接近老卒輩來言不能保存之狀問其所以則皆云一朔闕番向時則徵綿布五六匹今則增至八匹以十三四匹補長然後乃准納布之尺其餘番時雜費亦不下五六匹貧艱小民無藏獲可收貢布無宿賞可補番價一遭立番輒賣片田若牛馬釜鼎以至室屋則已屬逋逃臣初聞未敢爲信及閱數三歲其言果是此無他保單助寡之故也況其且保者乎且鄰率以赴番告辭而去者過六七日尚在家耕耘問之則領船兵吏受賂賣閑者也又有婦兒號哭于野者問之則其夫准番遶回路被領船兵吏謀督所庇之卒竄名都目而捉去者也臣之所見聞非止

此一二在在皆然守令之不親檢攝軍政類此臣往來鄉曲幾數十年每至逋戶益多問其所苦則闕番價布增至三四十匹其他徵歛名目不可枚數割剝之酷此舊倍蓰安得不折產而逋亡乎逋戶之害延及一族隣里與夫買其田宅者怨苦之聲所不忍聞通來離鄉十有六年間之鄉人所存人家不滿三十戶而皆失業欲逋雖非盡爲水卒之戶而害延通散者多是坐此也臣常扼腕慷慨以爲無變此道則水卒之錄皆爲空簿逋亡者不投入僧徒則填於溝壑將何以能國乎京幾清洪水卒所願者破四番爲三番則番雖較數時存之卒不拘具保而自能繼其役云此則假如四百之卒雖缺一百猶可並支其役實是悲痛之辭也可施與否非臣所能逆覩臣之妄料以爲依大典分左右領其不准四丁者推移截補盡爲完戶勿論戶保輪流立番其在家三丁共助番糧且應支之物並力辦納守令不顧軍政者摘置重律一年內幾戶有闕不補者罷黜懲慢每

朔番卒守令親執名簿點送俾均勞逸色吏受賂越次番送幾名以上者徒邊不撓則祖宗之法庶可復行而無礙矣議者云甫領軍籍遽改請定之法有妨事體姑置之俟六年改籍之時參究便宜改之未晚臣意以今改定籍固是小事然事關民隱切害則雖易之不爲病況非改全籍乃改一條今者將四分之領合爲二領將二丁作爲四丁而已固非通融諸條穿鑿毛改之比也若必待六年改籍之時則又經二三年方可改頒其紆民之期遠在十年之外矣恐非聖明軫疾苦推惻隱之意也凡言定籍不可動者固是老練之論而臣亦脩員本兵之地改水軍一節尤非臣之所當言但平昔所抱如上所陳則安可苟存形跡含默而不祛乎伏惟上裁

被擒倭人奏解便否議

臣某議今見被擒倭人三浦羅古羅等供辭情偽雖未可的知與唐人同

船商販往還 上國逢風漂泊投我地方所歷村里人家米糧等物討買
爲資以救飢乏云爾則似非剽掠之寇且全羅道於蘭浦投示書契顯是
唐人修辭則與此所供暗符論以賊倭未安若倭供辭干涉 上國須奏
解處置則非如癸未年望古多羅中林等擾害寧波地方燒解宇殺人物
至奪唐船並擄唐人遁至我境反殺傷追捕軍卒之比也今次濟州琺島
等處設旗牌放鐵丸之舡未知果是此倭否也頃年所捕唐人至於八名
例當奏解則供招連引之人雖在平時不得已一體解送况既明審 上
國之賊則獻俘之舉豈得已乎其後日本國王不知逆順之理猶執望古
中林之事通聘書契中忍憤致咎至於再三不已我國譬解雖勤其惑逾
甚今者事體與前有異必奏處乃已則徒結與國之怨而又無前日有辭
之報則彼之猜釁肆鈔安保必無臣之妄料所擄倭人姑分處內地住活
徐明爲賊然後處置未晚近來閩浙所轄人民通倭商販恣犯下海之禁

貽害我國之狀雖或奏聞不必脩此擒倭之供亦可權辭具奏伏惟上裁

水軍分三領議

臣某議水軍番領各准四丁分左右領 祖宗朝詳定載典行之百年民膏稱便一戶內勿論戶保循環赴番而三丁共助番價諸般軍役之中最為寬歇向在 中廟朝主兵之官誤聽留鎮衙前之卒誣訴番數難支以一戶一保各自為領分立四番以為番踈蘓復之策固請欲行不顧戶單助寡反啓流亡之漸雖初為長慮之議所阻竟行此法鎮將徵斂日滋戶保中一名逋亡則餘者不能獨存又隨逃縣侵徵之弊延及一族隣保閭里一空所在守令不以軍政為務坐視民散遂成難救之疾及經軍籍闕戶闕保全不充補頒籍之後民怨益甚牒訴盈庭議者知其救弊無術以為若補缺保復行左右領庶有一分之益不意倭寇闖八邊境騷然造船

制敵之役大興以各鎮軍數多少准製船隻需辦多門絕戶亡丁亦助其
營船數不減則雖番領如舊猶不能堪况可輕減軍數乎今者清洪水率
欲行三領之規雖於防備有虧度望一分之寬悲痛之情不可忍聞其所
謂三領者非准四丁別立一領以踈其番就於赴番見存中抽出一分名
數權作一領率以三分減一分於今邊將增兵之望固爲有碍船數之減
亦非細事但恤見在之害不虞未然之患以致月流日散軍額留空則所
損非止一分也大抵救病之術及其在表施其攻砭庶可求活毒入膏肓
則雖和扁之妙無如之何矣且兵不在多要在擇將不必苟存全領然後
可以脩禦也今計一户之中雖或只有一丁若別置一領爲三則一年八
防不過四次與其無一朔全息而長立番鎮竟不保存者其利害相萬此
可以推類也伏惟 上裁

進慰使差遣便否議

臣議法殿屬燬之變雖重比九廟則固有間隔外國事大之禮雖勤比內
藩則亦有區異查得正統十三年南京奉天殿災未聞我國修進慰之禮
嘉靖十三年南京九廟火亦未嘗遣使進慰嘉靖二十三年北京九廟火
乃始進慰雖出於義起中朝未云合禮今此奉天之災縱曰正衙緊言
之則不過曰宮闕而已豈可與九廟比並乎我國雖曰得視內服比王府
諸藩則內外之等固相懸絕矣凡在慶吊每欲倣擬未知果合於事宜也
且我國與中國比壤為邇凡修慶吊率不出四五月之內今此遣慰比
抵京師則動至經年恐為太緩況中原一路達子闌寇殺畧甚酷存在多
梗以非不可廢之禮而強效內藩之為尤非其宜今雖不遣進慰固無虧
於事大之禮伏惟上裁

濟州人物刷還議

濟州三邑軍旅之數皆減舊額近來尤縮正當寇抄方棘之時兵力不完

誠可寒心今者雖欲充額本土既無閑丁陸地諸邑丁壯亦難推移絕島以補闕額百計籌度難得善策但前者三邑人物逃移內地濱海郡邑者委遣敬差官括還舊籍逃移之戶習居內地括還未久旋即還逃徒爲騷擾未見其效然救弊補亡唯在得人今若另遣幹敏京官盡心搜括俾無脫漏悉還原居使所在守令務爲安集惠恤如有如前逃躲者登時飛報監司窮極緝捉各還其業歲抄 啓聞則庶有實效軍額亦可漸敷且全羅道內驍勇弓手別令揀選三邑防禦緊劇去處量數八送分防限年相逐如兩界自願赴防者以次補禁軍則人不避選而三邑防禦實賴永固伏惟 上裁

留館倭人分運來朝議

倭人中本國及各殿使送外對馬島歲遣船授職歲朝船來往無時各起人數雖有點數之法少加鈐束躁暴橫生不得已任其所爲以致留浦倭

數無有限制與三鎮戍卒較其名數則殆過數三倍不虞之變豈不爲識者寒心乎分運接待似爲要急但倭奴縱肆不受我國法度久矣今若遽以分運來朝事通諭則必不遵行怨怒隨之其勢難行且不時往來定限發回人數猶多況分運待之則艤數倍多格倭之衆比舊什倍以倍多之衆懷怨怒之心其生變不無促激以發設法通諭不得行之則國威反褻伏惟 上裁

黃海道館軍永定便否議

黃海各站館軍頃年以道內軍士抄定滿限相適其苦舉一道皆受故不得已變通以冒屬甲士謫罰抄定又抄空閒人戶並定以助其役而依平安道永定館軍其法似爲安便但終身作郵卒奔走無少暇人不能堪相率逃縣各站爲之一空反不如限年相適之時請照舊輪定以救一時之弊本道監司所 啓不爲無見限年之法雖不可爲永久之規今若復行

則終不獨受而其苦稍寬此諸抑以永定使之終無絀役豈不有間試令行之固不為妨伏惟 上裁

遣臺諫糾檢試蔭議

更任取才非科目出仕者發身之途講試之規固宜謹嚴而自來解弛非徒冒濫入格至有關節姦偽而得舉者誠有如諫官所 啓仕路不清任用之人職此之由其講試之時臺諫往來糾檢非違於事體無妨伏惟 上裁

文武甲科加階議

文武科出身人內中甲科而元有階者加四階階窮者陞堂上自非階窮者則不可陞堂上非難解之文頃年以為科舉之階非如雜階必須親授雖末階窮展四階而至堂上則皆令冒授此不用法而好鑒私見故也李堅附末階而冒陞堂上 國論所非教子訴悶至為濫越伏惟 上裁

慶尚全羅兩道監司挈眷久任二周年議

祖宗朝各道監司通無府尹牧使滿三十朔乃遯其時講定靡不詳盡而
未久乃罷必有所礙故旋設旋革今之議者以爲慶尚全羅兩道地大物
衆任方面者事務叢萃施罷之宜一人精力一期之內勢不能展效依兩
界例挈家久任度可於公私兩濟但古今異宜人品不齊在昔屢豐今則
荐歛若設本營則僚屬營屬衙屬新設之難供億應接之弊視古倍蓰况
身帶守令之號廉摘列邑之失事體有妨且人心煩簡或異梯已請囑亦
難保無如是則守令無所畏憚殿最亦不盡出於公其害反甚於數遯今
棄百年無弊之規欲復先朝難行之法恐非時宜若以爲兩道監司以
儒將別遣年年遯之人才有限得人爲難則三年之外儒將亦豈可常有
乎本道有兵水使監司又兼節度邊帥得人則監司雖非儒將豈不能節
制乎況今邊虞方棘朝野不能無事正當靜以鎮之凡屬更張未宜輕舉

伏惟 上裁

訟者始訟親着日限議

大典內始訟後五十日內無故不就訟過三十日者給就訟者之法元爲
避訟者設也大典頒降後行之幾二十年別無違碍至壬戌年因訟者鑒
出私見用法之官亦要防姦以爲甲乙相訟其就訟與不就訟不須皆滿
三十日然後可決勝否就訟若過二十一日則當給乙者且元隻不現日
亦依官員不坐之日計除 中宗朝丁酉年又申明此法以爲甲乙相訟
甲者理屈多日退避乙者就訟將近二十一日甲者出現一二日則聽訟
官乙者親着旋棄不用已成格例因此延訟之徒隨意出沒斷訟無期凡
親着內間着者一切勿受理云云叅詳兩條受教皆曉析元法講究精當
大抵五十日內就訟者親着已過二十一日則其餘日數只二十九日不
就訟者雖出現若愆舉五十日計斷則就訟者已得二十一日親着其勝

勢已著假令避訟者到此始出並立訟庭所餘二十九日內訟官不坐日
及元隻不現日計除則雖欲極力與就訟者相抗勤慢之課所輸已多其
自抵不勝不待多辨而可知若拘不就訟滿三十日之限就訟者親著雖
至二十一日不就訟者之日又滿三十日然後決給是則故令不滿三十
日而使避訟者得以爲辭其長避訟之術豈不益甚乎自古立法者舉其
大體若其推移節目之詳則專在用法之人壬戌丁酉兩年之條如指掌
固無害於元法三十日之限臣意以爲不必改釋法文而使用法之官參
酌推行爲當伏惟 上裁

旅外破定水軍議

當今軍額類皆虛踈而水軍爲甚頃者分領失宜受弊偏苦無戶不缺無
卒不困積漸耗減今雖甫經軍籍又復合領率爲張虛無實故時常充立
番戍之際闕戶則必責徵族保鄰里苟免目前之責其來已久連累所及

逋亡相望村落一空其勢岌岌而比因倭警唯務增兵未暇及於救弊議者策慮多端未適厥要然膠守故常無補急病莫如權減闕額率以百減數十什減二三是要以關防緊歇務令得中則所減雖少通算宿兵之地蘊息非細且旅外正兵根繫平良或有士族之人視世傳水卒之役如避死亡今若割定水軍闕額則心生怨梗之心先懷縣免計終為兩失策又厥數不敷以此移補實為無由計今軍籍之時以久遠水軍子技盡投陸軍及他役者不少詳加查括一均抽還本役將上項旅外替補其代則廢為便益軍籍式年近在明年雖屬多事似未可舉勅使回還後隨即改籍務盡精飭則水軍闕額自然完實永無遺患矣伏惟 上裁

對馬島通使便否議

臣議通使馬島在 祖宗朝常行之規 中宗朝以後屢請便否至再至使臣竟未能果自廢此舉五十餘年中間彼島謫詬倡亂亦非一再或絕

或和皆 國家羈縻懷緩之策 恩私之費無有紀極而猶不知滿欲復
裁減歲米舡額之數逐年控訴又假本國通聘書契必得請乃已其情偽
誠未可知議者以爲通信本國固不可議欲遣使島主探審誠詐又欲用
是爲辭給與所裁 恩賜此雖出於慰悅弭患之計其於修舊撫寧之義
亦似近之但臣曾叨禮官查考膳錄在 成廟末年權柱以敬差官使于
本島島主楠病不迎 朝命使臣累日留浦固要受 命竟不肯出我使
不得已許其子代行而拜跪多不如儀使之強行僅得宣 命然虧損
國體亦多矣其時歲屬屢豐兵力雄強足以彈攝小醜而彼猶偃然虧禮
如石况今二邊仍歲受兵民困儲竭彼島知我虛實審矣今雖遣使島主
不謹受 命未必不甚於舊年就令使臣往來無碍獲伸 國威日本國
王或因此特遣聘使硬執通信則我 國於彼先小後大一行一否其於
報答實難爲辭伏惟 上裁

庶孽許通便否議

大典內庶孽子孫不許赴科舉通仕路之法非但歷代所無我東方自三國至高麗亦無此法逮八國朝始立別條載諸國典當初議法之人未知有何所見大抵用人不繫世類古今之通典帝王之公心也臣常恠我朝國典有周官之美意而乃有錮人之政夫庶孽母係雖賤稟受於天則一也是故古之賢才多出於側微今中朝擢科目列柄要者無間庶出前後相望夫以四海之廣人材之衆雖區別側微不患乏材而取人之廣如彼況我國壤地狹少生材有數乎設法之初被錮之人想亦無幾法行百年支派蕃衍殆與良人相半若未解痼痺不得赴舉則是舉一世一半人材而棄之也於帝王用人之道豈止偏隘不廣被痼之家積鬱傷和不無其理爲今之計何可膠守舊典不爲變通之舉乎今使庶孽無所拘礙驟齊士類則有駁物情勢亦似妨蓋其身則既取其母不正未可遽通

至於其子則代序稍遠婚娶用聘而尚坐先累不已甚乎臣意諸干此類
許令有司先考門長保勘並覈行業勛修許赴兩科生員進士試於帝王
公共用材之道損益舊典之儀而無所妨如其大賜處分用人無方則
寔在聖斷非愚臣所敢擬議伏惟上裁

兵務除陳

一水軍分番之規屢講便策未得其當愈變愈碍今者博採廷議依祖
宗舊章分左右領施行此實衆議所屬推行無弊則積患可祛民得蘓息
誠爲長慮但准四丁爲一戶一人赴番三人助糧其他責辦亦合衆力而
不揀戶保輪流赴番則番雖數而無偏立之苦役雖重而無獨費之害任
軍寄者省色目之歛主調送者勵怠棄之心以是百餘年來水卒完實沿
海防戍兵力優而器械利壯士輯睦愁歎之聲無聞自守今不以軍政爲
務調送充補之事一委下吏訴悶者不省缺保者不補軍案內缺絕之戶

始多番數助寡人胥怨苦議者以踈其番次爲救弊之要左右領分爲四番而人愈不堪逋逃徵督之害延及族黨隣保列邑騷然議者又思救此弊遂建三領之議民苦稍紓軍額頓減卒以五分減二此無他既無閑丁別立一領而裁縮見在軍數以作一領之故也茲當邊圉正棘之時增兵尚難措手况減軍而求濟不亦難乎左右領今復祖宗良規此正完缺補弊之機若不推移保舉使各戶無偏損偏益之弊務要實惠及人則雖十易番領之規坐見軍簿盡爲空文脩禦日踈終不可救矣依舊合領似可爲完而脩保率者多是曾已逋逃苟存其名者也缺一則以三人猶可支番數之苦缺二則只戶保各一人安有餘力相助以支終身之苦乎况單身則絕聞左右領之定已屬縣避矣計今水軍元額合四萬八千八百而軍籍時未充定京畿清洪兩道並一千餘戶時存實數四萬七千餘戶也然以左右領作戶見之則准四丁完戶豈至強半而已哉率於完戶抽

出一丁移保各戶關保則不必如三領克減軍額而可使見存之戶皆可爲一戶與二丁也誠使各戶盡爲三丁則一人立番二人助力與泛然合領受弊如舊而反甚者其利害豈不相懸哉且水軍子枝投屬他役者軍籍後加年壯者令各戶首自望先補抽出之缺仍保新戶未准保數則載籍元額何患不盡爲完戶乎諸邊倭警無處不急射御雖非水卒所長而完城塹整舟楫又將責誰乎各鎮射官之設徒爲虛名若使將領不加賤鄙就其中妙揀有才力者悉蠲雜役勤課射藝則當必有翹楚者輩出殆過於陸軍矣推移補缺雖有少擾終享久利

一各鎮浦所轄水卒在昇平無虞之時積被侵徵之苦皆懷橫逆之心一番闕立每居三分之二稍有產業可備米布者則終身不見本鎮門戶其常時立防者皆飢困羸弱之徒頃年朝議以鎮將縱放當領之卒收貨入已或令代立附近之人以便任使上司及御史點視時則叫合城底閑

雜居人俾替闕軍名數故監軍御史發遣事自內以摘發代默之奸為

首用是鎮將異怯不許附近與城底之人代立闕軍而虐使多端故能櫓
人及閑雜之人無所資利漸次携挈遠避改業生活各鎮城底曠無居人
以數少不解舟楫之卒又失職水路代替之人軍勢單弱雖有幹敏之將
不能為措濟之策今者使各鎮另造戰艦以備警急而操使無人誠可寒
心大抵水軍避番之習今不可卒革莫如權設代糧之法使鎮將募閑雜
水業之手使之資食代糧則嚮時避散之徒聞風輟集室廬枕櫓森然相
望衛居城鎮無事則雇力修造有警則操舟搜討權時之策無出於此然
代糧之數須有限制以防猥濫計本鎮軍數多寡差等定給

一火炮銃筒之法自前朝之末設火筒都監鑄造制敵之效已收於其時
今者講求遺制曲極其妙願諸沿邊各鎮誠為利器然鍊習不素則無以
應卒各鎮以所貯銃筒應裝火藥以為會計付物不敢一試其效機械雖

備心手不相應則與無何異請於諸鎮要害去處另送火藥按月習放使
將卒手熟以備警急之用或云火藥煮鍊功重該司月課之數不敷許多
邊鎮豈能周遍分送以供習放之費乎然火藥之材焰焔為主鹹土所在
有之煮取不難故向時外方恒貢皆自煮上納今若申明煮造之法令各
道或定都會官或委巨鎮一同京差匠人依方煮取使主材有裕則除班
猫柳灰易脩之物外自京所送不過硫磺一物而已合製之功又何難焉
或又云火藥禁物不可於外方輕洩秘法今中原絕塞遐徼宿兵之地皆
以放砲爲號令其常該用火藥想應不貲豈皆京師製送之料乎其不以
內外而禁秘可見矣

一濟州三邑人物凋耗頓甚大靜一縣則已至不救之極向者所聞恐或
不然及見尹毅中書啓皆出親自點閱比舊消之不滿三分之一若遇
強寇大舉闖入則朝廷付之委棄而不得措計豈不寒心今以犯罪奸

盜之入間或定配欲補死亡民數不亦踈乎本島自來女多男少而近經兵亂丁壯益少男子各娶十妻女人猶多寡居頃日守城禦寇者半是男服女人則於此可驗女人之倍多也古者兵荒蕩析之地率以生娶男女官給牛犢耕懇曠土使之樂業則繁庶殷富之效必收於十年之外若此長策史不絕書計今三邑各戶刷出女人之無夫者則其麗豈止數千而已哉域裏各道僧徒之丁壯者亦難枚數先抄四五百名入送派屬三邑各配無夫之女不揀寺刹村閭任便居住官給牛犢俾務耕農仍復終身除見敵守城外一切盡免差役嚴設禁防勿許任意過海隨抄各處僧人陸續入送安集如石則聞風赴募者必衆三邑可變為富庶矣本州穀貴牛罕官脩編給無由常送兵糧外種子牛犢別令措脩逐年入送使不匱乏右各件事宜皆急目前不可少緩亟命收議大臣永擇施行

劄箋表

辭免 實錄廳堂上劄

修史之職所以脩叙一代之事傳信萬世之後其任至重必須選廉潔之
賢具三長之才然後取舍當而是非公局有同寅人無異議矣苟或徒繫
虛銜靡效寸補費廩而無耻取譏而不恤非但獲罪於當時亦將貽責於
後世況望撰次之有序而刪定之得體乎臣素多虧玷不容公議中被擢
稟積有年紀猥荷 中宗大王過錄虛名累加叔叙然而儻接華便之外
未嘗爲文字之任恭遇 聖上嗣服不以無狀擢長秋官適丁史局之設
復忝都廳之列六卿旣非其據史職尤非所擬苦辭于總裁未獲其旨改
黽勉供事奄周寒暑臣唯思纂輯之殷庶輪埃補不悟叨冒之誚坐違官
謗彈論之發正中臣愆而又與病會沉奄累朔用是上辭至于再三不蒙
俞音兢悚罔措不知所以自處大抵庶職諸事官有大小任有條分小

授於大分揔於集以責其成貳亞之任惟務順承亦不廢事吏局之體大異於是各房元稿抄整成卷揔輸都廳其剛繁就簡衰少增多俾歸折中謂之合考過此以後不復校訂直令淨寫雖上有揔裁而稟定之事不出梗槩比事以觀任之輕重不辨可知顧臣何人敢辱此地居此地者若才力不逮望實不孚則雖無非議不可一日苟處況臣言才則短於襍線指咎則重於丘山就令強其不能享成于入當世不以為公後世不以為信以臣一入濫冒之故舉國乘而不重則其所關當如何哉況臣出身歷官四紀于茲動被論劾率閱旬月乃已日錄所載屢書不絕臣雖不校顯駁所閱文字殆為罪案則臣豈可苟然不避以率其事乎凡人當官處事器不相稱則無以報效內不自安則莫克展布雖卑官散職不可強其驅策以收其用臣之所帶者何職所理者何事而假分外之街冒皮裏之非敢為展布報效之地於其間哉況臣自早年脾胃內傷脚膝濕痺為緣久遠

田里得以放意調治少收痊可頃在甲辰差賀至赴京風寒所襲舊疾復作殆不可爲沿路擔舁僅得全還而且數年之間荐受簡任不遑休息病根痼痼自今年春左頭偏痛發作無時濕熱上攻眼目昏眩治冷則相熱瀉濕則損脾用藥相反見效無期雖本職閑慢尚不能堪況衙無虛日務有恒課于臣反覆思量決不可冒處廢事伏望聖慈諒臣不爲避事而喋喋憫臣實由難處而區區亟命解臣都廳之任以授能者則物情舉撫而史事有濟矣臣不勝殞越俟命之至

賀東宮箋

位尊貳極協贊皇猷幾炳群兇翊靖內變謳歌所屬抃蹈惟均恭惟偉量淵中英資天啓承顏服訓勤問宸於鷄鳴出宸重暉思繼明於南照豈意朋逆而起下陳危迫中宸賴神祇之陰庇罪正大戮肆市朝而快觀益延鴻休彌新景命伏念臣忝居藩守遙聞德音龍擊鯁岑雖阻趨於賀列星

拱鶴禁倍申悃於祝齡

賀嘉清表

壬寅年

三靈協佑克羣丕圖群逆伏辜昭示極法凡屬瞻聽悉同竦欣欽惟推化
在賜齊治冠古位正外內罔偏恩威之施教隆宮闈舉秩上下之叙何期
梟獍之惡近出騰御之微稔兇床帷致驚宸寢若網不漏已加無赦之誅
一作賊如日未虧詎改有截之仰一作黃道一作更幸實關於宗社慶復均於
通選伏念臣拘守藩維阻趨鵬列耳聆吉語喜無聞於海隅心輸愧肯
自後於中夏

書

答相公書

得聞

大監八洛師有日而重得寒病幾死復生今始舉頭無計趨候方坊恨歎

忽承辱問兼蒙五十甲盤之惠感慰萬萬來棲北營過數日當躬謝不宣伏惟下鑑狀上

答龔雲岡

八頁八回屢奉辱寄翰札備審辭旨繾綣不勝感佩小生隨分碌碌無非念庇之及所喻誌書小邦本彈丸黑痣之地郡縣歷歷可數其所建革故實不曾脩錄成書向者所錄不過縣採傳說事迹苟且塞命耳且科試錄每當取士之後各以試卷藏諸其家後生輩私相傳誦則有之矣亦未有哀錄作冊子者用是二書皆無刻本如有之豈敢秘惜屢屢譬曉耶小邦於中朝夕泰一家不應於此些少敢置嫌疑也伏乞原亮朴譯所傳墨蹟四幅誦玩不能釋手謹當為傳家之寶不揆鄙拙依韻酬奉千萬恕僭餘不備述惟希為時為道倍加保練只此不宣

與龔吳兩

詔使

出皇華集

江上一別不勝兒女之情還舍耿耿抵曉不寐追念陪從之久獎與之厚
此生罕逢戀德之深殆難為懷第把所留文章以慰懸岐經宿雅候如何
只隔帶水無緣更就候謁奈何生不得久淹於此即晚已脂回轄違阻益
甚尤增悵仰星槎勝覽謄寫元本還納昨日兩度示什通和並上龍津先
生執事餘惟行李倍練

奉違洩旬戀德之懷與日俱積伏想行旆已抵遼城未知淹駐幾日復脂
轡京之轄士龍謹將所留篇什沿路編次讐正訛舛方令淨寫俟數日完
了第慮謬誤尚多他日獲罪左右是懼勤政殿宴會圖殿下得啓即命
工畫就只以憑附湯站恐涉不敬另差司譯院判官朴菁華捧前去儻
蒙收納足見寡君向慕之誠也伏念更會杳隔天淵臨書悵悵不知所
裁惟希為時為道倍加保練

景福宮繕修膳錄序

中廟卽祚之三十有八年癸卯正月七日夜薨攸肆尊于東宮殿宇一空
上大加警懼凡所以修弭之策靡不究舉旣而以爲儲宮不可無所乃
命有司葺復其舊遂設造成都監置提調郎廳若干員辦理其務先購
東西兩江販賣材木又派定產材全羅忠清江原黃海等道俾各辦輸分
遣伐石官于興仁門外委西密官埏燒鍊瓦會日官以卽是年興役非吉
爲言命延差吉辰於乙巳將已購材料分置建春門內外其諸派定者
亦令隨運作塚於門外瓦石之就功者並置便隙之地逮甲辰 中廟實
天乙巳 仁廟繼陟國家多故未遑斯務丙午 國制密閣當恢廟宇存
舉祔禮故量取宿脩諸料移共營構之用於是都監之號亦隨以易丁未
還復舊號然以年斂停作者三載復差吉辰乃丁甲寅以興工尙遙 啓
請權罷都監只差監役官二員護視材瓦癸丑正月十日復設都監以右

議政臣尹漑爲都提調工曹判書臣尹思翼暨臣某爲提調內資寺正臣
鄭浚繕工監正臣李敬長爲都廳掌樂院僉正臣李希明工曹正郎臣洪
奉世刑曹正郎臣安瑋南部主簿臣白惟溫敦寧府叅奉臣申滋分視五
所之工軍資監主簿臣李德昌董伐石假監役臣申仲淹監爐冶臣鄭彥
懿掌雜物調發步兵四百名水軍七百名以助工役三月以旱災輟役八
月復役是年九月十三日夜大內煖閣失火便殿寢殿堂廡聯廊延
熾幾盡火達曙不熄百僚全集都人競聚奔走畢力莫之能救殿下方
御昌德宮震驚引咎若無容措詰朝政府六官詣闕上慰仍待不克救
煥之罪上猶自責已不敢諉諸人事而下詢所濟之方大臣以下
合辭對曰法宮祖宮所經營實迺詔布政之所安可委之灰燼之
餘以虧堂構之義乎上允可於是都監改稱景福宮繕修仍東宮造成
官僚增置監視人員以領議政沈連源爲都提調左贊成臣尹元衡吏曹

判書臣安珪工曹判書臣李名珪光平君臣金明胤吏曹叅判臣沈通源
爲提調軍器寺正臣白仁英尙衣院正臣柳潛濟用監正臣任鼎臣爲都
廳以役鉅定所幹爲八所內資寺僉正臣李希明工曹佐郎臣白惟溫掌
一所工曹正郎臣安瑋及禮賓寺判官臣尹健掌二所忠勳府經歷臣鄭
銖司果臣黃夢禎掌三所內膳寺僉正臣洪奉世豐儲倉主簿臣韓昌緒
掌四所中樞府經歷臣韓絢戰艦司別坐臣李懼掌五所平市署令臣權
習前司圍署別坐臣李恬掌六所訓鍊院習讀官臣朴鐵壽假監役臣趙
琇掌七所廣興倉守臣柳師琦豐儲倉副奉事臣申宏掌八所軍資監僉
正臣朴諫掌燒尾繕工監主簿臣安處貞監役官臣申仲淹掌爐冶軍資
監主簿臣李德昌掌鍊石監役官臣鄭彥豔掌雜物漢城府叅軍臣崔岵
掌車馬夫及丹艘先遣白惟溫于黃海平安等道安瑋于江原咸鏡等道
黃夢禎于清洪全羅等道朴麟壽于京畿左道李恬于右道搜鳩中用材

木復遣李恬于華岳山斡斫樑柱而江原咸鏡二道素補土瘠民稀又丁艱食隨例責辦恐傷民力俵給綿布二千二百十九疋江原居民二千二十疋于咸鏡居民其輸洩及流筏人力皆償綿布華岳山伐木軍匠亦給償布曳木僧徒另給米布俾除贏糧京役助工軍步兵四百水軍一千一百償役一千五百散廩輪役僧徒七百搃三千七百名分付既訖回諸項物料未集期以明年春夏之交興工東宮之役用元定事料仍督其功越甲寅正月十一日開基十八日安礎二月十三日豎舉柱樑六月二十一日告訖工繕修起役始于是年三月以初二日開礎五月初三日豎柱十一日上樑監官彈勸隸匠奮力朔甫七閱抵九月十一日諸役並完二十四日 賜都提調以下宴于明政殿庭 賜物賞階若職有差雜色匠手搃一千五百三十八名完役放回者輒 命作起供餽賞綿布有差臣連源等竊惟自古天下國家營建修葺之舉何代無之惟幸人君務節用而

重使民雖當力役民不知勞懽欣趨赴用底厥成蓋興役在所不已而使民亦有其道故也今我 殿下承 祖宗艱大之遺勵夙夜修省之實宜延休祐益鞏堂構而不意 法宮荐災以貽 惕慮此正 遭譴轉禍之機而 殿下彌篤畏天憂民之念凡所興發務盡講究財不傷費而民知所勸役不延時而功克用集雖事不可已而謹土功重民力之意實寓其中故民庶胥戒勞不知怨雖三代使民之道不是過矣且 殿下旣以警懼爲修弭之本矜恤爲勸來之要一遵 先代經始之制不爲今日尺寸之加茲當 享御之際恒念變異之不常修復之孔難罔敢居泰以易肆則豈徒災眚之不作將見盤石之固由此而益延於萬世矣臣等俱以無似濫脩管工之任雖不能仰贊 聖慮規畫之萬一恭與朝野樂道有成敢記顛末垂示于後

經國大典註解序

古今載籍之行世者必有註疏發明羽翼然後讀者不迷其宗旨而無所
疑難至若條章令式之書於句讀文義之釋尤致詳焉所以資其誦習而
便於奉行也歷代法書皆有講明之說如大明律疏議辨疑解頤即其一
也惟我國家自太祖太宗以降作述典章曰元典續典續集而各有
謄錄俾官更得以沿其門類而泝其源本不眩於施用其慮遠矣第編秩
浩穰卒難考閱且不免有牴牾混雜之患議者病焉逮至世祖大玉思
欲變而通之爰取元典等諸書刪繁就簡取捨悉當名曰經國大經至今
遵行然其遣辭措意惟務簡奧不顧人所難解夫既不通於其文則其齊
於用法無足恠矣庚戌春有言其須加註釋乃便於行者命設局於禮
曹使通禮院左通禮臣安瑋奉常寺正臣閔荃通抄大典內文字之過約
推行之最礙者若干條各係註其下而質正於判書臣士龍叅判臣沈通
源叅議臣李夢弼以脫初稿復就政府是正去就於領議政臣沈連源左

議政臣尚震右議政臣尹漑粹爲一卷於是疑者釋而眩者明庶幾祛前
日難解之惑矣遂繕寫粧縑而進 賜號經國大典註解仍 命臣士龍
序之臣竊惟自古有天下國家者恪守舊章而修其弊缺要以納民於軌
物也我 朝盛典作於 創業之初而述於 守成之世作之於前似無
待於必述而不得不述之於後則大典之書雖不待於註解而註解之作
其勢不容已也其作而述述而解實曰時損益之宜而衆互發揮之意寓
於其間何可少哉自是厥後當官者曰解而曉其文曰文而達其意措之
政事之際發諸號令之間莫不隨應曲當則斯不負註釋之意也

記

延安府學舍重創記

守宰之責其事有七而其間有先後緩急之序能知其序而急且先焉則
斯不負其責矣延在西海爲鉅府其館宇整脩視隣州無讓而夫子之廟

其制不稱殿堂庠廂垣墉仄狹師生所止僅庇寒暑且歲月既久夷圯亦多前後更于此者莫克新之嗚呼是可謂任守宰之責而知先後緩急之序乎嘉靖丁未鄭侯惟仁剖符以來祗謁先聖願瞻學舍慨然歎曰此豈吾責之可緩且後者哉卽謀改構而歲荐不稔越五年辛亥三月乃克始事地仍故卜材用新舊官隸是役而徵不及民諸生亦有出丁懽助者槩倣古制而宏敞實倍功旣告訖薦築以安靈設饗以落成大書朱子白鹿學規揭于堂楣使諸生式焉於是府人老少咸改觀相慶曰自有此學閱幾守宰與役于他者固不爲少而未嘗及此先時今侯之伯祖鄭公諱某始修學之南樓延人有祿又遭我侯未遑他務首事經始俱可謂知所先後矣矧我延人鮮有以文學顯者我侯之至選諸生之翹楚者官爲縉縻俾專其業又試其藝而獎掖之數年之間決科就仕者若干人矣其變陋鄉爲雅俗而有裨文明之化夫豈淺淺哉是宜記其顛末傳諸永久使繼

侯來者修侯之政而不替則庶斯廟之常新而斯績之不泯也遂相與走京師丐余文焉侯之伯祖卽余之先大夫也也侯以姪孫獲宰于延又能有此舉延之起廢殆有待於余之一家也故不敢以文拙爲辭樂道其事而歸之

跋

書活人署契軸後

題名有記尚矣郡邑有圖誌官曹有載籍悉書事跡人氏以爲後考韓昌黎藍田丞廳壁記司馬公諫院題名記卽其事也吾東方文獻無讓於中朝上自臺閣下至庶司脩錄前任人名氏及其遷除歲月翻案瞭然謂之先生案皆所以備文獻之徵謹遠忘之患也活人署有東西兩司衙門雖卑末職掌則實王政之大事然而數閑慢必以此爲首解字低仄吏隸尠罕不敢與諸司齒其於酬答公移僅得其格例及期會而已況敢脩故

實無失墜于乙未秋綾城具君渾爲東署別提性素恬雅樂此閑冗居五年恪勤供職補弊就完遂謀題名之事搜訪舊案謾無所徵僅得數十員名裒錄成卷起弘治辛酉至嘉靖丁酉其來去交遞之跡此他司之案益爲詳備一日以錄來示余求記題末余作而曰天下事有大小先後之序昧者苟具目前不及遠計故用心雖勞而事不訖緒惟智者爲能審輕重緩急之所在不責成於一朝而取信於後時以今觀之文簿期會之辨日計之細事也題名備實之成月計之有餘者也誠使居官任職者務日計之短而忽歲計之遠則吾未知孰賢孰否孰得孰失必有辨之者君又能一洗紕綺之習樂與賢士大夫游吾愛其人故爲書卷後云

書禦眠楮後

士之抱才器而未施於時者必遊戲於小說以寓其意覽者徒知滑稽於文而不究其指則何足以觀人乎醉隱先生有當世重名絕踰弱冠便捷

魁科可謂才且器矣不幸嬰疾屏居田里繼以甲子之禍遂絕意人世可謂未施於時矣將息之餘收拾村野戲談著為一錄揔八十有二款或附其意斷或只叙其事雖本於遊戲而勸戒之意實寓乎其中始自湖南流傳京師讀之者刮目解頤不覺擊節忘倦豈止禦睡魔而已哉噫使先生誅姦發潛於史局刻章論事於諫院其或揮翰玉堂倚馬戎幕濡染大筆以摘其華藻則奚事於是錄哉先生之才既不時施其所遺後者不過此毫芒然亦曰是可知有是具而不竟其用未必不為用人者之戒矣先生之季今都憲宋公獻叔謀印行以廣於世以跋囑余余不敢辭遂識梗槩如右云

箴

硯銘

體靜質礪者之用動弊銳退詭事之縱材與不材盍亦自重我食百年

不枯其供

祭文

祭宋壺山文

人生共世動要相求聲氣不同並有難謀繫我與公齒紀互齊公以畜升
我坐速擠晚塗附驥實非所期分署曹務庶酬鴻私有疑交質有趣同吟
造膝傾懷不諱言深共保百年矢不相遺孰謂一疾公遽至斯同寅之戚
公議之惜無容我私要當先國比丁憂旱連禱壇社余修相禮持齋所舍
奄閱旬朔長戒未鮮轎車已脂一慟而罷莫酒一爵躬展几筵詞以代臚
慟痛終天

祭叔母貞敬夫人礪山宋氏文

我祖泰資實有茂德毓慶四鳳仲氏挺特曰予佳子亦須良配贈予名容
以夫人對入門婉婉媚于舅姑宗黨迭嗟妯娌交愉逮夫子貴內治益仰

德爲時式我助豈少 恩紆誥花籍通天閣既大門顯又多子孫好合之
歡六旬有贏享有胡福世莫與京盛痛多虞權倖肆憾遽斥南裔莫自默
羅哭潤疚心以底況嬰竇殛稔盈 天鑑孔明盡室脩門相對如夢悉復
官封復爲時棟豈意不愁遽捐門館未亡之痛日抵憂慙頓卻醫藥竟至
奄忽揆之義烈足動存沒某夙遭失恃實丁未斂思深願育酬報盡闕老
成凋謝緒業莫續後生何依不能衛足締紉將攀祖載已翹薦薄致訣街
痛罔極嗚呼哀哉尚饗

祭舍弟安岳雲天文

念我 先德毓產惟八君序最季三歲時奪零丁保鞠以至成人志學綴
文肆筆意新竟未收功席任就仕五部郡符奏最不已伯氏之亡唯吾與
爾宜聚無捨形影相倚君緣嬰疾馬外圖便西海烟瘴反抵沉綿虞憑藥
扶告滿而旋儻經一考可冀團圓長至貞月惡耗自遐離渠失侶荆樹摧

花俯仰天地隻身曠依心火莫燭眼淚不晞旅櫬寓邸空寂無地只馮燕
評詁洩余思靈惟檐檐想君如在一爵屬前君胡不對

湖陰先生文集卷八

碑碣

有明朝鮮國資憲大夫戶曹判書兼同知成均館事安公神道碑銘
并序

惟安氏系出廣州遠有譜牒歷高麗入本朝有開城留後謚思簡公諱
省最顯于世寔公曾祖祖諱從生司憲監察贈吏曹叅判考諱彭老安
東判官贈兵曹判書妣權氏贈貞夫人福川君謚莊簡公諱愷之女
監察以下贈爵皆以公貴故公諱潤德字善卿生有異質及長篤意治
經窮日夜不懈中成化乙酉生員癸卯文科選補權知承文副正字朝議
以公深於經學宜令師諸生啓移成均由學諭陞至博士丁未以司錄
遷宗簿主簿弘治戊申拜正言明年移地官爲佐郎俄丁內憂服闋授兵
曹佐郎甲寅陞持平以舉職聞乙卯改刑曹正郎大臣會議疑獄問其願

未掌者不能荅公從旁對甚悉觀者咸器重之未幾移兵曹秋官難其代
請留特令因舊歷尚衣掌樂僉正簡入都堂爲檢詳擢重試陞舍人知製
教又兼史職戊午轉司鐸己未巡邊大臣薦公備幕移開局爲相禮尋
陞直提學庚申擢拜同副承旨壬戌特陞二品出按慶尚剴劇興學績用
茂著以刑曹叅判徵還充賀正于燕還歷戶刑二曹亞卿甲子建節畿甸
燕山政亂公坐忤旨謫配金堤正德丙寅中廟改王起公授漢城左尹
錄原從功階嘉靖丁卯復爲刑曹叅判移兵曹庚午倭奴寇齊浦殺鎮將
仍陷熊川城朝廷推舉公有將才陞秩資憲以知中樞充副元帥以行諸
軍擊倭大捷凱還奏功拜漢城判尹轉判刑曹乙亥命觀察平安道
大修檀君箕子祠構作成庫於文廟貯米若布權其子母俾供餽廩月聚
諸生課其所業加以賞罰其經承口講指畫者皆彬彬可觀丁丑引疾辭
以知中樞召還兼帶同知成均辛巳遷工曹判書帝遣太監金氣陳

浩興立 世子頌 誥命公承遠接之 命迎送江上義等服公才識涕
泣而別嘉靖癸未移判戶曹隨事綜密 上嘗臨朝嘉獎不已丙戌公年
至詣閣乞骸 上優教不許時年輩與公埒者高贊成荆山等凡七人公
擬洛社之會作契常置酒高會丁亥拜左叅贊辛卯又判工曹以病改知
中樞乙未卒于第公生天順丁丑至是年九月十四日易簀春秋七十有
九訃聞輟朝 賜賻祭有加用十一月二十七日莫于廣州靈長山思簡
公墓原從治命也公字量弘毅不喜奇禮而平居必整服端坐雖子弟未
嘗見隋容歷任中外文簿滿案奎章筆裁判初若不思卒皆就緒長於料敵
每邊報告警必咨於公動中事宜性又孝友遇忌日必悲慕潔誠以祭兄
弟早世恤其遺孀歸其孤女凡所經紀必與聲力夫人羅氏監察文緒之
女賢有法度先公卒生四男二女男長曰漢英弘文博士中丁卯文科次
漢雄宗簿主簿中丁卯進士皆夙逝次漢俊今爲海州牧使次漢彥今爲

江華府使女長適副正李瑛次適別坐鄭鉉側室有二女皆適宗室博士
生三女長適府使鄭世紹次適趙忭次適掌令李彥忱牧使生二女長適
許凝次適俞湓府使生二男汝敬汝恒公與吾先君同年生契分最篤兩
家子弟以父兄視之故公之二子以最跡問銘屬于士龍安可以不文辭
銘曰

國家興隆必有世臣宣力贊謨以翊休辰思簡宦著莊簡勲顯二姓之配
公象其善窮經取科始振英聲冠豸識疑最簡廷評大官務殷屏毗寄重
公實遍為動受褒寵人或歛手公刃乃恢用不盡才造物之猜引年乞閑
眷留彌篤高會繼洛足以儀俗矧有四鳳克業其家縣繼復始流慶必遐
孝思顯親圖永於聞有欲視德請考斯文

金君墓碣銘并序

金氏系出新羅敬順王著籍安東者尤大有證凡八 本朝終判校諱宗

孫司憲監察諱城官至部將監察以下皆 贈顯官部將君聘 贈領議
政許蓀之門成化壬辰生君君諱公亮字弼之生未浹旬失恃鞠於曾王
母及長沉默不好嬉自知讀書受業於宗室朱溪君君外舅許忠貞公琮
以德望伏一世嘗勸君仕君辭以志學忠貞抽春秋傳試之君應誦瀾翻
大被嘆賞君累屈鄉薦益自勵學成取科將有以爲適燕山政亂貶戮薦
紳人多罹禍君遂絕意世事杜門養疾親舊青紫競耀君以白衣處之夷
然也只以文酒自娛子侄及學子請益者因資材而訪進終日講解不以
寒暑廢輟君篤於孝友丁內喪務遵中制事後母備盡色養教督二弟皆
克就業每遇初度悲慕不已不爲世俗宴樂性任真不修邊幅應接之際
未嘗變初心嘉靖甲辰五月二十七日寢疾終于家春秋七旬有三男配
李氏光陽縣監彭穗之女理家有法度蠲蕝藻以尸祀膳酒羞以供賓使
君不虞窮約皆內贄也某年月日亦以疾終壽七十君之葬某年月日先

下驪州蛇洞之原至是配葬君凡三男一女男長曰浣次曰滌擢武科次曰澍魁己亥文科今爲弘文館校理以文行顯女適別提李埴浣娶僉使姜碩卿女生二男幾女男曰忠男孝男幼女適張仲悌餘幼滌娶朴養根女生一男曰仁男澍娶宗室鎮陽守漢女生二男一女曰順男正男官幼

銘曰

生也高華受也純淑學成行備志絕干祿象懸少微晦迹自藏推其所有屨滿門墻人所競驚我所背馳雖獲考終竟斬其施伯鸞德曜名不愧稱數室而通于後是徵

通政大夫敦寧府都正尹公墓碣銘并序

都正尹公卒既莫歲周且半都憲洪公暹累來速銘曰公之內子寔吾妹今就公塋龍石以埃敢以請士龍不得以不文辭謹按公諱珍字正中少服逢掖頗自厲業未究補司畜別提歷義禁都事平市直長遂陞叅職爲

引儀移司紙復以引儀兼漢城叅軍俄自翊贊授司評遷平市令忠翊都
事漢城判官仍改司議三為正郎秋官者一而水曹者再歷陞掌樂軍器
僉正宗親府典籤忠勲府經歷司贍司僕副正由內資正轉右通禮尋為
左特加通政階為敦寧都正兼五衛將乙巳二月二十三日寢疾終于
第距今生弘治戊午十一月二十四日春秋實四十有八內外皆勲貴世
家考即貞顯王后弟也公早失怙恃受自內撫育之恩及長謙謹
簡約筮仕二十餘年官愈顯而志愈下久帶內乘進退未嘗愆度公退輒
屏人清座蕭然若無官者中廟推表弟之親眷公終始不衰而不私
以大官公亦小心罔忤卒保富貴世所僅見也鼻祖莘達佐高麗興運為
元功世聯簪組遠益以大曰瓘曰彥頤最為聞人入本朝諱坤錄勲開
國封坡平君諱三山僉知中樞贈領議政諱壕擢科歷任累命官至右
議政篤生貞顯王后若公考諱湯老叅靖國功官至判中樞封坡川君

妣李氏勲戚雲山君誠之女封貞敬夫人公初配金氏叅判克愷之女先
歿無嗣繼配洪氏今領中樞洪公彥弼之女生二男二女男長裕昆娶水
原府使李希孫女次幼女長適韓景祥次幼公所藏兆卜龍仁縣東某山
某原用治命也銘曰

族姓之盛與國配美后嬪儲選古補尹氏吾東母國德可指歷塗莘餘慶
世多賢戚公居其一痛洗驕靡通籍禁閨不爽趨履宦進思急恩加念
溢謙能受福保終罔失惟不永年歸成後嗣于前有裕遠猶復始伐石徵
詞遺孀寔賴歆觀公蹟益於吾最

嘉義大夫禮曹叅判兼五衛都摠府副摠管姜公神道碑銘并序

世補氏族之大著于譜牒顯于勲閥者咸歸晉陽姜氏而他姓之盛莫或
與之埒焉有諱著丁麗季仕至商議門下贊成事諱准仲工曹叅判諱安
福刑曹正郎贈刑曹叅判諱利行贈吏曹判書正郎以降皆以公貴

追加顯秩判書娶 贈領議政許蓀之女媳德儷美克有令子公諱徵子
彥深生于成化丙戌聰穎絕人自知讀書外舅許忠貞公琮見而奇之引
與子弟同加誨進雖公天賦自高而學識精詣實賴忠貞師模之懿年南
弱冠中司馬爲上舍生在儕流中每首課作聲聞益蔚甲寅夏釋褐初屬
承文院權知選入藝文館爲檢閱館閣諸公皆爲延譽轉待教又遷弘文
館著作歷陞博士副修撰修撰副校理校理國制選文學儒臣月課所製
以獎其尤公五居異等進二階陞副應教公凡在 經幄八年每當講讀
語暢思切左右無不聳聽忠清道有妖僧自以能治人手足之痺誑惑愚
民遠遁奔波邀致恐後或有醜語公受命往鞠逆候其情盡得爲姦卽斷
其獄時論快之還授司憲府掌令未幾超拜直提學仍擢副提學旋移承
政院同副承旨轉右副 特加二品階進左副時燕山主淫虐日甚貶戮
諫臣追咎公諫打圍竄配樂安郡明年又據嘗䟽論移創寺刹逮繫于獄

罪且不測會 中廟改玉得被釋衆原從功即授江原道觀察使民經暴
苛逋亡殆盡公罄力撫集及苾遷同知中樞府事充 聖節使朝燕趨履
班行動不愆禮華人服其醞籍逮還爲養乞外補全州府尹勤簡爲理又
修學政勸掖不怠考滿內授樞府遷禮曹衆判兼帶副揔管 中廟嘗摘
香山九老及洛中耆英先賢繪爲屏障令申公用漑跋其尾 命公寓諸
老名爵暨所著詩文弘文館上明道箴又 命公寫進公筆法素道媚名
擅一時 上嘉賞不已 眷賜襦沓俄丁外艱免恤授同知中樞兼副揔
管辛巳今 皇帝嗣極遣翰林院修撰唐舉兵科給事中史道等頒 詔
朝議以爲二使之還贊美我國文物中朝人士若遇使臣必與商論選使
不可不慎時公已差尊號使特改進 賀以行及到京師 皇帝將視學
薦紳咸拭目以待公投章禮部請預觀盛禮郎舍見公詞理書迹嘆其兼
美令別寫一本以供私翫尚書亦加歎服特具 奏勅許隨文官四品之

列前所未有也及復完命上引見問其顛末極賜獎美特授守
知中樞府事仍出補慶州府尹操簡修學之政做全府而有加遞授僉樞
又陞知樞轉禮曹叅判乙未公引年請老上慰解不允居一年公寢疾
卒于第春秋七十有一訃聞輟朝二日賜賻與祭給丁營葬皆異數
也公姿性端雅操履典重常以翰墨自娛又無一日去書不觀雖燕處心
儼然端坐語笑不苟子弟質以所學始與怡顏開釋而言不及私至於接
人一以寬簡雖廝役有過亦不加怒平生自奉甚薄口不道溫飽之事每
警人必曰耻惡衣惡食學者之大戒也見紛華若將脫務簡素如嗜飲人
有以公允處閑慢為言荅曰直患不能塞職二品之官吾已溢矣復何加
焉晚年就屏處葺小齋旁蒔花竹逍遙杖屨於其間了不與人事相嬰素
善為詩老年所作尤有思致公配鄭氏烏川望冑諱湄之女賢有法度先
公歿凡生五男長曰僖新昌縣監次曰儀積城縣監次曰億王子師傳

次曰嚴東郎校尉次曰偉兵曹佐郎側室有二男二女曰俊曰任僖娶金鳳瑞之女無嗣取弟之子應瑞爲後僖娶府使權世衡之女生二男二女曰夢瑞應瑞夢瑞進士女長適具潤德億娶判官柳應臺之女生三男二女男長曰命瑞餘幼儼娶縣監金孝胤之女生二男二女男長曰昌瑞餘幼偉娶監察辛壽堅之女生二男一女皆幼余以童穉贅文辱公稱賞先祖考姓繫之刻實公筆迹於其請銘豈以文拙敢虛報知銘曰

姜自晉出啓慶太傅蕩掃遼氛以紓國步遙遙緒業贊成恢之四傳有公丕振羽儀盛之王堂動自論思密勿中臺旬宣外寄舉有績效簡其勞勩宜長卿曹俾陪國論晚貳春省豈乏推輓園闕迂叟樽開靖節我持恬默與世用拙竟不滿德乃裕于嗣百世祚孝其尚不遺我銘終始惟後之遺

貞敬夫人尹氏墓誌銘并序

尹氏之顯自前朝始直進賢館諱登監察持平諱湜其元也奉教諱自堅

進士諱深松永縣監諱伯洵俱著宦牒松永之配韓氏義益庫使可久之
女成化乙酉生夫人夫人生長法家歸于某諱某媚于舅姑睦于妯娌雖
家業清素力爲經紀未嘗告乏及君筮仕食祿賙急憫恤宗姻交譽君終
于縣任夫人奉柩而還率諸孤廬于墓側手具羞饌朝夕哭奠服除廟祀
益謹遇時物必先薦戊戌以仲子旣之貴封貞夫人乙巳加封貞敬夫人
以高年仍受月致世所僅見夫人性柔謹有法度叙族以厚御下以恩子
孫式其儉隣里懷其惠仲子旣以聞聖服一世官至宗伯勲錄衛社天人
義方之效居多壽至八袞有三嘉靖丙午八月初八日考終于正寢凡生
三男三女男長曰澮慶安察訪次曰旣即判書次曰湧典洎別坐女長適
俞三壽次適察訪鄭公清次適宗室文城副正湘察訪娶文應奎之女無
子判書娶宗室永春君仁之女生一男一女男曰棐女適幼學金悌甲側
室子曰枝別坐娶縣令金潭之女生二女長適義禁府經歷曹益卿側室

有男曰葉曰葉俞三壽之男曰亮女適進士延光遂鄭公清之女適進士
慶遇文城無子內外曾孫若干人夫人用是年十月初一日開驪州贊成
塋城配葬禮也判書公與余契分素篤故來問銘銘曰東韓氏族軼盛中
華卿相茂績婦德亦嘉懿哉夫人寔居其一擇對名門夙著宜室毓慶蘭
玉藪爲時棟策勲貤封泉壤隨動未究含飴萱花忽瘁痛纏風水孝思靡
逮驪原儲祉雙劍會淵文愧張林德維永傳

通訓大夫行長湍都護府使李君墓誌銘并序

遁村之後四傳至諱克堅官至左通禮有子曰攀字士龍蚤着縫掖以器
業稱中司馬累舉見絀乃就保任北部叅奉豐儲廣興奉事長興直長漢
城叅軍宗簿主簿司憲監察工曹刑曹佐郎萬頃縣令漢城判官沃川淳
昌郡守司饗僉正長湍府使此其平生履歷也君小心蒞官課最常優與
人文無表襮自筮仕未由卑至通堅持一律未嘗變世用是多之君生天

順庚辰終嘉靖甲午春秋七旬有五妣洪氏南城君錫之女也君初配宋氏忠義衛希烈之女生一男曰英符擢丙子科官至掌令繼配李氏監察昌源之女生一女適司饗直長尹綸側出曰業終掌令娶義盈庫令李孝完之女生三男一女男長曰首慶獻納次曰重慶生員次曰復慶女適生員李磁業終之出曰熙慶成慶獻納以余有孔李之分圖壽先跡速銘不已敢不諾于君世系之序於掌令誌叙已詳可互考也銘曰
仕亞九卿壽登七袞歸成于後舉盡繼述惟積悃幅責報不虧有歆考德
盡徵吾辭

貞夫人金氏墓誌銘 並序

夫人系出尚州有諱先致仕麗季從伯兄元帥得培破紅賊有功封洛城君諱鉉官至檢校漢城判尹諱尚保官至繕工副正諱淑貞攝中軍司諱慶門司憲監察寔生忠佐副司直壽延聘于密陽府使鄭蘭茂之門成化

癸未生夫人夫人蚤失怙恃及笄歸于叅贊丁公玉亭性貞固有執媚于舅姑順于夫子待妯娌以和御婢僕以恩閨閤之內肅然如朝廷叅贊以清白傳家門無私謁自釋褐至通顯刑家履公恪守一律又克承歡具慶色養脩極舉皆爲薦紳所式夫人之助居多夫人生不逮養父母爲憾凡所以娛悅舅姑者無不用極姑夫人在堂常稱吾婦篤孝以厲子孫及棄養夫人屬疾已久轉加驚憂尋亦不起痛哉享年僅五十有九孤應斗卜壬寅二月二十二日奉柩禮窆于高陽郡土堂里與先塋同麓異原夫人元產一女一男男即應斗登甲午科爲吏曹正郎方以文行見重女適叅奉閔蘭馨生子女幾人男長曰哲命正郎亦有子女若干皆幼夫人於余有重從之分知行範爲詳故使來速銘謀納壙道敢不諾乎銘曰

麗錄告訖強寇壓疆帥勇掃孽功在旂常季實贊籌啓封于洛縣延厥諸遠未艾澤夫人之生寔毓祥慶歸于聞人克專內政裨多于主德爲世儀

教成于嗣器爲時須不逮所生移孝舅姑過感折壽古不多見拳拳孝子
最迹于竈生有效養歿有從兆百歲視德請徵

折衝將軍龍驤衛大護軍尹公墓碣銘并序

公諱元弼字隣哉國舅破山府院君諱之任第三子也尹氏自出及鼻祖
莘達以下高曾祖官勲行蹟俱載先府君神道碑妣李氏觀察使德崇之
女公少業文甚力屢試見絀任補司圃別提轉敦寧直長北部宗簿主簿
又轉掌苑出補金城縣令丁內憂服闋授右衛率歷宗廟令贊儀司議
軍資僉正開城經歷考滿遷司膳僉正廣興守繕工禮賓司僕副正敦寧
尚衣正今上卽祚錄扈駕功寮原從一等陞折衝將軍龍驤衛大護
軍兼內乘履職三年邁疾終于第春秋五十有二是年五月初九日寔于
交河昆洞之原公性恬雅簡素常以門戶盛滿爲懼接人供職務盡謙謹
世以是多之訃聞上與慈宮推篤舅聯倫之義軫悼有加賻錫特

優慈宮至親製奠文遣官致祭實異數也公既自致貴顯復以諸子錄
功之恩追贈嘉善大夫戶曹叅判兼同知義禁府事公娶某郡鄭氏
縣令績之女與公媿德克肥厥家生三男長曰綸造紙署司紙次緯刑曹
正郎李曰繪禁火司別提綸娶府使李攀女生三男二女男曰慶福慶祿
慶祐女長適李公訥次在室緯娶同知成慄女生二男一女男曰士英士
俊女幼繪娶生員李公毅女生一男曰應靈公與余爲鄰好而緯曾有僚
契故以銘事見屬銘曰
敬寔德輿謙迺福基公有其全獨壽之虧此理之反善者感焉我最其蹟
庶永於傳

中直大夫伊川縣監李侯墓碣銘并序

侯系自出大唐鼻祖李茂從蘓定方伐百濟署職卽將百濟旣滅茂獨留
不去著籍延安延之有李氏寔自茲始麗李有諱係孫叙外舅甥於李益

齊之門位至尚書諱耒丁 贈議政府左贊成諱淑璜官至成均館直講
諱亨禮官至甲山教授聘洪自亨之門侯於諸子序居第幾諱某字某幼
便穎異志學不懈侯考之從有諱世範官至修撰侯出後其家爲別宗既
長益自刻勵能績其文不墜家聲而有負不諧竟中司馬入大學爲上舍
生所詣益進以行範服膺流累舉見屈不屑晚暮自處裕如資性峻潔而
接物常和省己詳備而責人常略事所後毋至誠無忤動得歡心侯於族
黨不間親疎待之如一近之爲造訪者遠之爲旅食者必聚館而致餼以
故歲入頗饒恒告匱乏群從中有非命遇害者侯發憤不食訴官直寃乃
已或有以非理來加者亦不與較人有言侯橫費常多不顧經紀者侯答
曰親屬與我俱分於一人之身窮不自給者吾寧與之同飢飽然後吾心
安焉吾豈爲名乎其他賙急恤賻雖鄰比游從莫不施及當路者高侯修
飭薦接儀仗庫郎廳用久次陞濟用監主簿遷宗簿又移長司畜造紙皆

以閑局優之也及出守伊川侯屬疾纔間親舊咸謂山縣務簡便於將恩
迄侯上任以爲雖病不可尸廩視衙不廢左右苦止之不聽竟以是轉革
不起侯可謂篤實無華者矣侯生于正德丁未終于嘉靖丙午春秋實七
旬越明年二月丙午反窆于楊州天磨山丁向之原與閔氏同城異塋侯
凡二娶初配卽閔氏驪州大姓司果琛之女生二男一女男長曰友閔捷
某年科爲弘文館典翰方以文行顯次曰師閔力學爲儒女適宋檢繼室
以朴氏內禁衛旅之女生三男一女男曰希閔好閔尚閔皆幼典翰娶某
官某之女生一女幼師閔娶某之女生二女皆幼宋檢暨室皆先公逝有
一子曰延福余之王母與侯先世實同出而分源有通家之義故侯之孤
以銘事見屬銘曰

李爲華產派別東海根繫鹽州譜牒斯在世有聞人茂著閔閔侯承故家
力耕以舌雖表賢閔反紬策名晚塗卽仕亦非身營惟不自暇閑劇一到

李寄周邑豈曰不事范氏義莊張家疏忍足以無愧侯所自盡秀鐘五常
白眉之良尚亦嗣慶彌遠彌昌

贈吏曹叅判沈公神道碑銘 并序

同寅沈公光彥撰次先府君歷官行蹟爲一通又錄世葬墓山爲一圖來
屬余曰光彥將樹石先兆子其文之余辭拙不獲謹按譜牒沈系自出青
松侍中青城伯德符以降世聯軒紱遠益以昌有諱澄諱石雋俱顯仕諱
璿官至京畿觀察使寔生慶尚右道鄭度使諱安仁聘坡原尉尹評之門
公其季子也公諱某字某自幼志學不懈竟中進士陞上舍有名旣而席
蔭就吏初授顯陵叅奉累轉至叅職歷主簿監察判官右遷掌隸院司
議判曹正郎軍器寺僉正出補安城郡守清慎蒞職吏民交慕之考未滿
數日卒于官雷封之內若悲親戚公配徐氏大司成崗之女理家有義方
爲門黨所式自公之亡蓬首不理又爲寫公真朝夕必奠朔望墓卒以

毀瘠折壽公之算終四紀而夫人僅贏一年孰勸爲善痛哉初鄧度公卜
廣州治之南某山某原而窆夫人某氏祔焉自是山之上下旁支類槩並
封纍然相向者皆其子孫也公之藏亦就下麓而夫人隨配焉公凡產三
男女亦如之男長曰光門進士安岳郡守次曰光庭宣陵叅奉次卽光
彥魁乙酉文科今爲吏曹叅判嘗以其貴追贈公如其官妣封貞夫人
女長適宗室道安正轍次適崔秀彥次適監役李揜郡守初配具氏綾川
君壽永之女繼配李氏宗室鎮江正某之女皆無嗣取叅判子鎬爲後叅
奉娶宗室蛇山君某之女生一男曰鏡造紙署別坐叅判娶判決事趙邦
楨之女生四男一女男長曰鉉典牲叅奉次卽鎬次曰鍊西部叅奉次曰
錦女適典設司別坐朴胤韓道安生一男曰壽甲文川正崔秀彥生一女
適司評許淨李揜生三女長適李姬顛次適叅奉禹治洪次適校理鄭宗
榮内外曾高孫男女揜若干人銘曰

青鳬之望世配國休蘭玉振振動接貴游公聯尺五痛洗紉綺媚學射策
不諧卽仕止佩郡符不克大施返真宿卜以慰綏思擁有環朝以固其宅
祖孫相望附列窀穸泉下追陪樂亦不隔公惟不食於後報責錫同兒做
並亞天曹榮貴流峙若增深高于何考德有載貞珉尚亦無隳以式後人

通訓大夫軍資監正趙君墓碣銘

并序

君諱某字某系出林川鼻祖諱天赫顯于高麗其後七傳而至諱嵩珍成
均生員諱瑤通禮門奉禮郎寔生諱元卿仕至成均司藝娶護軍申仁老
之女君生而警悟力學不懈乙卯中司馬擢甲子科選補承文院權知序
轉副正字正字著作由博士陞成均典籍以通曉華語吏文提調請由還
授本院校檢後雖遷叙司紙中樞都事司醢令司膳奉常軍器僉正軍資
奉常副正禮賓濟用司饗繕工司宰內膳軍資正常兼帶承文之號再隨
朝燕之使質正華語中廟嘗御便殿命君與崔世琮用華語論辨

王伯問對無礙 特加一階以獎之君性勤敏歷長六監俱以秩滿替換
務所當急弊所當祛者必釐革乃已雖涉於權豪略不撓止世用是多之
平君律身接物不事表襮又篤友愛伯兄在公州事之如親衣食缺乏者
減已奉以遺饋問不絕妹之女在文義未行窮不辨裝爲致于家備物而
嫁之教子弟有法文武之才各盡其器四子皆以科第顯至於諱言人過
失行不由中道其天性然也及屬疾家人謁醫治藥拒之甚堅仍嘆曰吾
筮仕四紀未嘗譴罷官至九卿顧不爲卑況四子擢科年紀踰七望八揣
分已溢餌藥苟存更何所須諸子環泣而強之竟不許君可謂篤信達命
者矣君生于成化甲午終于嘉靖丁未春秋七十有四君配驪興閔氏大
司憲暉之女賢而婉德理家有法度先君七年而歿凡生五男二女男長
曰應謙成均典籍次曰應純訓錄副正次曰應泰刑曹佐郎次曰應忱宣
傳官次曰應寬志學未就而夭女長適別坐尹謙次適監察尹懷貞應謙

娶忠義衛尹壘之女無嗣應純娶宗室風茂令之女生一男四女男曰瑛
女皆幼應恭娶忠義閔世卿之女生三男二女男長曰璋餘皆幼應忱娶
將仕郎李世霖之女生二男男長曰璋餘幼應寬娶惠民署訓導郭純仁
之女無後別坐生二女長適正言韓智源次適幼學金銑監察生二男三
女男長曰淑次曰澍進士女長適幼學鄭雲次適生員申華國次適學生
李潤德內外孫及曾孫四十餘人余於君雖年輩不倫實有忘年之分故
君之諸子以銘事見屬銘曰

稟自天厚守約於身用舍在命吾奈何人雖畜于時克裕于後福謙俾壽
造物之厚孰罔是理取速而躋我銘釘之以詔昧稚

通訓大夫三和縣令金君墓碣銘

并序

高麗侍中金就礪系出彥陽以武功大顯于世其後至諱素仕至黃海道
觀察使諱仲行司憲監察諱效震順安縣令寔娶判漢城李思任之女某

元某甲生君君以保任就仕初補禮賓叅奉歷廣興主簿司憲監察出補
三和縣令竟邁疾卒于官春秋六旬有七窆于楊州神穴里之原迺嘉靖
乙酉某月日也君性簡約勤謹爲官所至以能收最待人叙族以忠愛爲
本故人亦莫敢以非理相干君配姜氏 贈叅判利續之女與君無忤克
立門戶後君二十三年丁未考終享壽八十三附葬于君君凡五男四女
男長曰仁叔司直娶縣令韓士信之女生三女次曰義叔監察娶監察裴
琳之女生四男一女次曰禮叔娶宗室玉溪正賢童之女生三女次曰智
叔義禁都事娶宗室莞城君貴丁之女生一男二女次曰信叔娶閔世龍
之女生三女女長適金漢仁次適水軍節度使權彬次適別坐呂世平次
適朴忠佐余於君之子昆仲雅有髻稚之分故以銘事見屬銘曰
宦得令長數未室也壽邁古稀生未折也多男業家五福幾備詞以發美
惟後之詒

懷德將軍行訓鍊院副正尹君墓碣銘并序

尹氏譜出茂松鼻祖諱登仕麓李官至進賢館直提學其裔諱深成均生員諱自堅藝文館奉教諱伯涓松永縣監寔娶義盈庫使諱可久之女君生於成化戊子君諱祥孫字子蕃少失怙恃初服縫掖蒞于媚學旋改業學射以勇力從北征有勞擢屬禁衛又擢甲子武科逮中廟改玉出補北鄙萬戶守斜丁堡考滿授訓鍊習讀選補宣傳官既君履歷外授則明川縣監吉州判官全羅虞候甫乙下僉使琺島泰安平海郡守內叙則尚衣訓鍊主簿禮賓訓鍊判官都摠都事司醢令司贍內贍司宰禮賓軍資訓鍊僉正五為都摠經歷又歷中樞經歷及陞訓鍊副正七年不遷竟以是終迺嘉靖戊申八月某日得年八旬有一食祿四十五年君於是乎可謂無憾矣君性原厚理官接人不修邊幅雖無表表可稱人以長者推之君配李氏平昌著姓三山之女正德辛巳先君歿享年四十九君宿卜陰

竹縣石串山之麓李氏之藏同域異兆君葬歿之年十月初八日李氏寧歿之年八月十一日君有二男長曰冲有至性善居喪蚤死李曰瀚阿郎浦萬戶庶產曰澧冲娶忠義衛柳起宗之女生一女幼瀚娶忠義衛李叔瓊之女生四男曰璵璣璋璜余之牧洪陽君守泰安比壤公牒實有游從之舊君之表甥判禮曹尹公慨於余亦有契分之篤克最君迹來屬銘義安可辭銘曰

位高卒顛得不償失祿隱考終是謂天佚折彼較此君有其全我辭孔諒廣永其傳

通政大夫承政院右副承旨兼

經筵叅贊官春秋館修撰官金公

墓碣銘

并序

亡友金公伯醇氏卒且踰練其孤幾以狀抵余求最先述以表墓道余不忍辭謝乃次其系歷而復之謹案公自出着籍威城鼻祖諱英庇官至檢

校漢城尹寔生襄靖公諱宇錄勲佐命封熙川君諱有智襲封熙川諱仁
門新昌縣監諱聰結城縣監聘德源府使李薈之門弘治甲寅生公自在
髫齡穎秀不群不煩勸掖學問日就年未弱冠既失怙恃又丁王母憂克
舉三喪葬祭莫不以禮由上舍生釋褐補承文院正子選入藝文館爲檢
閱陞待教以事西叙淹滯三年乃授咸鏡評事佐戎幕以機敏補入爲禮
曹佐郎俄除慶尚都事及瓜內授工曹正郎兼滯春秋遷戶曹正郎又滯
校書校理水原府降號爲郡革省貳官事務叢萃朝議舉公爲郡守剖決
積滯警聞藹然公自爲諸生治經頌精大爲學官所重會有建議選師儒
者公首被其選還授成均司藝陞司成又陞司導正轉司僕正平安一路
接連邊鄙程驛之管必選清望以補公用是出爲大同察訪釐革宿弊郵
人稱便麟山鎮控夾江民人交通皆貿之路公復膺僉舉擢加折衝階爲
僉使禁令簡肅姦民頓戢公操備之暇聚邊民子弟媚學者教以經史頗

有彬彬可觀者居且五考義州郎制有缺轉拜牧使接華備虜民事又劇
爲一道樞割之地公罄力應接隨事辦治公餘輒迂賓僚較射賦詩歡飲
達朝未嘗告疲公自大同三轉爲州首尾六年宜起貿滯玉関之嘆而反
厲馬革裹尸之志竟任滿徵還卽拜同副承旨進右副公久在西塞患
左臂瘡痛及是轉劇請解任屢賜告調治不效仍假散秩就醫越明年
戊申歲朝竟不起春秋實五十有五用是年二月癸酉寔于楊州西山先
塋之域公初配閔氏承旨懌之女無後繼室邊氏宣傳官夢程之女生一
男二女男曰戡戡出有二子曰戡曰戡戡娶宗室海安君晞女女長適李
義老次適申瀛余於公同事非一遭推分又篤敢辭屬銘銘曰
在昔文武任搃一身岐而爲二故少全人公由文事試展武畧禁中頗牧
不數衛霍公克似之無適不宜終釋左符入典喉司萬里收功方屬外寄
生若有爲奪之何亟其畜不食以裕于後我銘不爽用質悠久

折衝將軍守慶尚右道兵馬節度使金公墓碣銘

并序

公諱軼字子中系出德水生而瓌偉戲嬉異凡兒年甫弱冠便學便馬射
疏藝聞絕人遂屬禁旅為內禁衛癸未中廟幸學取文武士公即魁虎
榜內叙者凡十一通禮院引儀司憲府監察司養軍資內膳主簿漢城判
官都摠經歷平市令尚衣僉正繕工副正內膳正外叙者九明川縣監寧
邊競城判官平壤庾尹昌城府使由內膳正進階通政鍾城府使慶尚右
道水軍節度使又轉兵馬節度使黃州牧使西叙者六再為僉樞四為護
軍兼將五衛者三羽林者一公性通儻綜悉當官處事酬答如流動不煩
人事皆辨治其尹平壤恢條好施吏民賓旅俱得懽心及除南帥惠愛平
伍精利器械臨機料敵出人意表屹然為一方長城逮赴黃州馬跌隊傷
以護軍徵還居數月疾復劇竟不起公生于弘治癸丑十一月卒于嘉靖
丁未正月春秋五十有五是年三月禮窆于豐德食站癸坐丁向之原曾

祖諱泥高靈縣監 贈某官祖諱梓副司直 贈戶曹叅議考諱壽胤近

安教授 贈兵曹叅判妣尹氏僉正海之女 贈貞夫人皆以公貴故也

公初配安氏忠順衛處順之女繼配朴氏某官世貞之女皆無嗣遺命以

兄子禮宗爲後余與公有殊分故來問銘銘曰

生之既艱稟之亦厚發軔期門累佩郡綬動收異效任專閫首機畧所展
坐制戎醜餘事賓筵歌壺置酒萬里收功而遽折壽造物憤憤誰任其咎
蓋最行蹟用質悠久

贈大匡輔國崇祿大夫議政府領議政兼領 經筵弘文館藝文

館春秋館觀象監事錦城府院君朴公神道碑銘 并序

惟朴氏遠有譜牒按高麗直右文館諱尚衷以抗疏言大計賈禍而名益
重寔生諱嘗佐我 太宗致位議政錄勲佐命封錦川府院君謚平度諱
董錄動佐翼封錦川君謚世襄諱耜仕至軍器寺正仍世席蔭顯則已致

事正歷秋冬二曹郎署擢貳栢府爲中丞又牧忠州所至有稱配成氏永
春縣監孝源之女昌寧府院君士達之世也公初諱壕字仲保後避時宰
改名墉寺正有四子公序居二自幼力學不懈中乙卯司馬雅善松雪書
大爲流輩所推累舉不諧遂從保任初授典設司別提轉義禁府都事陞
掌苑署掌苑由工曹佐郎出補洪州判官任滿入爲軍器寺判官自是內
叙者六曰忠翊府都事漢城府判官繕工監判官內膳寺主簿司畜署司
畜外叙者二曰蔚珍縣令殷栗縣監公初娶僉知中樞府事金瑒之女無
嗣繼室金氏司宰監副正益謚之女嘗夢有神人授珠之異感而有娠篤
生聖女郎恭懿王大妃也公在殷栗邑人夢公挾少女攀龍胡升天
未幾中廟爲儲宮妙選叔德遂膺六禮之聘公亦用是右授宗親府典
籤尋陞敦寧府副正公素患腫脹至是轉革特命超拜折衝將軍僉知
中樞府事兩宮醫問絡繹於第竟不起公生于成化戊子終于嘉靖甲

申春秋五十有七 賻錫之典比例有加 追贈大匡輔國崇祿大夫議
政府右議政兼領 經筵事監春秋館事是年九月初六日禮寔于楊州
天寶山北麓乙未以始卜不審山多壓忌改卜南麓艮坐坤向之原徙營
兆域實十二月二十八日甲寅也乙巳 榮靖大王嗣位加 贈公領議
政錦城府院君公器字宏厚不妄言笑與官者事動驪人意積慶鍾 女
身為 儲舅宜享丕祉貴未踰月遽至奄忽理數之戾世皆惑焉公配封
聞韶府夫人性和厚無忌理家亦睦僕妾感其恩宗姻懷其惠閨闈之內
無不得其懽心庚戌夫人疾篤 王大妃躬幸候問病已不可為矣竟以
是終六月二十七日也享年僅周一甲就公兆配葬焉公素無嫡嗣取伯
兄坡州牧使基之次子諫為後嘗為軍資監判官側室有二男一女男長
曰春丁屬忠賢衛次曰評屬族親衛女適銀城副令鏘判官娶春川府使
成詢之女生二男三女男長曰浚娶柳光植之女餘幼女皆未行春丁生

二男曰深曰渭銀城生一男六女男曰宜山監城女長適內禁衛金彥誠
餘幼諫推宿契謂余曰子知先子熟鼓屬銘銘曰

寶系衍瓠派別潘南遙緒攸屬秀動朝簪眼高咏勁畫言危邦策屈道直
九死靡降歸成兒做甥我興王秩登端揆功載旂常繼繼官封施及公
身四命躋公豈曰因人實生盛德毋儀一國宜羨五福壽反居齋寔果
何尤造物之憤托嗣有人足慰冥昧蔚彼寶麓穹碑巋然是謂公藏過者
式焉

崇政大夫議政府左贊成丁公墓誌銘

并序

丁氏之先系出羅州有諱允宗官至檢校大將軍其後八傳而至諱安景
徙家白州仍著籍爲州人諱衍諱子伋並以修善傳家子伋擢文科終昭
格署令寔生諱壽岡早以才望備歷清要以兵曹叅判馬閑考終恬默者
德爲世所服聘于司憲持平金彥辛之門成化丙午生公公諱玉享字嘉

仲自幼聰穎絕人家教所掖學問日就擢癸酉科初屬承文院爲副正字
選補藝文館檢閱陞承政院注書弘文館修撰爲佐郎正郎者各二曰吏
兵兩曹再爲司諫院獻納三爲司憲府持平四爲弘文校理遷議政府檢
詳轉舍人侍講院弼善弘文館應教司憲府掌令執義司諫院司諫掌樂
院正復入弘文館爲典翰直提學仍擢拜副提學移承政院左副承旨俄
陞右承旨丁內艱服闋拜兵曹叅知兩爲吏曹叅議成均館大司成荐入
政院爲左承旨進都承旨逾年上不豫公以內醫調提侍疾有勞特
加善善西叙又兼帶義禁同知尋拜掌隸院判決事司憲府大司憲司
諫院大司諫出按忠清金羅兩道並還授同知中樞遷敦寧都正兵曹叅
判丙申皇子生充進賀使授同知中樞以行還拜漢城右尹轉吏禮兩
曹叅判俄出按京畿遞拜同知中樞移兵曹叅判未半歲起加資憲拜工
曹判書議政府右叅贊皆特命也遷刑曹判書大司憲右叅贊禮曹判

書左叅贊兼帶知經筵未幾丁外憂制除起授知敦寧府事禮兵兩曹判書引疾乞閑授知中樞復入政府爲左叅贊移判刑曹兼帶知春秋乙巳今上嗣位叅錄衛社勲封錦川君時有外幹引務劇解職授知中樞尋加崇政拜議政府右贊成兼判義禁府居數月陞左贊成丁未苦風痺懶乞閑局章至四上命悉解兼帶只授勲封養疾在告迄三年竟不起寔己酉五月十七日也春秋周甲有四是年八月就高陽郡古辛州茂院里之原與夫人金氏合窆用治命也夫人司直壽延之女也以門德配公貞固媚順宗黨式其儀範先公九年歿公性剛正詳雅姿表又端可接外知內平生酬酢措設舉皆任真不事矯飾平居雖和易至於臨事果決不疑所歷職務不問閑劇必恪謹趨辦未嘗告病連按二方文簿叢萃輒裁遣乃休病作不恤故凡罷官者四遭皆非己譴旋復辨叙屢當權要堅不受私奉養母夫人備極怡悅及棄養寢處苦塊不避冷溫前後執喪啜粥

襄事用是得風濕癰瘻之疾其篤孝如此先祖戒子忠孝詩先公遺命盡
心報國等字哀為二障子常置左右觀省 中仁兩廟喪公俱為國葬提
調聲力庀事強疾不休親黨憂之公正色曰臣子享廩平日謁誠奔走正
在此時至於外地乃已豈可移病自暇乎陪享 魂殿逮終 國制未嘗
一日言病雅尚儉素衣不疊絺食不重肉常謝客清坐人不知為權門經
紀營置之事絕不介意家給常不裕公處之晏如也喜讀書至老不輟尤
邃禮經手抄註疏議禮之家多就折衷焉屬望方殷遽止於此豈不惜哉
公有一男一女男曰應斗擢甲午科以文行顯方為同知中樞女適禮賓
寺叅奉閔蘭馨同知娶郡守宋世忠之女生四子二女男曰胤祚胤禧胤
祐胤福女長適尹仁涵次幼叅奉生四子長曰哲命 獻陵叅奉次寶命
定命基命余忝公妻黨又忝同寅同事非一再矣知公行迹最稔故其孤
不以銘事屬他而屬余銘曰

檢校啓慶越自麗代旣濬其源復導其概根次枝暢世食其實署令種德
反厄名秩毓嗣聯倫恢業傑卓季雖升揚未究峻擢公實當數丕振羽儀
萬中高選珥筆論思冠豸伏蒲風力峭勁禁近演綸藩闡報政動紆汝
嘉遂展卿材逮登三孤有望符台理繁以簡執熟思濯人競驚遠我獨抱
慙盡瘁嬰奄屈遠圖孰謂理數而不可誣苑彼茂原龜兆宿食焯德幽
刻用告千億

折衝將軍僉知中樞府事金公墓碣銘

并序

嘉靖戊申十月甲子執友金公景參寢疾易簀游居人士私哭於家夙夜
之賢相吊於朝越明年己酉嗣子弘度以礪城宋公手最先跡爲狀一通
授余曰先人名行焯人耳目者不爲昧昧惟是墓道尚闕石表請丐銘文
以圖後徵余固不文不敢塞厚望其義則有不可辭謹按公系自出安東
有諱暉司憲府執義贈戶曹參判諱自行慶尚道觀察使諱叔演楊州

牧使 贈吏曹參判諱希壽司憲府大司憲寔聘朔寧郡守梁治之門公
即大憲之胄諱魯景參其字也自幼敏悟過人議論英發大爲宋肅靖公
所賞大憲以聲望見重於時料理事物人所不及或與參訂多屈於公一
時聞人願交造門者多輒年未弱冠中上舍選乙酉釋褐即補承文院權
知序陞副正字尋丁內艱服闋選入藝文館爲檢閱遷弘文館正字轉著
作時金安老陰圖復用諸僚剡章論列謂安老爲不容公論斥趙光祖爲
亂政小人屬公操筆公以爲此駁光祖非駁安老也執不肯書力主安老
爲陰邪其論遂定及安老起廢據公他事竄配文義丁酉姦黨伏辜公復
入史院三轉至奉教進副修撰旋移吏曹佐郎明年秋坐與僚友謔語侵
時宰褫職鑄資未幾西叙司果自是聚公顯歷爲講官者四轉歷校理應
教爲春坊者二文學弼善爲中書者三初補檢詳再除舍人爲太常者二
僉正判官冠豸者二執義掌令掌諍者一司諫爲正者四宗簿司僕軍資

內瞻公恬於進取每除清望必引疾求解未嘗久居右地書法遒勁家有
羲獻之傳凡朝廷典冊卿大夫碑碣皆出其手 恭僖榮靖兩朝之血寢
廟祠主園陵幽刻公皆淨寫故丁未春特陞堂上階以 寵嘉之俄拜僉
樞公多病將息常在告中以未得陳力爲憾力求朝 京賀千秋及就途
頓撼失調節僅輿疾致 命而還居未匝歲竟纏舊疾不起春秋五旬零
一乃卜己酉二月甲辰就衿川大方原先兆窆安焉公爲學主於治心對
人不諱己病必改乃己其在謫舍杜門讀書不與人接唯于抄先賢格言
觀省其爲諫官入對請正李建陽不道之刑語甚峻激聞者服其風力其
赴燕邸歸橐蕭然只貯衣被而已公雅篤友于弟晦之亡悼傷發心病連
分先業皆以薄老歸已賙親黨窮乏者至爲經紀其家外舅侍兒有遺腹
女公推卑所傳第舍婢不失依大抵人所難處公必勇爲多類此配李氏
漢平君誠彥之女儀家有則宗姻式之公之出只一男一女男卽弘度魁

丙午進士又擢戊申文科狀頭今爲戶曹佐郎以文行稱女適進士申孝仲弘度初娶忠義衛李希哲女生一男曰訐繼室以進士李繼伯之女又生一男曰詳申孝仲生三男曰竣竝翊女一幼銘曰

士之通惠才命難全兩不相謀人必尤天尤矣景參受才實厚輔以問學動則有守世競趨名公避若臭衆皆思衛公獨不售孝反砥行廉潔律身持用自晦何負於人其終不諧是有命焉銘以飭昧不急嗣前

推誠協翼定難衛社功臣大匡補國崇祿大夫議政府領議政兼領經筵弘文館藝文館春秋館觀象監事益城府院君 贈謚

公洪公神道碑銘并序

惟嘉靖二十有八年己酉正月己亥領議政洪公寢疾卒于第訃聞

上震悼輟朝 賜帛賻若祭有加同寅之僚聚哭門館游居之士相吊家巷越一月再旬中丞洪君曇以公胤孤知樞公所具行狀來授曰子從伯

父學知其行範爲詳故屬神道文某自童稚受知最深義不可以不文辭
然焯德顯刻可屬非人無己則請効幽刻中丞曰兄之意屬子吾罔以屬
他謹按公家牒系出南陽高王父諱子儼戶曹參判曾王父諱益生同知
中樞院事仍前 贈兵曹判書王父諱貴海慶尙左道水軍節度使 贈
議政府左贊成皇考諱洞承政院右副承旨 贈議政府領議政益平府
院君皆以公貴故議政聘司藝趙衷孫之門媿德娠賢成化丙申生公公
諱彥弼字子美號默齋生有異質不煩師資學識天就公叔父吏曹參議
瀚深於文學且有藻鑑嘗謂公曰謝玄爲叔父安所器重爾知此語否公
中乙卯司馬赴甲子科至擢覆試會燕山主追罪 成廟朝言事者盡錮
其子孫公亦逮繫謫配珍島丙寅 中廟改玉悉宥受枉被竄者仍許公
直赴丁卯科 殿試初補承文權知俄選入弘文館爲正字序陞著作博
士副修撰遷司諫院正言兵曹佐郎陞弘文館副校理庚午三浦倭奴反

陷熊川等鎮朝廷委鄭文翼公光弼巡察金羅邊備文翼素服公器識舉
以備從事及還會持平有缺物議皆屬公鈐曹以資淺上稟命特增
二階以授又兼知製教自是未嘗不帶是號公於清望機要之地無不
週歷右授則兵刑工三曹正郎獻納校理舍人司諫典翰四爲掌令三爲
應教再爲檢詳左叙則典簿直講司藝軍器司僕僉正儀賓經歷及爲直
提學乃丁外艱居廬三載守制甚謹己卯服除卽拜同副承旨轉右副時
新進之士自相推許趨競成風公獨疑重自守不爲所移中廟深悟時
習過激貶斥其尤公以儕僚多在譴籍誤被連累賴時宰申辨得釋移拜
兵曹參知未幾出按黃海及瓜復爲參知轉參議旋入政院爲都承旨自
此秩躋嘉善至陞資憲爲大司憲者六爲參判者五戶禮刑工四曹而再
歷工曹判漢城者再爲判書者七吏戶兵刑四曹而三判戶曹再判刑曹
荐歷參贊常兼帶經筵又帶賓客成均同知義禁知事及帶藝文弘文

提學公以爲非將任文衡者不宜並授力辭乃解藝文西敘者九上護軍
者一僉知者四同知者二知事者二嘗爲判曹參判賀聖節于燕右授
守知事以行甲午以畿甸務殷特除觀察任未滿起加崇政拜右贊成明
年坐無妄統職退居南陽先業者三年絕口不言時事丁酉定用事者之
罪收召耆舊起公爲戶曹判書尋進階大匡輔國崇祿拜議政府右議
政又陞左議政時有疑公起自不廢治貶戮之黨必力公處之平恕朝野
安之甲辰中廟疾大漸召公及右議政尹仁鏡入卧内蒙遺命及
上昇還公哀傷最甚乙巳大行在殯會宮中有拘忌事言者効公不
力爭必欲罷之仁廟以爲先朝舊臣進退不輕御批彈章力加辨
析仍陞領議政公以大臣不可枚詆左相位引疾求退再三上章上勉
從其辭拜領中樞府事仍領經筵今上嗣位置院相四人日輪詣政
院參決機務公首膺簡命逮衆錄衛社功封益城府院君戊申復入政

府為左議政時尹相仁鏡已為領議政言者 答公八相左先不可處下

上命叔廷議博考 先朝故事遂陞領議政公自丁未秋屬疾至是拜

相屢以疾辭及冬上辭者至再 上遣承旨問疾累 下批答不允已酉

疾轉革 上又遣承旨問後事公雖整服承 命已不能言尋屬續是正

月二十八日也春秋七十有四是年四月二十二日葬于南陽清明山洪

法洞癸坐丁向之原從先兆也公自在布衣已負重望肅釋褐即備論思

之官每當講讀語音洪暢論辨有條左右莫不聳聽稱為講官第一博通

群書經旨詞理靡不究極尤邃於易公退輒清坐謝客討閱書史窮日忘

倦為詩文深奧雅健機軸迥別後進以文字贄見者冀得公一可平生接

人不見喜愠子弟或以事請問輒以書卷授前曰汝試看此不復與語公

自筮仕由卑至鉅堅持一律未嘗少變聲色紛華避之若堯嘗遇初度子

弟欲以歌管佐酒公不許曰吾叨據崇高恒懷畏慎敢當簪笏之娛服飾

後美輟却不御下至僕隸亦皆衣敝雖貴極卿相謙抑愈下子婿官已通
顯每候門屏悉除呵辟治第不構賓位人問其故答曰吾家世守清素止
此庇身已奉安用求備性不好名事涉近名輒不肯爲晚年深戒盛滿每
遇遷除或子姪進官增秩愀然不樂曰恩寵已溢將速何禍自少爲孝
奉養母夫人晨昏之暇必躬具甘旨以進尤謹祀先嘗祭而窮不能辦者
必督行於家嘗有疾夫人買田一區伺病間乃告公怒甚嘗老婢曰吾家
祿足以養十口而猶事營置爾等謂我不復起耶公自始病便不服藥子
弟強之公曰死生有命非醫藥可延況吾年位已極乎公爲相動務鎮靜
事多裁斬人有言其不喜建明者公聞之曰吾固知時事之可憂張者憂
矣然更張而不得善後不如不擾之爲愈耳公嘗曰臺諫刺舉大臣不置
畏憚大臣聞彈論亦已不作忿恨此治世事也以故謗議或及必曰此中
吾病處之怡然每於議事之際群言風發初不立異徐以一言決之料事

周慎其擬成敗人始不信後則屢中善處要劇門無私謁未嘗爲身拔置
業爲子弟求薦其清儉之德尤足以儀世礪俗云公先配鄭氏郡守叔瓚
之女早歿無後繼室宋氏領議政秩之女生一男一女男曰暹知中樞府
事方以文行顯女適敦寧都正尹瑋知事先娶晉山君柳泓之女後娶縣
監韓慈之女生一女初都正生二男二女男長曰裕昆次曰裕後幼女
長適韓景祥次適李義健側室生二男三女男曰遠觀象監奉事曰造幼
女長適許應奉次適鄭仁次適李有文公之言行在人耳目事業備載國
衆只歎其大者而系以銘銘曰

亨否相倚厥機繫人有君有臣相頌也均向屬傾運公用時晦策名嘉會
適丁初載講筵一班即乎殊知既多裨益又勤幾規常得居中上所自助
出履臺頭風采屢著六官流連樹績愈偉遠應爰立輿論攸難撓僚諒陰
蔚然時棟用言釋位訖不爲動清慎所邵復押班印士可取模俗可坐鎮

文簡耐官正獻持默人勇爲功我靜爲德較其所就孰短孰長惟不愧心可質彼蒼未究匡毗造物之尤我銘貞石以永公休

淑容安氏墓碣銘并序

據知樞郭公仁所著行狀敘述

淑容姓安氏系出安山考曰坦大妣曰黃氏坦大叅錄中廟原從功階至迪順副尉淑容生于弘治己未七月乙酉天賦端懿動不違度正德丁卯選侍貞顯大妃特彼眷愛俾授書史戊寅命備後宮庚辰拜尚宮己丑陞淑媛聖烈仁明大妣親蠶後苑淑容陪衛行禮進退中式內庭莫不歎美庚子進淑容甲辰中廟賓天越三年制除請隨例退居仁壽宮慈諭丁寧不獲離違遂留侍焉恩顧有加於初嘉靖己酉偶就私第忽無疾終寔十月甲寅也享年五十有一上震悼不視事賻典特優三宮恤贈亦倍常數命中宮庀其喪明年三月壬申葬于楊州治西長興里坐辛向乙之原淑容平生莊謹自守料事周詳事 中廟幾三

十年恒戒慎不自滿故能終始保其榮寵常訓敕所出有義方接遇比列
得歡心又善鑑別人曰某後當然已而果然素不尚禱祀不爲禍福所動
視死生如順處嘗疊衣衾各爲一套識其外曰襲衣衾以備送終其亦達
於理矣淑容實生三男一女男長距永陽君次頤壽早卒次岷德興君女
卽靜慎翁主永陽娶司紙安世亨之女無嗣德興娶判尹鄭世虎之女生
二男一女男曰欽女幼靜慎下適清川尉韓景祐生一男二女男曰璉女
幼旣葬再葺諸孤謀壽跡墓道以狀問銘銘曰
滿損謙益在理孔彰以順爲正婦德之常女寵不終靡不由溢懿哉淑容
保終罔失祚後之殷足責厥報最行饒監不愧永古

贈嘉善大夫禮曹叅判兼同知春秋館成均館事行通訓大夫訓

鍊院副正任公墓碑銘并序

任氏自高麗顯融者代不乏人籍于豐川者尤大鼻祖子松封西河府院

君曰德儒封豐山君曰球叅知門下府事曰復成均生員曰彭孫漢城判
官聘大護軍楊和之門寔生公諱瀏子徵其字也自在髫髻器業蚤就十
六始舉司馬累捷頗有名逮屈會圍不復屑意去業大科不爲主司所收
而困躓不變竟擢辛酉科仍籍歷蔭即拜承文校檢爲養荐補橫城抱川
兩縣其爲典籍屬輪對請於列邑並置鄉學長至今村裏有學風教益廣
繫公之力銀溪驛路當北鄙野人入貢之衝管轄之任例選文官公爲察
訪收最內叙歷都摠中樞都事軍資奉常判官會推舉師儒轉成均館直
講工曹正郎出補順川郡守入爲軍資僉正陞訓練副正以疾考終公生
于景泰癸酉歿于嘉靖戊子春秋七旬有六明年己丑春就鐵原於背洞
之原窀穸焉用治命也公早喪恃不逮其養事尊府公備極怡養及丁內
憂年紀已過六旬不離墓廬者三年服除每值俗節必設位以祭時物非
經薦不食居家訓飭子弟敦睦親黨爲官用簡律已遺愛吏民世以是多

公平生不以宦厄爲歟至於易簀怡然順命亦不以世俗苦語累其妻子
真可謂篤信不惑者矣公配李氏延安右姓諱貌之女理家有法度宗姻
式之去公歿二十四年辛亥壽登八十七乃終九生三男三女男長曰弼
成次曰弼亨登乙酉科爲黃海道觀察使次曰弼貞女長適叅奉李應瑞
次適部長李謚次適司議崔倩庶出有二子某某弼成聚洪禹平之女生
一男曰熙龍觀察先娶元胤祖之女生二女長適叅奉柳惟一次適李鏡
後娶佐郎尹霆之女生一女幼弼貞未娶而夭李應瑞李謚皆無嗣先歿
崔倩有二男一女男長應龍次德龍皆幼女未行公以仲子弼亨貴追秩
少宗伯配亦封貞夫人正德丁卯余以上舍行事公臯比之下實有師生
之分觀察又有同寅之義其屬銘也安可以不文辭銘曰

進銳而退蓄久而發理靡不余最微奮閥公承遙緒累顯之餘食淡衣粗
志專攻書凡種弗收隕穫逾堅一奮躡高墨綬紆前無事於外民用去思

鶚薦函丈有說解頤晚佩郡章既非所喜八貳武局豈為祿仕已謝此事
寧復就列天游自適坐侵大耋任蓄較銳孰贏孰輸慶鍾兒做按有方隅
推恩貴錫煥亞春省謹謹輯業圖壽於永泰封之原螭首改觀有載孔諒
庶垂不刊

宗室利城君墓碑銘

并序

公諱憤字公肅 成宗大王第十子母淑容沈氏系出高麗青城伯德符
初以門懿備選入侍頗承 恩顧公生于弘治己酉歲未幾成廟賓天
遂被 東朝育養丁巳例 命封君加號利城燕山主淫醜聯倫多被罪
譴主不時出畋禁臣僚毋得帶僚從時 中廟亦備扈駕所乘或不調公
常執羈勒護衛不懈逮 中廟改王公首被 眷幸恩賜稠沓嘗丁外艱
廬墓如制公性謹厚不事矯飾常兼帶 文昭延恩宗簿司養都提調祇
飭履事堅守一律 中廟篤於友愛嘗 賜宴慶會樓下 慰與特厚今

上即陟引見便殿宴賚亦優公以兩朝原從之勞俱錄功一等壬子

季冬寢疾卒寔實月終日也春秋周甲有四訃聞上震悼輟朝吊錫

之命悉加常典公初配文氏某官簡之女封昆山郡夫人凡生三子長

曰壽環景陽都正次曰壽朋金龜正次曰壽鐵出繼叔父桂城君後封雲

城君繼室權氏某官守中之女封豐山郡夫人無後側出二男一女男長

曰麟壽漢原守次曰壽卿花山守女適清河縣監李洛壽環娶經歷金渾

女生二男二女男曰耆寧原副正曰耆寧城副正女適尹天錫次適柳復

庶出一男耆寧海副守壽朋娶奉事宋獻女生一男一女幼壽鐵娶士人

張仁孝女生一男曰耆海豐副正內外曾孫若干人明年癸丑後三月癸

酉禮寔于高陽酸梨洞坐庚向甲之原與文夫人同域異塋既襄事雲城

推余接用之分具狀來問銘義安可辭銘曰

宗屬在國序貳維城疏封外藩義多掩情聖朝敦叙祗崇祿位優游

輦轎不嬰以事公能惜福悉屏汰侈用謙受益故多續似矧有 隱恤於
數爲異銘以表德惟後之遺

靜慎翁主墓碑銘 并序

嘉靖壬子維夏旣望靜慎翁主以免身餘疾告終于寢訃 聞 上震悼
輟朝爲之不視事者七日 東朝 壺宮莫不軫傷吊賻之典特從優厚
命有司庀其喪葬翁主於 中廟諸女序居第九母卽淑容安氏翁主
生而秀慧 中廟憐而異之育於宮中年未齒便授孝經小學等書頗解
其意又使學書月 賜楮毫爲費大字尤長進有法時 聖烈大妃位坤
極翁主最被眷念常侍側不去癸巳始 命封主加號丁酉下配清川尉
韓景祐以其少也 命遷八闕年僅及笄乃許出居外第事夫子以順處
妯娌以和身親經紀不遺細忽門黨不知爲貴主清川亦不以恭侈自處
酷嗜蓄聚書畫又喜種蒔花草人有奇品者翁主不惜厚貨必購乃已皆

所以無違夫子而中其好也常以理家不如人爲婦人耻故織紵之工酒
食之宜無不宿辦以供不時之需恩逮婢僕而不褻教嚴稚幼而不假閨
閫之內常肅然雖視士大夫禮法之家莫之或少翁主生于嘉靖丙戌十
月初五日至是終壽二十有七九產四男五女男曰璉女三幼餘皆夭璉
齒纔周紀有至性號擗伏苫塊觀者悲之清川謀最懿行勤石壽後手狀
徵余文似若不得銘爲無葬義安可辭銘曰

婦德之淑內教以彰刑家化漸不忘 前王懿哉 王姬生長訓則崇執
真素不事修飾媚于舅姑允我佳婦和鳴所鍾毓祥惟九暗損天和罔育
見背奩帨空陳目存莫逮春露濕蘭有茁其芽尚邀後福以業其家

朝散大夫守司憲府掌令兼春秋館編修官校書館校理李君墓誌

銘并序

吾東諸李著于譜牒者非一而籍廣州者最大有諱集有名麗李忤辛毗

避跡自晦號遁村是爲鼻祖諱之直官至刑曹右叅議諱禮孫官至黃海道觀察使諱克堅官至通禮院左通禮諱攀官至長湍府使觀察以上以科顯通禮以下以蔭進俱茂宦業爲世聞人府使娶勲胄宋希烈之女生君君諱英符字應瑞自幼穎秀以文藻服膺流竟擢甲科授宗簿直長爲學官者一曰典籍爲佐郎者一曰刑曹爲正郎者二曰刑曹曰兵曹爲臺官者二曰持平曰掌令爲僉正者二曰宗簿奉常爲春坊者一曰文學竟以是終君紀始于成化丁未八月二十六日訖于嘉靖二年六月十八日壽終三十有七由釋褐丙子至易簣癸未指僅七屈君於余有莫逆之分初以兄事中以差肩終以執前綫知君心迹君性端重於事不漫過必分別乃已爲刑官明白詳慎一存平恕爲臺官論議勁正務持風裁爲春坊講對剴切聞者踈異夙夜游居之間聞望蔚然舉擬顯用而造物者不饒其歸極而止於斯豈非酷予君配李氏義盈庫令孝完之女賢淑克家教

著義方生三男一女男長曰首慶中戊戌科今爲司諫院獻納次曰重慶
方以上舍待選次曰復慶志學甚銳不幸及女適生員李磁獻納娶全州
府尹金希銳之女生四男重慶娶工曹叅判尹思翼之女生二男李磁生
三男一女子孫輩行共十有三人君之病篤余實省視日至于三逮今二
紀于茲獻納君追最君名行納于玄窀以銘屬余寔可哀也已銘曰
有才有位不永其年果何歸尤吾將尤天將欲發之必固蓄之篤慶在茲
以邀後福

推誠定難衛社功臣大匡輔國崇祿大夫議政府領議政兼領經
筵弘文館藝文館春秋館觀象監事世子師青川府院君 贈謚

忠惠沈公神道碑銘 并序

國朝卿相越自高麗勲德名家以至于今彌遠彌昌者指不多屈至於蟬
聯蟬赫有非他姓所可埒盛則吾於青松沈系見之矣有遠祖諱龍顯于

麗代 贈門下侍中至諱德符趾美侍中封青松伯八我朝爲左政丞封
襲舊號諱溫領議政府事謚安孝篤生 昭憲王后諱澹繼長政府策明
戴佐理勲封青松府院君謚恭肅諱浚官至內資寺判官 贈議政府左
贊成諱順門官至議政府舍人 贈領議政聘司憲府監察申永錫之門
贊成以下用公推 恩監察鼻祖崇諫爲麗祖統合元功二姓媿德寔賴
四國公序最長諱連源字孟容自在髫髻端重穎出迥異凡兒逮遭家禍
遂失所怙賴母夫人提曉義方志學不懈舅氏署令申援固奇士器公之
爲大加誘進及長質業於慕齋金公益加講明時慕齋量定籍田于陪郡
公樂於從師竟歲不返才識大進聲問藹鬱丙子中生員選首入泮宮三
舍莫不敬慕願文公愈諫下自晦于時士習趨競成風公旣以爲過中及
其敗黜亦不加訾壬午釋褐初屬承文院權知未旣選入藝文館爲檢閱
序陞待敎奉敎以事左叙副司正踰年復授奉敎陞司憲府監察遷工曹

佐郎改禮曹移侍講院司書吏曹佐郎尋擢重試坐事見罷旋授典籍陞
吏曹正郎俄丁外憂廬墓三年服闋授禮曹正郎時 仁廟在儲宮僚極
一時之望公亦選帶文學雖轉夏官兼帶不改竟授本院文學陞軍器僉
正遂入政府爲檢詳復陞舍人會外舅金公拜貲成以親嫌移司僕僉正
嶺南大侵餓莩相望公受 命賑救首講便策不加威怒事克辦集適所
至顛連尤甚公不俟朝報發倉均哺一道得以全活及竣事回轉副正尋
陞軍器寺正時用事者以好惡升黜人物公獨介立不屈嘗在銓曹時所
好者不一延薦坐誣斥者力加辨釋會濟州牧使有缺薦公陞秩以行其
實排擠公怡然不設難色及過海風浪掀簸舟人莫不危慄公據胡床如
在齊閭至州撫禦之外兼督農政四境大熟又能不鄙速俗躬率以禮朔
望拜關之儀春秋釋菜之奠未嘗告替大修費舍梓刊四書古文真寶等
書授習士民多嚮學至有請入國學者任滿內授禮曹參議移成均館

大司成吏曹參議承政院同副承旨以事罷俄授僉樞己亥春充進香使
朝京師遷敦寧都正仍歷戶刑吏三曹參議轉司諫院大司諫復爲兵
曹參議未幾進秩嘉善出按慶尚道公以勸學乃風化之本力獎儒紳又
勤於剴決務祛積滯竟以是告疾遞授上護軍拜工曹參判司憲府大司
憲復爲大司成居數年訓誘之功終始不倦育材之効比前頗多遷刑曹
參判兼帶副揔管又遷同知中樞兼帶義禁同知乙巳由戶曹參判超階
資憲拜戶曹判書參鞫獄事盡得其情以正刑書又加正憲時中仁兩
廟繼陟弔丹之使前後四起支調大詘公審度用費使公私兩濟人皆稱
便公素解華語衣冠趨履亦倣華制張行人承憲還道黃州公受餞慰之
命酬對之際不假舌人語皆條暢行人嘆服用是常帶司譯院提調以
疾解劇授知中樞拜議政府左參贊兼知經筵都揔管改禮曹判書又
帶同知春秋擢拜右贊成仍轉爲左復錄乙巳參鞫功特賜推誠定難

衛社功臣之號封青川君戊申冬用爰立之命拜議政府右議政進封青川府院君己酉秋陞左議政庚戌命復立兩宗公以異端之興大累聖治率百官廷爭不得時公論不無異同公獨力持堅懇至於累旬雖不回天朝野避之冬辭病不允辛亥秋陞領議政癸丑秋景福宮大內災上下驚惶上命公擔任繕葺公務以不廢舊實不侈後觀戒督工程時僅再閱功乃告訖上嘉悅賞賚之典實從異等蓋此宮開創之時青城伯實搃成之公又以首相復收重新之功祖孫管工勞勩茂著人皆異之乙卯冬以病再辭丁巳又至四辭語雖益懇竟不允公雖以辭病爲名實懼盛滿秋丹封春宮公又監其工儀物之制務極講究以別等衰人皆服其得體特賜鞍馬以嘉之時勅使將至公已嬰疾知難供職上狀乞辭再三瀝懇上諭以在平日不宜輕許今則勅使所視不可使相臣有缺故勉從所請左議政尚震啓曰宿德元老其去留足爲朝廷輕

重請仍任待瘳 上遣史官諭公曰昨遽卿職予不獲已今左右相同辭
答曰是乃公議卿其仍任調治公每以久病保位爲貪戀故釋位則若
沉痾去體冀朝夕可延及聞仍任病勢頓劇不復上辭乃具疏極陳乞骸
之情 上御筆答曰頃日許卿辭退是予之失左相之 啓亦是衆情茲
不允所請公又祈解不己遂條上六事勸學從諫親賢遠佞恤民懷遠
語甚諄切 上以書下政院曰任老成雖切於爲國許願養亦重於保臣
其諭于左右相兩相知公乞解之切 啓曰某先朝舊臣非無故欲退曠
職經時故欲釋重任且臣等前日請仍任豈料其至今彌留乎今雖許
辭待痊復用亦有故事且其辭病之疏條上嘉言不忘進戒願 上優納
且特降 教書以答其意答曰勉副其願解授領樞答疏 教書亦可制
諭初公欲進疏具草子弟以勞傷諫止公答曰吾雖病不入侍未嘗一日
忘 君一朝奄忽雖欲效其微誠得予我曾觀大臣病劇遣官問疾兼訪

後事則只補

上恩至重無一言及於時政豈病不可為欲言而不得歟

書所以慍慍不已者欲及心神未亂庶盡平昔之抱也公病後以不仕受祿於義未安故戒家人勿受至是兩相請令有司具送其第 上自聞公

病革遣內醫

御藥鎮留治療又別遣官顯良醫候視日三書 啓乃

命左承旨沈守慶問疾又遣中使 賜御札曰觀卿六條陳戒可見愛君

憂國之誠予甚嘉焉然卿累朔在告未安故為保安計勉副情願又賜薄

物 東宮亦再遣補德問疾 上尋遣右承旨鄭宗榮 問所欲言公令

和服紳書 啓曰臣之所懷前於六條已盡之矣但願政事之際存心忠

厚務從寬大使人心固結 國祚靈長 上復遣左書答慰公祇謝如初

及及遂卒 上震悼命有司庀喪輟 視朝三日 四殿亦進素膳 坤

辛丑年九月十九日卒于嘉靖戊午六月十九日春秋六十有八太常易名

曰忠惠事君盡節曰忠寬裕慈仁曰惠是年八月十二日禮定于通津某山先塋之下坐艮向坤之原用治命也公性雅靜詳慎行己接物簡約平恕濟之以剛柔平居入樂其寬和遇事人畏其勁正故皆不敢干以私宿尚儉素聲色之娛奢靡之習痛加屏絕雖貴顯已極罕見候謁車馬之閒清約一如未貴時燕坐一室未嘗去書不觀言笑又寡不許女侍近前居常樂善愛士必欲獎與培植故士論倚以爲重其爲文辭典實贍敏每遇詔議務以約言取裁不喜辭費入侍講章必究理道引喻時宜入始知其長於文而深於學也公自少恬默不喜趨營自辛卯以後國是靡定朝廷人物進退不常而毀譽未嘗及公故自號曰保庵蓋亦寓意也公當官雖不憚勞務盡其職至於權要之地輒避不居近來兩銓缺長則必謀諸台鼎然後乃定有來咨稟公輒艴然曰自當擇可注擬吾何敢言雖固請終不言先是士林有假論推引朋附漸廣識者憂其害政公於經幄婉

辭開陳摘尤貶斥俾不延禍人情乃安公深痛先考非命哀傷之念恒棘于中平生未嘗過東市之街又不與人歡譔宴會之所每當直忌之月自朔初素食以至諱日祭必號哭以洩罔極或夢接儀容垂泣終日朔望必躬廟奠雖值初度亦不喜聲樂之壽雅篤友愛嘗在海外聞仲弟之訃悼惋倍劇髮爲變白撫其遺孤無異己出諸弟有疾躬視醫藥不廢晨夕宗族有窮寡死亡者必加賙給子侄群集厨供常不下十餘人公每以盛滿爲戒教子弟必以謙謹爲先故名諸孫俱以謙字命之公久爲首相主張廟謨心無適莫動必主善衆論競陳委已從是略無吝色議所難斷能以一言折衷聞者莫不帖服公於事必深究強記 中朝疆域我 國封界瞭然如目擊身履人或問質辨答無碍耽羅山川險夷要害靡不圖寫作爲一軸乙卯倭奴寇擾南遼多陷城鎮耽羅尤當衡要公按圖策應如指諸掌人皆服其先見公自初屬疾未嘗語及家事及其危篤兩相來省公

便引接與訣從容酬答宛如平昔臨絕精爽不亂與子弟談話不已夜艾子弟知不救悉屏婦人易簀東首乃儵然而逝嗚呼如得正而終世豈多見哉公娶左贊成金公璫之女賢而克相凡生一男三女男曰鋼即國碩敦寧府事青陵府院君嘗中癸卯司馬女長適主簿李元賓夫妻皆先公歿次適典籤尹健次適右侍直李仁健青陵娶縣令李藹之女生二女八男女長即今坤宮男長曰仁謙中戊午司馬次曰義謙中乙卯司馬次曰禮謙次曰智謙次曰信謙次曰忠謙次曰孝謙次曰悌謙主簿生一男曰韶繕工監役典籤生三男二女男長曰起禎次曰起祥餘皆幼仁謙娶佐郎李拔之女義謙娶都事韓興緒之女生一女禮謙娶郡守鄭清之女生一女智謙娶都事李霽之女生一男信謙娶叅奉鄭麟壽之女忠謙娶宗室屹之女季女適叅判任說之子榮老生一女旣襄事青陵推世分使來屬銘士龍自惟受知於公最深又同年紀誼不敢辭第公之德業

表著人耳目者所不暇持據嘗得於覩記者亦不爲少而文謬思蹟不能
掄揚只據公季冬卿沈公通源狀爲之銘銘曰

生材係運興替攸配晉實用楚足以無對麗季多壘授鉞青城迪我聖
祖救禍黎氓視棘佐新疏封沂源沙麓效祥作楫配尊繼繼復始數丁于
公稷下媚學有聞即隆摘髭策名遍歷升揚內贊外庸望乎廟廊三事告
猷百度仰成人莫敢叛物莫敢撓持約勝煩用靜鎮劇旣勤匡毗又釐謀
畫調維之力上下交賴舍見用衆於道爲最位踐上台緒屬中壺處之大
耐造請寔遠宜受謙益反戾必壽奕世傳載可並不朽螭首屹左我最公
德百世在後過者其式

密城君墓碣文

朴氏之系自出非一而籍于密陽者最大而諱光禮顯于高麗由文階進
其後再傳聯擢科第譜逸不詳其官治復延五傳亦克趾美位並通貴至

諱剛生官至集賢殿副提學諱切問官至權知校書副正字 贈左贊成
諱仲孫策勲定難官至議政府左叅贊諡恭孝諱楣官至禮曹叅議 贈
吏曹叅判提學以降俱以 贈典送增顯秩配曰知敦寧府事晉山姜頤
德之女公在諸子序居第二諱光榮字君實生長法家濡染所就學問贈
博中丙午司馬第二名藝成行邵負屈者動踰一紀戊午始釋褐選補承
文院爲副正字序陞博士轉奉常主簿旋拜弘文館副修撰甲子燕山將
追崇生母廢妃公與僚儕刻章論列坐忤旨竄配靈光丙寅 中廟改王
以司諫院正言被徵明年陞司憲府持平遷議政府檢詳仍陞舍人移弘
文館應教歷司憲府執義司僕寺正通禮院左通禮乙亥擢拜承政院同
副承旨因事左叙上護軍俄拜司諫院大司諫兵曹叅議戊寅充管押使
朝燕授閑局爲敦寧都正逮報完 命出按黃海將及瓜以不能弭盜坐
誣罷還會大臣有不喜公者擠補江陵府使任滿拜吏曹叅議戊子復入

政院爲左副承旨尋轉爲左京尹有缺特進公秩授右尹公伯兄無嗣公
以次當襲勲封密城君仍差賀正赴京通授同知中樞及還復長諫院
俄左授西衛不久出按忠清壬辰內授工曹叅判兼副摠管遷刑曹叅判
丁酉以疾解授勲封是年八月寢疾卒于第距公生天順癸未寔七十有
五年即十月庚午窆于高陽豆應村先兆之次戊坐辰向之原公配楊氏
內膳僉正石堅之女公之南竄也病終于清州村庄仍葬焉公之從先龍
用治命也公性端方清慎恬於趨營居官蒞事動循規襲常以銜能爲恥
待人亦不矯情隨遇任真人服其量公亢生四男一女男長曰藻某官次
曰蘋繕工副正次曰蘭高原郡守次曰苾內資副正女適辛晉賢側出四
男長曰莪次曰薈次曰萱次曰蘊藻娶弘文館副應教奇積之女生二男
一女男長曰忠元擢辛卯科今爲承政院左承旨次曰孝元今爲義禁府
經歷女適河原君張彥良藻娶直長韓伯之女生四男二女男長曰誠元

次曰敬元次曰謹元中壬子科今爲司諫院正言次曰慎元女長適尹正
元季適兵曹叅知鄭俊蘭娶宗室羅城令之女生三男長曰仁元中壬子
科曾爲禮曹佐郎次曰崇元亨元茂娶長原君黃孟獻之女生一男一文
男曰好元中壬子科今爲咸鏡南道評事女適生員沈蓉繼娶縣令趙元
信之女生一男一女皆幼辛晉賢生三男二女男長曰繼元登戊申武科
今爲部長忠元亦以其貴 贈考吏曹叅判娶僉正李麟壽之女生男女
幾人男長曰啓賢中壬子科今爲吏曹正郎其他內外曾孫揔幾人公之
先自鼻祖以及公身十有二世科目之傳蟬聯不絕而忠元方以文章聞
望爲世所重仁元謹元好元啓賢疏名一榜蔚爲國器猶且蘭王之富頭
角嶄然公家之慶殆未艾也余以孔李之分辱公知獎故諸子碣墓諸銘
銘曰

密晉二氏埒盛崔盧代聯公相貴振金朱公龍表書香討窮編簡戰藝司馬

草占榜眼名擬上第頌紬廼伸盛之王堂以言竄身逮遣休會遍歷清望
動守劑卷一視得卷雖亞卿秩亦不滿德持是裕後足以光國四鳳并儀
古不多見較彼暴得榮萎轉眄厚蓄遠收孰與公倫銘以訂之用表堅珉
崇政大夫議政府左贊成兼知 經筵春秋館成均館事弘文館大
提學藝文館大提學五衛都摠府都摠管 世子貳師 贈謚文敬
金公神道碑銘 并序

吾東方氏族著于譜牒以大家數者世不多見金氏世籍義城自高麗司
空諱龍弼以降代有聞人有諱好智咸與少尹諱統禮曹正郎 贈禮曹
叅判諱益齡成川府使 贈禮曹判書諱璉禮賓寺叅奉 贈議政府右
贊成寔聘寧越郡守許芝之門公其冢子也自叅判至贊成贈典皆以公
貴也公諱安國字國卿號慕齋天賦穎秀七歲已知讀書至小學孝友聞
子薦之章曰我當以此爲法十二三即通大義不過三遍輒成誦終及成

童博通經史所著詞賦動爲人所賞十七荐丁內外艱毀戚踰制朝奠具必躬執乃供服闋中辛酉進士第一名生員第二名癸亥釋褐由承文院著作轉承政院注書又轉弘文館博士序陞副修撰丙寅華使徐穆吉時等來公選補遠接使從事官是歲中廟改玉復入弘文館爲副校理尋擢重試拜司憲府持平自經廢朝短喪喪紀大毀公首請明示勸懲以扶風教遷禮曹正郎陞司憲府掌令剛直不撓務持風力轉成均直講司藝司藥僉正內資副正時公季有爲吏曹郎者廟議以國學教誨爲重啓請不拘親嫌移授司成辛未日本使釋弼中來聘以公充宣慰使禮接得體又多酬唱贍敏不窮弼中大加推服曰朝上國聘鄰邦至於再三未見如公人物及其辭歸涕泣惜別是後倭使來朝必問公安否壬申弼中爲馬島請和持國書以來公又爲宣慰使時公兼帶經筵進講易經以故得解宣慰用弼中懇留特許仍之癸酉陞內資寺正乙亥大臣

薦授承文院判校嚴課漢吏訓讀習之法成效頗多秋擢拜禮曹參議轉
司諫院大司諫遞授僉知中樞府事丙子拜承政院同副承旨俄陞右副
嘗於夜對 啓仕路不清正緣試蔭冗濫請依經濟六典正月開試又依
諸科遣臺諫參議中格者出榜給牌時魯山燕山置後之議起廷論不一
公以爲二君雖當廢叙親則皆係於 先王而尤切於今上况生臨一
國死無托其孤魂厲氣足以干和大臣不能將順 聖心臣甚惑焉請考
芳碩立後事例酌宜行之又 啓治道當以孝悌爲先必從幼習至於成
德幼習之要莫如朱文公小學且 先朝旣撰三綱行實教民有方但缺
長幼朋友請足此爲五倫並廣布中外使人得誦習時 中廟欲立決訟
大限公以爲人心厚薄實係教化使民無訟可矣何必立限丁丑轉左副
慶尚道觀察使告滿 下御札曰金安國雖官序不次入器相當故加階
特遣公感激思效及陞辭復請程愈集說小學一件以備本道刊本履任

之初抵玄風首訪金宏弼墓躬灑爵爵務以風化動人所至有學行者或
造廬或致饋且搜採孝子節婦悉加旌異撰二倫行實又諺解呂氏鄉約
刊布間荅公於道內州縣學校必謁 聖又各製勵學詩一篇板揭講堂
以勉學徒民有兄弟訟田者公面喻孝悌親愛之道民感其諄切竟裂券
而去戎實及瓜徵充謝 恩副使朝京特增秩資憲判工曹其還多購源
洛諸賢性理之書 啓請印頒學者賴之尋帶知 經筵同知成均己卯
入政府為右叅贊又兼弘文提學夏 特授全羅道觀察使將行 引見
便殿諭以前在慶尚績效茂著故特簡除耳公承宣之外化民成俗之條
比慶尚尤加周悉冬趙光祖等被竄公亦坐罷退居利川村莊別構小齋
扁曰思逸日與姻學諸生講論徒弟寢盛時議非之或欲加譴公聞之畧
不為動講學如故戊子 中廟展謁 英陵道經利川公為整服候伏路
廛以俟 駕過公嘗就驪州川寧水干卜小築至是移業構草亭其旁迺

據冢頂俯瞰莽蒼浩浩如乘槎泛溟故名亭曰汎槎又取昔賢寓取之物
爲八詠目其堂曰八怡有鄉人載酒來者無貴賤少長輒與暢飲日夕杖
屨逍遙吟眺若將畢命者十九年然愛君憂國之念未嘗少衰丁酉權
兇皆伏辜起公爲上護軍兼同知成均戊戌遷同知敦寧又知中樞未幾
進禮曹判書秋復拜右叅贊兼藝文提學仍陞左叅贊己亥率察薛廷寵
等來頒建儲詔公授館伴之命應接盡誠禮亦不愆酬唱篇什動盈
卷軸華使服其典雅夏通授知中樞旋拜左叅贊嘗侍經筵啓我國
取士必講四書三經用力分而取切淺若依朱子之議每式年通試一經
則比今中朝專經之制尤爲詳備請試行之冬特進崇政移判中樞
兼世子左賓客歷司憲府大司憲漢城府判尹遂陞左贊成兼弘文藝
文大提學世子貳師前此事大表箋分屬知製文官撰出取大提學裁
定後正稿啓可而用之又公受任率多出于人皆難之辛丑夏移判兵

曹秋解授判敦寧冬復拜禮曹判書公深於易學故特命兼世子貳師非久卽通因東宮上請命公復侍書筵公辭曰頃叨貳師已受降階之禮今旣釋任安敢當此上命公宜略其禮公復辭曰世子曾以貳師待臣今若待以殺禮是前後有異世子待師之禮所關非細上曰以卿懇辭意可略禮卿言果是其依貳師禮行之公固辭不獲冬以疾辭職上遣醫診問復賜內劑東宮亦遣使問疾通拜知中樞尋進判樞公自少務盡職事積成勞瘁至是踰月在告遂至沉痾適值皇帝宮掖構變卽營本國當修進賀表箋大臣以公疾革乃令提學督草脫稿公聞之曰此吾職分安可以病屬之他手遂力疾製就自此疾勢轉劇至癸卯初正己不可爲許判書磁尹叅判旣嘗在門下受知最深及是就省公困極猶張目曰國事國事是日上亦聞危篤欲遣承旨問病政院以爲無故事上曰金安國雖非三公盡心國事其特遣承旨問之及

至公第不能起對但稱上恩至重言訖而卒訃聞上震悼輟朝二日賻贈加等東宮亦慟傷致祭屬纊之夕舉朝莫不奔哭親視棺歛所嘗受業之士多列顯要皆變服執子弟之事無敢後者遠近聞者咸為斯文痛惜太學諸生亦莫不為修帛祭公資稟既厚充養亦篤剛果植內和粹發外扶善憫惡必欲進而教之俾知自處故人無怨尤當官處事推其至誠必謹毫忽信義所孚異俗亦化自十五六歲時便知學問向方及聞金宏弼論學慨然有求道之志其所造詣咸以程朱為準故用功飭己不驚高遠常在日用之間至於職所當為必委曲備悉人或譏其煩碎公笑曰人心麓細聖愚之分相懸安可外細尚麓自以為通乎古人有一日所為必告於天亦有是日不做國事必廢文食者吾豈苟避煩碎不舉職事乎用是事屬廢墜者無問巨細究其原本以達條緒使不泥古而必宜於時祖宗良法美意中朝典章文物凡可以推行者歷舉語人疊疊

忘倦久長曹省屬奏案牘不拘吏式務悉事情剡辭燁然皆可誦法公常侍經幄書筵啓迪之言必以理學爲主貫徹簡婉上爲虛納左右亦皆聳聽公於書無所不通尤邃於易數探源辨析靡不究極旁討天文地理諸書淹貫無碍公之學術次而論之則周盡如陸敬輿精約如呂晦叔超妙如蔡季通公早喪怙恃哀慕終身出入必告朔望必祭祠宇旁置小齋公嘗燕處凡起居飲食動必寓慕故號曰慕齋又篤友愛姊妹之窮乏者每分廩祿常舉謙恭二字以勉子弟曰此是君子盛德汝輩佩服不離於身可也我平生未嘗以傲惰加人亦未嘗言人過失汝曹宜戒之平居必早起整其衣冠終日端坐討論不懈常歎曰吾東方土地偏薄人之稟氣不厚又不知理學故鮮有成德者也公自奉儉約至於親舊死喪賻救備至公嘗在春曹憫四方儒生游學京籍者死亡則窮不能歸柩啓請令京兆遞送其柩以抵其鄉公自早至顯常兼帶承文專任事大之務

朝廷倚之公每言經濟六典有守信田乃備朝官寡妻廩給俾不窮餓改撰大典取爲職田殊失祖宗忠厚之意昔司馬公自言平生所爲未嘗有不可對人言者史家亦言病革諄諄語如夢中皆朝廷天下事公之脩飭誠實動無有忤於人而其於病不能言尚不忘國事以托人夷考其行庶幾無愧於古人矣公生于成化戊戌八月初六日易簣以嘉靖癸卯正月初四日春秋六十有六是年三月二十九日禮寔于長湍海村里丑坐未向之原用治命也太常易名文敬配享 仁宗廟庭 國朝得謚文敬位不至三事而獲配廟食者指不多屈公配李氏宗室松林君諱孝昌之女賢而媳德儀家有則訓子有方性尚儉素不喜紛華公之家法爲世所式夫人之助居多考終于甲寅十二月初九日壽七十九乙卯二月二十七日配葬公塋亦禮也凡生三男一女男長曰有孚典設司別坐次曰汝孚中己酉科今爲議政府舍人方以文行顯次曰在孚活人署別坐女適

忠義衛姜復側室子曰衍字觀衆監叅奉別坐前娶判決事韓叔昌之女
生二男曰堯命堯選後娶通禮李捷之女無子女舍人娶進士具元之之
女生一男二女男曰堯叔女適忠義衛李聃年餘幼別座娶察訪成繼禮
之女生一男一女男曰堯錫女幼忠義衛生一男一女男曰克誠藝文館
奉教女適別坐許樞余於公義兼師友親炙而覩記者不爲不稔文思衰
落不能少揚祗据公家狀畧叙行蹟而系以辭銘曰

士貴懋學學貴知宗縫掖在身實不充容寔謂儒病白紛難砭買買百載
利祿是怙公稟間氣夙衆碩儒試聞講說不迷正塗我驅之疾道遠猶近
儻來之至非我有聞盛之玉堂用補袞闕臺端風力直不傷訐輒思盡
已輔以無忘內除外庸孰非劇量惟古於心動與今戾從違之際疇克有
繼雖不大施思若過半末路起廢望屬調贊流連卿秩庶訖釐革未究爰
立位豈匪危不負所學足簪其有從古如斯天與人否穹碑我我有載孔

彰過者必式文敬之藏

贈嘉善大夫兵曹參判兼同知義禁府事行通訓大夫定州牧使

宋公墓碣銘

并序

宋氏籍于礪良自高麗入本朝世著譜牒鼻祖諱松禮策勲誅逆拜都僉議中贊封礪良郡君謚貞烈諱玠亦克與勲位都僉議中贊封樂浪公謚良毅諱瑞嗣官都僉議右政丞封礪良府院君三世上相古未有也其後歷三傳至諱有徵官至杆城郡守寔生扶安縣監諱觀扶安之胄曰胤殷以上舍待聘而終配曰尹氏護軍諱珠之女候諱壽字耆叟胚胎世德夙負穎異年僅弱冠用保任授司饗院參奉遷濟用 敬陵參奉序陞濟用副奉事尚瑞義盈直長轉主簿歷司憲府監察掌隸院司評漢城府判官遷入秋官爲正郎由尚衣院僉正補靈光郡守以治辦収六最內叙司宰繕工濟用副正俄拜定州牧使不久丁外憂解任丙子制除就拜密陽府

使居踰年辭疾將息陝川村莊是年九月轉革不起享年四十有八窆于郡理頭峴山之原配李氏左贅成李公克墩之女賢而有則宗姻式之後候三十七年癸丑終享年八十三候之葬雖有治命堪輿家以爲卜地不詳罔以妥靈故夫人之亡諸孤謀于門老奉候櫬遷厝於廣州陰村外舅贅成公塋域以夫人合祔禮也候性綜敏長於治劇所至有能官名嘗在髫髻并失怙恃鞠於舅家能自樹立不墜諸業又能宦軼九卿世以是多之凡生三男長曰孟璟由武階進擢癸酉科歷任中外俱有聲望曾爲同知中樞以其貴 贈候兵曹叅判 贈配貞夫人又 贈二代承旨通禮等官並與所配如國典先娶執義權世衡之女生二男皆夭繼室以柳氏奉事亨源之女生二女長適宣傳官李獻李適秀才尹卓然側室有一男曰崧次曰叔璟以上舍筮仕方爲安城郡守娶敎使梁淑之女次曰末璟今爲陽城縣監娶府尹許礦之女生一男曰律擢武科曾守唐津今爲宣

傳官余於候之冢嗣實同年紀契分最篤稔知候治行故以狀問銘銘曰
宋為故家啓慶貞烈功在勝國莫與之埒遙緒洎今奮庸彌卓以礪揚號
繼繼封爵候嗣遠業夙著幹器雖危二塗不碍自致取最所歷積勩乃伸
秩僅九列齒缺五旬未究厥效宰物之難惟其裕後三鳳振翰 恩馳亞
卿足賁泉局矧合雙鈞宅固且寧委社縣裔流澤不匱銘以最迹以永後
視

通訓大夫內膳寺正慎公墓碣銘

并序

玄默困敦維夏庚辰執友慎君希白寢疾不起越六月壬申窆于楊州金
村原先府君塋域之旁蓋君治命也君諱居易希白其字也生而穎異媚
學不懈累舉見詘徙保任筮仕初補司饗參奉積久次陞司宰直長遂躋
衆秩歷主尚衣禮賓兩簿遷司憲監察出倅洪川洪原稷山通津四縣俱
以治辦聞躬歷翊衛司翊贊漢城軍資判官刑曹正郎都摠經歷軍資僉

正漢城庶尹君長於剴劇秋官京兆最有聲稱由典設守除平山府使力
補贏幣未幾辭疾解仕復由軍資副正補江華府使連收六最陞內資正
綜理司務弊祛事集用是遍為尚衣濟用內膳所至著效故雖官滿已遷
繁委如濟用以克幹見留君性篤孝備極色養雅卜東湖一丘構別墅營
置頗饒琴書棊槊及聲伎之具取諸左右舉免外求壽親晚景垂數十年
又能友愛群從有盡室就依者鑒儲資給每親朋至輒矢魚擊鮮飲譔忘
倦不問其費自叙取居之勝求詠於薦紳聯成卷軸君自出居昌有檢校
太子太保諱翼以後縣歷八代皆著宦牒諱幾仕終全羅道觀察使諱後
甲禮曹察議諱自修廣州判官諱克成官至尚州牧使聘郡守權念之門
君其胄子也君生成化壬寅終嘉靖壬子春秋七十零一配宋氏領議政
諱軼之女生一女適別坐曹士虞蚤歿無後側出三男二女男長曰大胤
律呂習讀次曰大德次曰大福女長適宗室雲川副令鋒次幼大胤娶領

議政南袞庶女生二男一女皆幼大德娶司譯副正金驥之女雲川生一女幼君之歿堂季判書慎公居寬實照管後事使其孤大胤來屬銘銘曰秩筵九卿位匪塞也景羸七旬壽匪畱也充全所受獲返真宅寔安且固我最其迹

秉忠奮義靖國功臣嘉義大夫同知中樞府事兼五衛都摠府副摠管訓鍊院都正清溪君鄭公神道碑銘 并序

公諱允諫字益夫系出草溪鼻祖倍傑顯于高麗官至侍中封光儒侯世著宦牒至諱僖有名麗季終僉議評理諱便通禮門奉禮郎 贈禮賓正諱興 贈僉知中樞府事諱溫僉知中樞府事 贈工曹叅判草溪君皆以公貴推 恩三代叅判聘生員元自敏之門公其胄子也生未晬失恃及長志學未究去事焉頗通曉六韜之法弘治辛亥 國家用師北鄙成廟卽禁苑親閱從征士勇怯公射居最 特賜酒褒諭以遣明年壬

子擢武科屬訓練院序陞叅軍逮躋叅秩歷司憲監察軍器廣興軍資主簿轉司僕判官正德丙寅叅靖國功 賜勲號減獲土田仍招授軍器僉正丁卯通加功臣官秩公亦與陞通政階出守杆城郡俄丁內憂又值繼母服居草土者五年服闋拜熊川府使公承倭寇兵燹之餘力補贏弊實復其舊秩滿內授西衛兼將禁旅未幾出鎮清洪水軍踰年擢拜咸鏡南道節度使首請築北青城以壯營鎮形勢戊寅以僉知中樞召還己卯特授會寧府使進秩嘉善封清溪君庚辰移鎮北道居二瓜勞勩益著嘉靖壬午由同知中樞節度全羅水軍時殺掠上國捕倭漂至我境出沒諸島公至鎮大修戰艦嚴利器械癸未夏追勦倭船擒斬獻捷 命加一階仍 贈弓矢衣帶又遣侍從宣勞 中朝亦 賜白金獎之甲申遞授訓練都正乙酉賀聖節于燕丙戌平安謀帥難入僉舉屬公巡歷旣訖率伍中有弓鈔甲冑弊鈍者官爲易新由是戎備一變戊子有鎮將輕涉虜境

遇害者公坐不戰譴配唐津秋 賜環已丑起授上護軍庚寅撫戎忠清
任未滿坐無妄復配橫城是年冬蒙恩得釋壬辰西叙僉樞兼帶副摠管
甲午遷同知中樞公素有謝事之志丐外補三陟府使乙未換赴寧海丙
申辭病就醫于京六月寢疾考終公生于天順癸未至是嘉靖丙申春秋
七十有四訃 聞命有司吊祭官庀葬事追秩兵曹判書 贈謚莊襄用
是年八月禮窆于原州隔洞山之原公性儉素不喜華靡居常早起終日
匡坐不設情容絲竹宴遊之娛未嘗有意酒戶甚大剛制不飲故常不及
亂接人以和蒞官以勤濟以綜密隨事辨治任邊閫垂三十年動必設備
盛陳軍容常如敵至有古良將之風世以是多之公配元氏禦侮將軍諱
仲穉之女賢而婉德先公三年而歿與公同域異塋公生一男曰淑唐津
縣監側室有一男三女男曰淡季女歸贊成尹元衡 恩封貞敬夫人縣
監娶忠義衛金繼勳之女生一男一女男曰宗榮登丙午科爲弘文校理

女適別坐趙舜賓贊成生一男三女皆幼余雖年輩不倫而知公行績最詳故贊成公以神道文見屬銘曰

故家積慶彌遠不窮光儒啓源派屬于公謝習素業蘊略珠鈐動不言功蓄多最廉酬未滿效而止節鎮惟不自有歸裕後胤況貴門楣延緒孔顯責報之厚於古爲鮮原麓儲祥寔藏冠佩石表有最用飭稚昧

通訓大夫楊根郡守慎君墓碣銘

并序

自高麗至國朝以顯仕世其家彌遠不替者絕無僅有居昌慎氏卽其一也有諱翼官至太子太保六傳而至諱仁道取顯率皆已致諱以表判利川縣事贈右贊成諱銓黃海道觀察使贈領議政諱承善捷魁科位長政府勲封居昌府院君觀察以上封贈皆其貴也寔生左議政諱守勤聘同知中樞府事諱忠仁之門君於諸嗣序居第三諱弘祚字太綏年未髫髻骨法異凡兒方志于學遽遭家禍絕意宦進韜默自藏而所與

交多知名之士嘉靖戊子秉銓者惜其才引補興艦司別坐七易歲序遷
敦寧主簿仍轉司膳內資明年出補稷山縣監累考最丁外憂解任制
除授內膳主簿移造紙署司紙是年冬中廟親御兩銓注擬擢除茶原
縣監逮辭朝特賜弓矢以遣居及三瓜會君之姪家出鎮右閩例以親
嫌易任義興未幾以疾就醫于京踰年良已復授敦寧濟用軍器主簿陞
中樞忠訓都事由義盈庫令出守朔寧郡復以疾辭還君素多疾至是不
以仕宦自嬰謝客屏居忽除楊根郡守君力困就任痛省眷口浮費盡祛
公私宿弊吏民稱便辛亥時值大暑有朝差過境君方屬疾強起出候水
次觸冒增劇遂不起君生於弘治庚戌後九月九日終於嘉靖辛亥六月
二十日春秋周甲有二用是年八月十八日禮寔于楊州南村禿子味里
乾坐巽向之原實治命也堪輿家言向背不從畜洩失形改卜州面長興
里主坐丙向之原消癸丑八月二十八日之吉遷厝焉廼先公議政瑩域

外左支也君性亢直無表襮當官酬應不爲詭隨民有告寃必直乃已自奉甚約亦不外飾御下頗嚴務戰橫猾故所至用是取謗與人交滋久不渝賄賂窮急不問所費君生長食息不離紈綺固若不事修飭而亮考心迹動不相戾至於經紀細事亦不屑意故世以是多之君配承文院正字任熙載之女賢而且順後君三年癸丑正月八日終與君同域異塋凡生二男一女男長曰思獻中丙午上舍選曾爲洪川縣監次曰思遠造紙署別坐女適忠義衛梁允儉側出八男二女男曰思溫思良思儉思讓思仁思義思禮思智女適梁思恭餘幼思獻娶左尹趙仁奎之女生一男二女男曰喜女適南璫餘幼思遠娶光平君金明胤之女生一女幼梁允儉生一男幼梁思恭生一女幼余與君越在童外同媚稷下之學通家之好老益不衰故其孤思獻謀次君行績問銘壽石義安可辭銘曰
剛不過折靜不苟安自非內制曷符外觀世驚取速我退收遲珩紆郡章

孰云猶卑惟不自假乃亦受益有欲徵迹請考斯石

崇政大夫議政府左贊成兼知經筵事五衛都摠府都摠管世

子貳師贈謚平靖金公神道碑銘

並序

吾東韓著姓莫埒金氏籍于光州者最大有諱稹官至政堂文學謚章榮
歷三世諱若采直趙胖之獄有名麗季入本朝官至都觀察忠清寔生諱
問權拜選補藝文諱鐵山官至司憲監察諱謙光位議政府左叅贊用佐
理勲封光城君謚恭安觀察以下以叅贊伯兄左議政國光貴推恩三代
式加錫典叅贊聘某官陳某之門有子五人公諱克幅字予誠序居第三
生而姿宇端秀年未弱冠襲如老成所交皆聞人及中上舍器業益進所
至觀者艷慕時叅贊以宿德致政府又毓蘭王公昆李英特不群大爲美
晉山鄭東萊鑑賞戊午釋褐初補承文正字旋移藝文檢閱序陞奉教轉
成均典籍禮曹佐郎選入弘文館爲修撰遷司憲府持平禮曹正郎甲子

燕山誅竄嘗因言事忤旨者公亦坐是竄配高山縣時短喪法嚴人莫敢忤公丁外艱秉制不渝丙寅 中廟改王公亦賜環明年制訖授典籍弘文校理尋陞司憲掌令遷副應教禮賓軍器司贍副正承文校勘與修燕山日記故所歷皆帶春秋遷司諫院司諫濟用監正司憲府執義仍陞直提學擢拜承政院同副承旨歷陞右承旨以疾解授僉樞遷戶曹叅議復入政院爲左承旨叅鞠朴永文獄特階嘉善陞都承旨拜工曹叅判出按忠清任滿內授同知中樞漢城右尹吏曹叅判 中廟親御銓注擢公戶曹判書言者論其不次還授同樞未幾復拜吏曹叅判旋陞工曹判書仍赴 京謝改 宗系還授知敦寧歷議政府右叅贊刑曹判書左叅贊大司憲判尹戶吏二曹判書通爲知樞移拜左叅贊又移判兵戶曹兼 世子賓客知樞以後常帶 經筵丁亥特陞崇秩拜右贊成俄陞左兼 世子貳師特拜大司憲踰月還拜左贊成兼帶如故時趨競成風識者莫能

矯叔公嘗入

侍筵訪歷舉宋朝喜事梅曾之輩以斥時議所宗者將啓

變亂之漸請加裁抑左右聞者莫不竦異或爲公危之中廟頗納其言

卽命外補物論稱快公奮不顧身論列時忌竟以公弟察判克愷連婚朴

氏羅織劾公盡褫爵秩衆判一家尤酷被竄斥時用事者放還復據權要

時論靡然隨之公憂憤成疾委命不藥竟不起聞者畏其摘訾莫敢顯言

悲之然其在殯吊祭之家相繼其屬發詩文之悼益多鄭文翼公爲首相

來撫諸孤引咎最傷焉諸孤奉柩禮定于楊州麻洞甲坐庚向之原某元

某年某元日也公生于某元某年某甲卒于某元某年某甲春秋實若干

也太常易名曰平靖公配李氏宗室把城君哲全之女賢而有則事公無

違奉舅姑以謹處妯娌以睦訓飭之方撫御之恩莫不逮下一家化之宗

黨亦式子孫布列顯要門闕之盛世莫與夷又克高年撫養伯嗣明胤奉

養西京仲嗣弘胤亦按西海任撫方隅境壤相比 朝廷特許隨意省覲

榮養之隆在古未聞于今僅見夫人常戒滿盈不肯久安經還京師內
外諸孫百有十餘人日候于門者夫人一一點領辨認不爽某年月日寢
疾某月日考終享壽若干用治命配葬公塋域寔某年月日也公性謙約
未嘗以喜怒加人不言人過取人必先厚重癸未驅逐西鄙冒居野人公
極陳非計主議大臣甚不悅及用師不利徒喪士馬乃始嘆服公平居不
喜紛華清素如韋布常戒子弟曰余德雖不類心實無他忝長而銓未嘗
私其非人又歷刑法之官亦未嘗徇情出入人罪汝輩終身佩服我言可
矣公識量過人雖以直言賈禍用事者非久伏辜而被錫之秩悉復其舊
公之先見爲不可及而亦信好還之理有定也公亢生三男五女男長卽
明胤議政府右叅贊錄衛社勲封光平君次卽弘胤同知中樞次懿胤司
諫院獻納女長適宗室文川正壽甲次適縣監盧弘祐次適及弟李霖次
適叅奉柳金鉉次適及弟沈苓叅贊娶左贊成洪景舟之女生三男四女

男長熙瑞都事次基瑞察訪次與瑞女長適生員李毅次適直長李彥亨
次適別坐慎思遠次適修撰朴好元同知娶刑曹判書韓亨九之女生一
女適進士沈鎬繼室以判官李淑之女生一女幼獻納娶文城正湘之女
生四男一女男長龜瑞進士次龍瑞次鳳瑞次瑞女幼壽甲生五男七
女男長文衡縣監次虞衡次商衡次周衡次漢衡女長適府使韓蘊次適
監察梁允信次適忠義衛南崙次適府使朴鐵壽次適都事朴應順次適
姜應運次未行盧弘祐生一女適生員申浹李霖生四女長適別坐河春
年次適趙餘慶次適張夢周次適黃德元柳金鉉生六男二女男長淇次
潭次浹次次渚次女長適高世崙次未行沈苓生五男三女男長仁
祐次仁祺次仁祉次仁禧次仁祿女長適忠義衛洪理元次適金忠幹次
適進士河漢水衍支之盛世未嘗有也余於公家雅篤孔李之義又以僚
寮事公非一非再公之事業得於見聞爲詳故恭贊以狀屬銘銘曰

國丁興運輔佐須人勞勩食報必歸世臣武珪家謀代不乏卿排解權橫
直究有聲連延三世以屬光城聯倫相府贊定章程公符積慶曄然蘭玉
決科卽仕夙孚望實由卑至鉅罔不思効有言動聽首抑浮躁志在匡
國匪事彈糾置生靡悔繇植內守洎示四罪迺獲知言理數有反簪笄病
門養備軒駟榮莫與偉在公未逮于配有煒生不愧人歿不愧名亦克裕
嗣俾展休明蔚伎麻洞有載螭首百世在後公迹彌壽

李龍岡墓碣銘

並序

君分源國牒長于高華年未弱冠自知讀書由保任就任授參禮道察
訪母夫人引年上請移居便養故得易活人署別坐序陞司宰直長以無
妄坐罷未數月復授義盈直長陞軍資主簿轉司憲監察出補咸悅縣監
治尚綜理連收八最會廉按家素與有卻置君於殿君不以見絀屑意四
閩歲乃授左翊贊遷司僕主簿又移漢城兼叅軍掌隸司評剖斷無留僚

更服其能適有親嫌通授宗簿主簿尋轉監察龍岡西道劇邑以君補缺
君用治咸悅者飾礪有加頗以治辨聞旋為不悅者所構被劾解歸民皆
渡道攀留君再以晡昧被斥遂絕意營宦居閑者七年會外孫女選配今
上洛邸朝議家長不可置散乃授敦寧主簿時君方寢疾內醫診問不
絕竟不起 中廟嘆惜特賜棺槨異數也君生于弘治戊申七月二十一
日終于嘉靖癸卯十月二十九日春秋五十有六明年甲辰禮寢于高陽
先壠左支寔二月十二日也君諱對字盛仲高王父諱補孝寧大君曾王
父諱容寶城君王父諱綜錄勲敵愾封栗原君考諱子謙呂陽君配即光
山著姓金耆之女教成福備為宗姻武君配鄭氏內資寺正宗輔之女克
遵遺則益洪家慶後君十四年丙辰正月初九日終與君同域異塋君外
雖俊爽內實淳篤奉母夫人色養備至凡遇先諱日必致潔齋祭母夫人
膏病革君沐浴剪爪露禱于天乞以身代徹數日夜不止病尋愈聞者以

請誠感之致處夫婦以禮訓子弟以義聞閭肅然今 坤宮少長子家君
於群兒中常禮異之果主壺化誕元良世以是服其先見君於平居日引
賓朋爲無事飲器不問費清望之士過從無虛日雖置驛投轄殆無讓焉
與人交投罵無隱然酬對之際或略細謹以故多謗平生好賙人意雖車
馬之重未嘗有靳色君凡生七男一女長曰楫中癸卯司馬忠勲府經歷
次曰栢未仕蚤逝次曰捷魁壬寅科通禮院右通禮次曰櫟中庚子司馬
工曹佐郎次曰櫟伊 縣監次曰櫟敦寧主簿次曰櫟捷壬子甲科禮曹
正郎知製 教女適領敦寧沈鋼封貞敬夫人庶出一男二女男曰梧女
幼楫娶別坐鄭承孝之女生三男三女男長曰堯賓 靖陵叅奉次曰禹
賓次曰纘金女長適洪潤先次適李澈次適韓漪栢娶刑曹判書吳潔之
女生一男一女男曰舜賓女適生員李敷捷初娶宣傳官閔祐之女生一
女適別坐金有孚繼室以忠義衛元濬之女生二男二女男長曰雲賓餘

幼穉娶忠義後一女生一男二女女適許思翼餘幼穉娶僉使趙環
之女生四男二女男長曰白實次曰辰實女適金續先餘幼領敦寧生八
男二女女長即 男長曰仁謙次曰義謙中乙卯司馬次曰禮謙智
謙女適任榮七餘幼娶忠義衛元湜之女樛初娶僉正尹之清之女生
一男一女男曰廷實女適金鳳瑞後娶忠義衛尹之讓之女內外孫及曾
孫共八十餘人余於君惟分素篤亦知心迹最詳故諸孤以狀屬銘銘曰
獻廟御極毓祥麟大支屬初故多委社購書樂善媿美德蒼蟬聯三世
迺有呂陽多能致顯益邀後福君承緒業謂如可復不肯取媚動速顯蹟
仲孺已諾所至倒屣受絲日飲足以全真進厄令長視僅中身惟不裕躬
以尚于後數十百孫世不多有無源焉羨無種焉獲有欲考履盡徵斯作

推誠協翼定難衛社功臣大匡輔國崇祿大夫義政府領議政兼領

經筵弘文館藝文館春秋館觀象監事坡城府院君尹公墓誌銘

并序

尹氏自出坡平高麗勲臣莘莘以來世有聞人入國朝有諱惇仕至奉常主簿贈吏曹判書諱繼興三陟府使贈議政府左贊成諱昀副司正贈議政府領議政寔公考也妣卽晉陽柳琮之女贈貞敬夫人皆以公貴故推恩三代公諱某字某生于成化丙申自幼英毅夙成不煩師承文辭自進弘治甲子中司馬爲上舍生正德丙寅釋褐由成均學錄選入藝文館爲檢閱再轉至奉教陞成均典籍累遷禮兵兩曹佐郎司諫院正言漢城判官黃海都事承文校理又轉司諫院獻納刑曹正郎三八夏官爲正郎再歷栢府爲持平而兼帶春秋自夏官始陞掌樂僉正乞養出守泰安郡仍帶春秋以治異運收六最丁外艱徒步扶柩返葬楊州不出倚廬啜粥訖再期公幼邁內憂毀棘營治動合制禮其天賦篤孝類此免恤拜司諫時議有欲表出孝行公辭過堅懇議雖寢而名益重歷司宰司僕

司膳副正輔德司成再為司諫執義又遷司僕尚衣二正廷論以公名行
堪處勸講特降秩為副應教仍轉應教俄擢拜承政院同副承旨尋轉右
副未幾因事左叙軍衛兼將五衛又授禮曹參議大司諫復降上護軍出
按忠清道入為左副承旨三轉至都承旨居喉舌首尾三載出納皆允坐
無妄移軍衛即改戶曹參議公以久次回翔累歲物論稱屈特加二品階
觀察黃海道政滿由同知中樞遷刑曹參判復移樞府充賀至朝燕還
拜禮曹參判慶尚務殷朝廷難其按使公受命往蒞積滯一空南人騰
頌至今不衰還歷同知中樞漢城右尹兵曹參判遂招拜刑曹判書窮士
有訟理者公首直其冤當路惡之竟構罷乃已越數月起授知中樞轉判
工曹議政府右參贊禮曹判書兼都摠管知義禁府同知成均公三判地
曹兩長銓衡俱帶經筵春秋館特進崇班為贊成移兵曹判書復為右
贊成公久負爰立之望中廟採輿論擢拜議政府右議政兼領經筵

監春秋館居五年 中廟禮陟進公左議政兼山陵掩護使衆酌舊典
務遵中制群情胥洽 仁廟左諒闇公攝贊新政朝野倚重旋進領議政
兼領經筵館閣觀衆監事匡毗之功益多乙巳夏 上震疾公以內醫
院提調晝夜侍省及 上大漸卽召兵曹分勒禁旅遣衛令 上私第
躬詣奉迎卽日嗣位公叅錄衛社功臣封坡城府院君丁未公引年
請老 上慰留不許仍賜几杖明年相位有缺 上特問誰可公薦故
相洪公彥弼以故降爲左議政是年七月公告疾 上特命御醫診治累
遣內臣候問竟不起享年七十三 上震悼輟朝三日 賜賻祭有加公
儀表偉然人望之知爲宰相器平生未嘗疾言遽色接人御下無貴賤一
以寬和見善必嘉不能必矜故皆得其懽心凡當國處事務持大體以至
於燭微決疑確不可動世用是信服嘗掇古人格言數十條置諸左右以
資省飭雖燕處必正服匡坐不設嬾容處事修整下至卑幼亦無怠惰

慕承祭盡其誠敬晨昏告面不間事生上下屬望方殷遽爾天奪痛哉公
初娶縣監金之壽之女繼娶宗室鎮安副正永男之女皆無嗣取從兄
仁復之子視爲後視中武舉積階至折衝出補麟山節制先公歿側室有
一子曰億屬兼司僕爲上護軍視娶贈兵曹參議李良弼之女生四男
曰思哲喬桐縣監次思敏四山監役次思慎繕工副奉事次思欽公之先
塋在楊州松山里公嘗卜乙坐辛向之原于其側至是用治命窆焉寔嘉
靖二十七年九月二十五日也士龍於公雖年輩不倫而受知最深故其
孤思哲以銘事來屬銘曰

物以銳退名以蚤躋苟實之乎雖遠必至公初戒輟踐實遲發騫于珥筆
振于補闕郎署郡寄聲華彌焯有行賁身又備天爵冠豸陪講競刻薦章
遂躋通顯表儀周行藩宣報政六官綜務勞勩悉著動紆寵諭望符三
事命叙百揆協濟山屯贊定危疑紀勲啓封以酬勤毗孰名我埒孰盛

我弟回視不種有穫迺隕我既收實有載必相如船安流如驥熟路自極其屆孰嬰我外苑彼松山龜兆夙食我藏幽刻以質公德

從弟奉訓郎行南部主簿公墓碣銘 並序

君諱勞謙字受吉系出東萊曾王父諱賜晉州牧使王父諱蘭宗議政府右叅贊勲封東萊君謚翼惠考諱光弼議政府領議政謚文翼妣宋氏禮曹正郎順年之女君於兄弟序最長謹篤無子弟之過初籍保任叙掌苑署別提轉掌樂院直長陞南部主簿自供職外不嬰毫毛冗事韜默自藏罕與人接忽惑疾廢居積十餘年醫治不效竟以是終距君生成化甲辰至嘉靖乙丑春秋四十有六君聘典翰金匱之門獲佳配能業家不忝宗婦頗為宗姻所式生一男一女男曰惟仁登癸卯科今為延安府使女適興海郡守申汝樑府使娶生員具元之之女生一男二女男曰芝衍中己酉生員女長適奉先 殿叅奉朴挺立次適 王子鳳城君某郡守生一

男三女男曰拭女長適秀才李復慶次適檢閱鄭得次在室曾孫凡幾人
君配後君七年而歿就楊根治西五里子坐午向之原與君合窆焉辛亥
春府使伐石謀壽君迹以余在諸從中知先人行槩最熟使芝衍來問銘
銘曰

生華稟厚夙躋仕籍疾也有命遠塗以院於躬不羸于後有裕我銘訂之
責報罔悞

伯兄通訓大夫江西縣令公墓表陰記

伯兄子雲氏守江西縣越六期連收優最忽遭疾不起返葬廣州見佛山
先壠一牛鳴地配柳氏亦踰一章隨仕甌山棄養縣解諸孤奉櫬就君塋
域祔藏訖手具公履歷治行為一狀屬余為文將勒石表之陰嗚呼余尚
忍為此歟執書涕泣者彌日乃敢摘辭君諱漢龍子雲其字也生而穎秀
年甫龀便志學器業日進解額會闈屢中屢誥廼為親黨所勉初補司圃

署別檢轉掌苑署造紙別提司導直長序陞內膳主簿遷掌隸院司評贊
決明允僚吏莫敢欺眩出補水原判官府務浩劇號補難治君用綜密動
以理辨居二考丁內憂在草土頗經未疾迄服除猶未告平養病不出者
五年有薦口引君授通禮院引儀仍補長水縣監山民喜公簡率四易寒
暑竟謝病歸復授禮賓主簿濟用判官忠翊都事君多病不樂京官丐授
江西縣令其俗好訴訐長吏多坐是譴罷君至任恢條畧苛不校其犯弊
習爲變公居西壤頗久遂嬰不伏疾竟至奄忽公生成化丁未十二月初
六日終嘉靖癸卯正月二十七日君性夷曠無畛域平居客常滿座應接
忘倦當官處事不事邊幅篤於孝友早失慈恃追慕常劇撫諸弟俱得歡
心燕居未嘗違處至於游宦四方必寓詩思戀贈酬成卷教子弟有法務
盡受敬晚年謀退安城別業不諧號西坡居士君之先府君曰光輔昌原
府使 贈吏曹判書先夫人曰金義李氏護軍格之女 贈貞夫人王父

曰石叅贊蘭宗 贈領議政曾王父曰賜晉州牧使 贈兵曹判書君聘
文化柳氏即叅奉繼根之女以婦德爲宗姻所式合姓所鍾生六男一女
男長純祐中丙午文科甫川府使次純祉歸厚署別提次純福陽德縣監
次純祐觀山縣令次純祺司憲府監察次純禧草芝萬戶女適承文判校
李億祥府使娶叅奉安龜齡女生三男二女男曰衆哲衆仁衆義女適忠
義衛趙瑞次適幼學徐澍別提娶士人梁坦女生四男一女男曰衆忠衆
節衆行衆元女幼縣監監部將李允耦女生一男衆信縣令初娶判官鄭
弘翼女生一男一女男衆德女幼繼室忠義衛李峻女生一女幼監察娶
縣令黃則女生一男一女男衆厚女幼萬戶娶府使尹忭女生二女皆幼
曾孫男女掩幾人嗚呼有德者必有後訂諸古今理無少爽吾兄心無適
莫與物無競平生種德于家責報後裔者根基甚厚其枝條暢遠直俟百
世可以驗矣略叙顛末以爲考德者觀焉

仲父通訓大夫行安山郡守府君墓碣銘並序

我仲父公捐館之三年嘉靖紀元壬午暮春其孤淑譙走价于京曰孤焚
經有期將立石壙道子其銘之噫予尚忍銘諸公諱光佐字良卿東萊望
氏鄭也鄭之先當麗代有諱穆起家擢第宦至左僕射有四子濟漸澤沅
俱以聞入取科爲卿相澤終左贊善大夫贊善之後簪紱衮衮歷六世而
至諱諧官至判司僕寺事諱龜齡官至結城縣監諱賜妙齡釋褐有名我
世宗朝以集賢殿直提學爲養出牧晉州卒諱蘭宗累捷魁科係望將
相錄勲佐理封東萊君筆法臻妙爲當時第一武藝亦絕倫以吏曹判書
早卒司僕於公爲高祖結城於公爲曾祖提學爲祖判書卽公考也妣李
氏完山名系也成化丁亥公生自幼純慤如成人弘治辛酉保任授金泉
道察訪盡心釐革郵政修舉申子以課最轉宗簿寺主簿乙丑出爲興德
縣監燕山主徵需太煩郡邑騷然公務盡應接一境賴完庚午秩滿遷典

性署主簿陞軍資監判官轉漢城府判官移忠勲府都事正德丙子除金堤郡守金堤素號劇郡公鎮以靜重吏民便之居數年以病棄官歸仕實村墅明年疾已授豐儲倉主簿遷儀賓府都事陞軍器僉正移禮賓庚辰春公素疾風疴至是有加不樂京宦丐守安山郡赴官數月宿療轉增是年六月廿又三日竟卒于官壽縷五十四嗚呼痛哉諸子以治命奉櫬歸葬于淳昌郡東磨訖山之原配金氏府尹克悌之女左議政光山府院君國光之孫女也賢而有幹先公九年而沒至是合窆焉公性寬厚不爲崖異蒞官以勤待人以和尤篤於友于承事兩兄如父母所夕展省喜爲內集不問有無撫子弟諸從亦盡恩義公生三男四女男長曰淑謙凡署別堤次曰士謙次曰世謙皆志學爲儒女長適部長李蓊次適彰信校尉宋世雄次適永庫別坐韓備次適將仕郎洪賓側室生一女一男別提娶務功郎許瑗之女生二女士謙娶主簿柳宗弼之女世謙娶丁彭壽之女生

一男幼部將生二男曰忬曰性彰信生三男曰應生曰應壽曰應期別坐
生二男曰興緒曰昌緒將仕時未有嗣銘曰

生于隆盛没于休明 我不忤物物莫我撓 未及周甲壽未盈也 纔

得官符祿靡贏也 合茲二憾以充造物 造物肯領遲于餘澤 諸郎

嶄然允孚未艾 未艾之蓄其發必大 磨訖之原山水儲祐 片石載

辭公名乃壽

從叔父工曹參議公墓誌銘 並序

鄭氏之源出自東萊有諱穆官至左僕射僕射有四子濟漸澤沆皆登第
為聞人澤官至左贊善歷八代而有諱龜齡官結城縣監生諱賜官直提
學生諱蘭孫累典名郡咸有治聲娶參議廬撰之女天順壬午七月三日
生公公自幼業學聰記過人經目成誦成化庚子中司馬弘治己酉中第
擢補藝文檢閱為待教授成均典籍遷司憲監察司諫院正言更曹佐郎

陞司憲持平遷兵曹正郎荐丁內外憂服闋授翊衛都摠府經歷有司
銓曹故也遷宗簿軍資僉正陞司宰副正成均司成又陞掌樂正持授奉
常正正德丙寅今上中興叅原從功徑加折衝爲司直未幾出守安東
任滿以中樞召還拜禮曹叅議轉工曹叅議公性樸直實屬不肯詭隨以
輕率爲直當官處事動皆脩舉未嘗廢墜居家篤於友愛兄弟曰怡怡喜
笑苟少不經蹙然不樂與人交不爲表襮久而莫渝其爲治術以剛稜著
其爲兵務以綜密彰其任安東民橫吏傲號稱難治文簿應接倥傯騷屑
下車之初有老更爲民害者竣刑治之以警其餘下受約束不敢欺闔境
大治傍邑取式至今民有遺慕談善政者以公爲首及遞察兩曹見人哭
媚問人回枉不噫心所不取必直斥而折未肯婣媚容默故知者許其真
性而不知者反焉坐是多詆謗今亦不以爲介任其寡合晚年嘗歎曰吾
官備六曹非不達矣年踰中身非不老矣顧舊業繼薄可蔽風雨而給饘

粥乞骸歸老吾計決矣戊寅春遂掛劍南歸親朋追送江潯各極黠然而公獨以遂樂爲幸長揖而去時朝廷用小事多變更耆舊之不安于仕者俱卜退計而卒無有勇者公旣退於閑適日以杖屨巡園圃課樹藝而勸鋤耨者靡不用極及頗稔資用不匱己卯秋士龍奉使于南尚山公致簡曰甬使事有嚴不可稽程竣事過我共討魚稻龍亦以公事不可後也趨晉陽方巡稼于野忽有通騎來報云公遘疾四五日而轉革棄代于本第取而審之乃監司公手牘也龍驚倒慰心曰有是哉天子第以身在阻遠旣失匍匐之義茹哀在道者閱月而方屆公櫬雖一哀而竟不得掩壙而返公之孤忠俊書抵余曰孤旣以今年冬襄事如禮今將改豎石墓表子姪之行子詳先入其誌而銘之嗚呼龍尚忍誌公之墓乎夫人汨於聲利傷性膏火之中而不能久視則其理固也至如放情林下優遊卒歲保頤之道也公獨不能享有何耶公其有負於天耶抑天之有負於公耶公配

黃氏司直茂稷之女生三男三女長忠俊司馬府使次忠賢次忠男女長
適義盈庫奉使李崇禮次適忠義衛李舜佐次適建陵衆奉金安祚内外
孫合十餘人既叙公行跡於右係之以銘曰

德不愧賢才不讓人 妙齡獲路遲暮遭迤 宜人其施以樹茂音 年

斬耳順位厄舟金 孰勸爲善真宰渺茫 商山屬縣有原其陽 松檟

琴森公之壽藏

湖陰先生文集卷之八終

附錄

忍齋

鄭都監士龍以忍名其齋其自警亦切矣予來朝鮮鄭有事於館伴瀕行求予詩爲之賦此

利害關頭要認真刃懸心下聽經綸請看談笑成功者多是尋常耐事人字疏百言驚世主醋膏三斗許隣臣直須忍得無餘恨更好軻書去說仁

十玩堂

鄭都監有十玩堂所謂十玩者竹梅松菊水石并文房四友而十也茲求予詩予不能盡發其美爲賦短章

十玩萃軒傍鼎津箇中那得着閑人六君四友應相狎醉裏吟邊想更親佳境只容魚鳥共交情爭比漆膠真眼前誰少游心地獨愛斯堂避俗塵正德辛巳臘月下浣賜進士及第翰林院修撰兼經筵國史

宮 欽差正使紫陽山人唐皋書

忍齋

羨子希賢志以忍作齋名逆意終如意難行便好行還將欲從理莫使氣
移情執此行能久無勞樂自生

十玩堂

我來東國見鄭子其人通儻仍秀美自言結構鼎津涯十客相親情莫比
歲寒三友爲知心霜叢晚節尤可欽石生水曹亦不要交游往往投儒林
陶楮二士莫逆久管城釣向玄香守朝朝暮暮寧暫離不在詩篇即杯酒
鄭子鄭子我所嘉我憶此客真堪嗟縱與偕來一邀見奈我忽忽歸使華
余奉 命來鄭子送於江上往復月餘朝暮時一見之甚有英邁
俊逸之氣茲余將復渡江而西以譯士朴址來求忍齋十玩堂時
余方忿忿行色勉副數句以答亦以酬其勞而識其別云

正德辛巳臘月廿日

賜進士出身

欽差副使兵科給事中侍

經筵官前翰林院庶吉士涿鹿史道書於義順館

題鄭判書朝 天日錄

朝 天日錄刑曹判書鄭君士龍雲卿之所作也雲卿於嘉靖甲午冬奉其國王之命入朝貢于京師日記其道里之所經目擊中國之盛凡有所觸發爲聲詩故集以朝天名也予閱其集見其沉着冲淡不爲綺麗艷冶之辭有唐人之遺意因竊有感焉夫朝鮮僻在海濱與中國異壤其語言又迥別不可知至其爲詩則音律和調不異於古不殊於中國何哉其理同也其國好禮義喜讀書士皆以通經學古爲高素稱守禮之邦今又累沐我聖朝之化漸摩已久日異而月不同故其能言之士有加於昔與中國不大相遠其化同也則其肆於聲歌形於篇什固不得而不同矣如雲卿博雅有文言動詳慎不愆於禮又東人士之秀者

宜其詩之彬彬乎可觀也昔司馬公邀遊於四方故其爲文獨盛況雲卿
觀光上國其得於山川文獻之助典章人物之懿日觸於前而感於心
非拘於法而不能入者則其矢於口獨爾專攻無疑也韓子曰外慕徒業
皆不濟其載不入其室者也雲卿之專攻於詩可謂無外慕矣予之奉
命而來也雲卿充遠迎使迓予於江上同至王都旣又從太平館送予西
還相聚月餘登臨游宴咸與之俱蓋無日不相接予目其貌聆其詞知其
爲一國之彥其所至殆未可槩量此所以遴選於衆而獨來待予也鴨江
將別雲卿出是集求予序之予重其請爲之次數言以復其意且以見
天朝育才之盛而無不屈也

嘉靖丁酉夏四月朔後三日

賜進士及第翰林院修撰

經筵

國史官同修

大明會典兼錄累朝

御製文集諸書纂脩宋史

欽差正使晉安雲岡龔用卿叙

朝 天日錄序

龍津氏渡江鄭子館焉慎而暢舒徐而介豈豈爾弟弟爾敦敦子若有所
豐乃竊議曰其誦風乎戒行除道朝暮見必陳其若府若郡若州若邑若
山若水若江若河若川若溪若渠港若礮壑泉石若峯巒嶂壁巔若草若
木若謡若鳥獸田舍若古跡若樓閣亭榭臺館復竊議曰其能知風乎載
道受執事過可樂即設坐揖而進疊疊而對必指其某為府某為郡某為
州某為邑某為山某為水某為江某為河某為川某為溪某為渠港某為
礮壑泉石某為峰巒嶂壁巔某為草某為木某為謡某為鳥獸田舍某為
古跡某為樓閣亭臺館榭復竊議曰其能觀風乎而聞之而見之而志之
聖詔未開不敢唱也迨國乃發鄭子賡焉旋復續缺鄭子亦賡焉方以
為有詩之風將別鄭子乃出朝 天日錄若干篇皆徃年朝貢之役之紀
也乃見其吟職守吟流峙吟飛潛吟動植吟變態吐納吟音律紀綱有無

原厥成敗由本國達天朝凡所經歷值遭事故揮寫情狀一寓于吟則
鄭子昔日之行將于吾行予卜之而其風愈彰矣且為詩溫而厚和平
奇恠而喻幽邃而不譎充如也郁如也穆穆乎有餘饗焉復竊歎曰賢哉
鄭子其蓋得于風而能所以採之者也夫剛後無詩屈宋漢魏猶得其遺
唐宋而下吾不知其終也無虞鄭子之詩進于風也無虞海國之士之能
于進也夫詩貴于義文其末子有札之風焉重役事之久也不能却請乃
強序之鄭子判刑曹名士龍字雲卿別號湖陰祖亦登曹長父倅平壤昆
弟茂業子多而拔行純政著學當才充不獨優秋臺也國將大用人稱其
為慶尚世輔巨族云

賜進士第從仕郎戶科給事中侍經筵館前都察院江西道觀

政欽差副使晉陵龍津吳希孟書

湖陰草堂序

元子二十五年余以行人奉使至朝鮮湖陰鄭大夫士龍以嗣王命送
于江上其返也復充遠送使以行次平壤共濟大同江覽山河之美余為
之嗟賞者久之湖陰假譯者訊曰大人其有意于山川乎山川固士龍願
也龍世家宜寧頗饒山水有山名九龍螺峙左右下俯江名鼎津凝注碧
玉澄澈可鑑異樹奇花遊魚啼鳥無間于四時固東南勝地龍嘗等屋其
中貯古圖畫琴書以為休栖之所乃緣國恩甚厚思所以致身者未能
固不果于退其身也余聞而嘉之曰君子哉湖陰大夫予不溺情于廊廟
而江湖其心不急其身而先于國家此古聖賢立身行道之大節大夫
有之是可以愧獨善而無義徇人而不知耻者也聞大夫為宰相矣秉國
鉤而掩百官矣况其國有新君正更化以善治時也大夫行矣其以至誠
格君心以協恭率同寅以靖共勵庶寮以暈征拔士類以淳龐敦風俗以
精明起治切從容談笑以成光明之業然後以爵祿歸國家以匡濟付後

人始休其身于九龍鼎津之間怡吾身入吾廬展吾書而讀之曰吾庶幾不愧于聖賢之道也上不負其君下不負其民也鼓吾琴曰吾庶幾可以解民之愠而不愧于南風也登吾山覽群峰之環峙曰吾其得重厚不遷之體無愧于仁者也臨吾江鑑吾水曰吾可以彷彿其周流不滯而無惡于智也覽四時草木鳥獸鱗介之自得曰吾庶幾樂大和之元氣而萬物各得其所如此也是向之所以急于國家者盡臣道而今之所以優游者適天和也昔人有言先天天下之憂而憂後天下之樂而樂其大夫之謂歟譯者將余命以告湖陰子致謝且請名其齋余復曰其湖陰草堂乎軒冕之士可以壯麗名山林隱遁之士則草堂其宜也余家閩中有屋終南山麓嘗自扁曰薇田草堂蓋種薇以自給之意也自叨天子恩未有以圖萬一固不敢有閑暇之念而亦豈能忘情于終南也哉大夫之志與余同其以是名之何如譯者再復湖陰子再謝余遂大書其扁以歸

嘉靖二十五年丙午仲春三日 賜進士第修職郎行人司行人

前試尚書春部政 賜一品服 欽差副使關中微田王鶴拜書

書雲卿金剛錄後

平生谷口老雅與仙山親偶乘莽眇鳥指點東海濬縹緲謁帝居俯視萬
嶙峋落筆雲漢間列缺爛晴旻帝嗟杜陵妙玉案題句新揮闔閭陰陽聲
節淡更淳餘光之所照衣被金剛春衆以下界語衆口調酸辛前身洪崖
癯鉤天衆列真管窺得一斑莫謂秦無人

默齋 子美

蒙示閩東錄乃有洪相國題跋且喻以繼續天地之大譽之者雖見
誚亦不可不贊敢書一律于後

雄才久蓄屈伸間眼底湖山八筆端東嶽試觀天下小秋河從覺海沒寬
卷中歷歷皆真見名下紛紛掩赧顏還有匡園留一賞從今拱把合成攬

高靈後人時晦

仰和左相韻

鄭子山太華可望不可親
又如水彭蠡無以窮涯濬
近有關東作令人仰
嶙峋汪汪撓不濁千頃涵秋旻
題詞落中台造語極清新
朱絃韻更希大
羹味還淳從知真宰力陶鑄萬物春
我今口生棘咀嚼有餘辛
返觀身自
笑了無一事真空餘眠食在百歲爲陳人

嘉靖辛丑季春

遜齋

蕃中

輔國崇祿大夫兼政府左贊成弘文館大提學藝文館大提學諱士
龍墓表陰記

吾東方文學之盛自古記之說者曰國初諸作稍變舊裁之以雅麗自
新羅時歷數千百年其間高才傑出者如崔學士李相國牧隱佔俾諸
老之作能頡頑唐宋氏而李相國最大才自我 中明以來以詩名家
者亦多百餘年間湖陰之詩特稱於後世何也其叙曰天才絕倫自髫
齔知讀書日記累千言文章卓然早成遂顯於一世吳太史補之曰若
沅峙動植變態吐納音律謠俗一寓於吟哦而長於風爲詩溫厚和平
奇怪而不謫於是皇華酬唱之作大傳於天下今有湖陰詩集行于世
累千篇當湖陰之世稱多才學之士如魚叔權李鵬翔林芑盧瑞麟權
應仁之徒皆出湖陰門下名其時至今公諱士龍字雲卿其姓鄭氏湖
陰別號也今湖陰舊業在宜春縣昇湖上 世祖名臣東萊君蘭宗之

孫昌原都護光輔之子 中宗相光弼之從子也弘治七年甲寅生十六陸上舍十九選博士科繼以魁科貴歷事四朝至宣朝六年癸酉以領中樞卒年八十墳墓在楊州今其三世孫之問能言郭璞李淳風之術葬而子孫貧富窮達禍福壽夭無毫髮失嘗卜葬於永平之龍化里一朝遷其三世之葬公之墓歷八十餘年乃改葬云

大匡輔國崇祿大夫議政府右議政許 穆撰

跋

大凡文章之作常多於草野窮苦之中而僅少於紈綺紛華之叢蓋以山林閑靜志專而易力軒駟駢闐搖奪而難工也其或生於卿月之家而有黼黻之章者苟非才質之美特異之志詎可能侑乎於惟我宗先祖湖陰先生以世祿之裔挺間世之資早占黃甲錄于湖堂歷典文衡位至正卿蔚然聲望山斗于一世而珥筆金鸞論思制作與夫情性之發于言辭者俱可以華國而裨世教也舊有遺集八冊刊行于世而數百年間累經燹劫且子孫散落不能保守蕩殘無餘聲光影響杳杳于無以徵於今日也此是有識之尋常嗟惜而惟是秘閣貯藏一袞幸存於滄桑之世移管在書館年前東萊君胄孫世鎮氏使人膽出藏弄其家以娛來後而旁裔國鎮氏特慨然于宗先偉蹟之沉湮于壁中博議于各地散在本孫暨諸族合力修契將圖重刊而謀及於不佞敬服其

義不辭隨後周旋矣今其後孫璣鎮海鎮甬搜覓謄藏之稿屬余覈其
帝虎猥不敢當而仍奉閱三復窺得一班詩之古高峭健文之灝噩紆
餘皆極其致卓卓爲章家之軌範而大槩是夙夜進退倚馬之作然其
旨義之遠辭致之工有非俛首圭窬兀兀窮年者之所可攀躋也但移
寫之際訛誤太多雖畧加訂正尚多未盡而又遑遑有疑似難明者想
是字書之錯然不敢妄意擅改以寓存畏之意而舊本八冊編爲四冊
付諸石印字密行促不無短縮之嫌然惟可卽此而摸索其七分影像
則後必有子雲亮夫矣困書所感以竢他日精校更刊以成完本耳

辛丑歲仲秋節後學族弟孫升謨 謹書

恭惟我從先祖湖陰先生文章之卓絕宦業之清顯載在禱乘播于輿
誦無待乎後人之揄揚而惟其金薤琳琅之遺落世間者刊行八冊而
年紀已邈劫火屢搶散落亡失便成鴻雪之無痕詎非後承之痛恨耶

曩年翼惠公胄孫世鎮氏與其本孫圻鎮氏謄出抄本于館閣將欲重刊素志未遂而次第棄世誠一恨事也今得其抄本于故世鎮氏家其所喜幸如得壁中之藏航頭之傳也仍與諸宗合謀修契將營重刊而嶺中居在本孫篤於述先殫誠竭力未幾年着手于剞劂吁其偉矣自顧不肖逖在湖外徒抱贊尚之志而未效一臂之力然亦與聞於此事故忘其僭踰略記數語于編尾而至若顛委之詳諸公之述備矣茲不疊架云爾歲辛丑仲秋節從十三代孫國鎮謹書

後識

今距湖陰先生之世殆近四百年遺文微蹟昔有刊行八冊而世代沉遠兵燹屢經散落無傳其後承者豈不痛恨哉自成均館謄出抄本留在於世鎮氏家而今付剞劂是役也亦後生之幸也數年前其從後孫國鎮氏唱其事仍與諸宗合力修契而本孫中璣鎮海鎮氏從兄弟

篤於紹述罔墜厥緒而未幾年今將告竣其刊行豈非一幸而一感者歟茲不揆僭越略叙顛委于卷末族弟孫鎮漢 謹識

瑤琨混於泥沙梗楠雜于衆木人皆惜之先賢遺墨之不見於世亦猶是耳惟我湖陰先生天才絕倫自髫髻知讀書日記累千言文章卓然早成遂顯於一世吳太史稱之曰若流時動植變態吐納音律謠俗一寓於吟哦而長於風於是皇華酬唱之作大傳於天下眉叟先生曰中明以來以詩名家者亦多百餘年間湖陰之詩特補於後世其爲笙鏞黼黻之文於斯可徵當時非無詩集之行于世而緣子姓之散在各地裒輯壽梓則歷累世尚未遑逮幾年前自本孫及傍裔各自出贖圖貯公世或謄抄于內庫或傍搜于各家成幾局始得印出經幾百年文字散佚難合知不過全昇之一齣而私心欣幸恍若瑤琨之脫乎泥沙梗楠之拔乎衆木也輝玉嘗仰慕于先生有素矣於是役義不辭無一言畧

書所感于中如右云癸卯仲春中泚族昆孫輝玉謹書

此吾先祖湖陰先生遺集也距創刊已四百有餘祀則海桑累變孫
零替自爾散亡殆盡幸秘閣藏褻轉置書館者有若壁經之出於秦灰
之後意其神護以不欲喪斯文也翼惠公肖胄世鎮氏辛勤騰出繼而
宗中諸氏心物共濟圖所以再刊而公諸世甚賀其尊賢衛道之誠不
以本傍而有間也爲吾祖後承者詎敢袖手岸觀因循歲月耶乃使兒
輩璣鎮海鎮奉以周旋出謀拔力亟見斯集之不日梓布使吾祖懃蹟
復明於世不至永泯於來後則寧非裔孫今日之幸也哉至若先生德
業事行詳載於眉翁誌表離校顛末備悉於升謨氏識跋不肖何庸贅
述焉

十二代孫源錫 盥手謹書

中明嘉靖二十五年修職郎王鶴使于本國迎送之際共濟大同江以

山河之美嗟賞假譚歎我

湖陰公草堂之趣曰君子哉大夫乎蓋其王鶴之意不在山河深慕於
湖陰公之生平不溺情于廊廟而江湖不急意於身家而國家也今
予不肖列叅雲仍耳無所聆心無所誠九於祖先遺業繼述已矣修保
不遑然尚切一念彷徨於中至於其文稿之涉人耳目者想多卷帙而
成得輟集止爲八局亦不知何年刷稿矣截難得於世而獨貯于王府
者僅得抄出更編原稿也痛哉恨矣力不宥而謀不僉時多諱而功難
圖續而又續止而復止者凡幾霜也自某年間先考每以此懸懸額額
至某年不遑圖終遽爾終世只存靈臺之故墟予小子吞恨重疊夢魂
黯澹草草姑此以待後昆之完粗述微衷覽之諒只

十四代孫雲弘 泣血謹書

發刊

光緒四十五年八月十五日

慶北醴泉郡豐壤面憂忘里

校正

鄭升謨

全

全

知保面

道化里

編輯

鄭海鎮

全

發行

鄭機鎮

發刊所 知保齋

